

宋六十一名家詞



04032






宋六十一名家詞

丙集

明·毛子晉輯



第一輯

第三十九種

據汲古閣刊本排印
貝葉山房張氏藏版

本書封面題簽：盧冀野先生



674
24 v. 3

酒邊詞二卷

向子諲

799974

題酒邊詞

詞曲者古樂府之末造也。古樂府者詩之旁流也。詩出于離騷楚詞。而離騷者變風變雅之怨而迫哀而傷者也。其發乎情則同。而止乎禮義則異。名曰曲。以其曲盡人情耳。方之曲藝。猶不逮焉。其去曲禮則益遠矣。然文章豪放之士。鮮不寄意於此者。隨亦自掃其跡曰。謔浪遊戲而已也。唐人爲之最工者。柳耆卿後出。掩衆製而盡其妙。好之者以爲不可復加。及眉山蘇氏。一洗綺羅香澤之態。擺脫綢繆宛轉之度。使人登高望遠。舉首高歌。而逸懷浩氣。超然乎塵垢之外。於是花間爲皂隸。而柳氏爲輿臺矣。薌林居士步趨蘇堂。而嚼其馘者也。觀其退江北所作。於後而進江南所作。於前以枯木之心。幻出葩華。酌元酒之尊。棄置醇味。非染而不色。安能及此。余得其全集於公之外孫汝上劉荀子卿。反復厭飫。復以歸之。因題其後。公宏才偉績。精忠大節。在人耳目。固史載之矣。後之人昧其平生。而聽其餘韻。亦猶讀梅花賦。而未知宋廣平歟。

武夷胡寅題。

酒邊詞目錄

江南新詞

滿庭芳二調

八聲甘州二調

滿江紅一調

鷓鴣天十二調

秦樓月一調

南鄉子一調

臨江仙一調

清平樂七調

採桑子一調

卜算子五調

南歌子一調

桂殿秋一調

好事近二調

江北舊詞

滿庭芳一調

驀山溪三調

水調歌頭三調

虞美人四調

減字木蘭花一調

少年遊一調

浣溪沙十二調

七娘子一調

更漏子一調

一落索一調

三字令一調

減字木蘭花一調

朝中措一調

減字木蘭花一調

水調歌頭一調

水龍吟二調

洞仙歌一調

蝶戀花一調

阮郎歸一調

西江月六調

生查子二調

減字木蘭花一調

點絳脣十七調

如夢令二調

長相思一調

南歌子三調

菩薩蠻一調

梅花引二調

宋六十名家詞

婦人嬌一調
踏莎行一調
更漏子二調
鵲橋仙一調
菩薩蠻三調
秦樓月一調
浣溪沙一調
醜奴兒一調
採桑子一調
相見歡三調

玉樓春二調
鵲橋仙一調
鵲橋仙一調
南歌子二調
南歌子一調
生查子六調
西江月一調
如夢令一調
清平樂一調

鷓鴣天五調
虞美人四調
南歌子一調
卜算子一調
減字木蘭花一調
望江南一調
點絳脣一調
好事近二調
浣溪沙十三調

酒邊詞卷上

宋 向子諲

江南新詞

滿庭芳

（巖桂風韻高古平生心醉其間昔轉漕淮南嘗手植堂下羈林此花爲多戲作是詞當邀徐師川諸

公同賦）

月窟蟠根。靈巖分種。絕知不是塵凡。瑤璃翦葉。金粟綴花繁。黃菊周旋避舍。友蘭蕙羞殺山樊。清香遠。秋風十里。鼻觀已先參。酒闌聽我語。平生半是江北江南。經行處。無窮綠水青山。常被此花相惱。思共老結屋中間。不因著。薜林底事。遊戲到人寰。

又 （巖桂薜林改張元功所作）

瑟瑟金風。團團玉露。巖花秀發秋光。水邊一笑。十里得清香。疑是蕊宮仙子。新妝就。嬌額塗黃。霜天晚。妖紅麗紫。回首總堪傷。中央孕正色。更留明月。偏照何妨。便高如蘭菊。也讓芬芳。輸與薜林居士。微吟罷。閒據胡牀。須知道。天教尤物。相伴老江鄉。

驀山溪 （紹興乙卯大雪行鄱陽道中）

瑤田銀海。皓色難爲對。琪樹照人間。曉然是華嚴境界。萬年松徑。一帶舊峯巒。深掩覆。密遮藏。三昧光無礙。金毛獅子。打就休驚怪。片片上紅爐。且不可將情作解。有無不道。低絕去來今。

明即暗。暗還明。只個長不昧。

又（王明之曲。薌林易置十數字歌之）

挂冠神武來作煙波主。千里好江山。都盡是君恩賜與。風勾月引。催上泛宅時。（泛宅。即公所賜舟也。上批云。泛宅可永充子謹乘坐。因名其舟曰泛宅）酒傾玉。鱸堆雪。總道神仙侶。蓑衣箬笠。更著些兒雨。橫笛兩三聲。晚雲中驚鷗來去。欲煩妙手。寫入散人圖。蝸角名。蠅頭利。著甚來由顧。

又（老妻生日作。十一月初七日）

一陽才動。萬物生春意。試說與宮梅。到東閣花枝第幾。疎疎淡淡。冷豔雪中明。無俗調。有真香。正與人相倚。怕煙怕霧。瑞色門闌喜。再拜引杯長。看兩頰紅潮欲起。天教難老。風鬢綠如雲。對玉筍。與薌林。歲歲花前醉。

水龍吟（紹興甲子上元。有懷京師）

華燈明月光中。綺羅絃管。春風路。龍如駿馬。車如流水。輭紅成霧。太乙池邊。葆真宮裏。玉樓珠樹。見飛瓊伴侶。霓裳縹緲。星回眼。蓮微步。笑入綵雲深處。更冥冥。一簾花雨。金鈿半落。寶釵斜墜。乘鸞歸去。醉失桃源。夢回蓬島。滿身風露。到而今。江上愁山。萬疊鬢絲千縷。

又（甲子季冬。丁亥。冒雪與晁叔異。劉子駒兄弟。皆北客。同上雪臺。登連輝觀。梁使君遣酒。仍與北梨。俱醉薌林。

堂上相與聯句云。西北通無路。東南偶共期。穿林行鳥路。踏雪嚙鷓梨。吳大年方病起。不能同此樂。得大年水龍吟詞。過之夜歸。月色如畫。亦賦一首）

夢回寒入衾裯。曉驚忽墮瑤林裏。穿帷透隙。落花飛絮。難窮巧思。著帽披裘。挈壺呼友。倚空臨水。望瓊田不盡。銀濤無際。浮皓色來天地。遙想吳郎病起。政冷窗微吟。擁鼻持牋贈我。新詞絕唱。珠零玉碎。餘興追遊。清芬坐對。高談傾耳。晚歸來風掃。停雲萬里。月華如洗。

八聲甘州

（中秋前數夕久雨方晴）

恨中秋多雨及晴景。追賞且探先。縱玉鉤初上。冰輪未正。無素嬋娟。飲客不來自酌。對影亦清妍。任笑薌林老。雲鬢霜髯。好在章江西畔。有凌雲玉筍。空翠相連。懶崎嶇林麓。則窈窕溪邊。自斷此生休問願。願甕中長有酒如泉。人世間。是誰得似。月下尊前。

又（丙寅中秋對月）

掃長空萬里淨無雲。飛鏡上天東。欲騎鯨與問。一株丹桂。幾度秋風。取水珠宮貝闕。聊爲洗塵容。莫放素娥去。清影方中。玄魄猶餘半壁。便笙簧萬籟。尊俎千峯。况十分端正。更鼓舞衰翁。恨人生時乎不再。未轉頭歡事已沈空。多酌我歲華好處。浩意無窮。

水調歌頭

（大觀庚寅閏八月秋薌林老願子美汪彥章蒲庭鑑時在諸公幕府間從游者洪駒父徐師川蘇

仰固及李商老兄弟是夕登臨賦咏樂甚俯仰三十九年所存者余與彥章耳紹興戊辰再閏感時撫事爲之太息因取舊詩中師川一二語作是詞）

閏餘有何好。一年兩中秋。補天修月人去。千古想風流。少日南昌幕下。更得洪徐蘇李。快意作

清遊送日眺西嶺。得月上東樓。四十載。兩人在。總白頭。誰知滄海成陸。萍跡落南州。忍問神京何在。幸有薌林秋露。芳氣襲衣裘。斷送餘生事。唯酒可忘憂。

又

（靈隱寄云與洛濱老人及筠翁過最樂堂醉中秋月用鄙韻有妙唱得賦一首庶異時不爲堂上生客耳）

我生六十四。四度閏中秋。碧天千里如水。明月更如流。照我洛濱詩伯。攜手仙卿。麈尾闌苑與同遊。人醉玉相倚。不肯下瓊樓。薌林老。章江上。幾回頭。賸欲控鶴瀛海。聊下越王州。直入白雲深處。細酌仙人九醞。香霧儘侵裘。共看一笑粲。以寫我心憂。

又

（再用前韻答任令尹）

飄飄任公子。爽氣欲橫秋。向日攜詩過我。知不是凡流。築室清江西畔。巧占一川佳處。勝士曰追遊。邀我出問去。拉月上新樓。爛銀盤。從樹杪。出雲頭。好是風流從事。同醉入青州。須信人生如幻。七十古來稀有。銷得幾狐裘。誰似薌林老。無喜亦無憂。

洞仙歌（中秋）

碧天如水。一洗秋容淨。何處飛來大明鏡。誰道斫卻桂。應更光輝。無遺照。寫出山河倒影。人猶苦餘熱。肺腑生塵。移我超然到三境。問姮娥。緣底事。有盈虧。煩玉斧。連風重整。教夜夜。人世十分圓。待拚卻長年。醉了還醒。

滿江紅

（奉酬曾端伯使君兼簡趙若虛監郡）

雁陣橫空江楓戰幾番風雨。天有意作新秋令。欲塵殘暑。籬菊巖花俱秀發。清芬不斷來窗戶。共驩然一醉得黃昏。仍叔度。尊前事塵中去。拈花問無人語。薌林顧靈照。笑撫庭樹。試舉似虎頭城太守。想應會得玄玄處。老我來懶更作淵明閒情賦。

虞美入

（與趙正之宛邱執別。俯仰十有餘年。忽漫相逢。又爾語別。作是詞以送。）

淮陽堂上曾相對。笑把姚黃醉。十年離亂有深憂。白髮蕭蕭同見渚江秋。履聲細聽知何處。欲上星辰去。清寒初溢暮雲收。更看碧天如水月如流。

又

（明年過彭蠡。遇大風行巨浪中。用前韻寄趙正之及洪州李相公。兼示開元栖隱二老。）

銀山堆裏蘆山對。舟子愁如醉。笑看五老了無憂。大覺胸中雲夢氣橫秋。若人到得歸元處。定一齊銷去。直須聞見泯然收。始知大江東注不曾流。

又

（中秋與二三禪子方誦十玄談。趙正之復以長短句見寄。乃用其韻語答之。）

澄江霽月秋無對。龜酒何須醉。人憐貧病不堪憂。誰識此心如月正含秋。再三滂濞方知處。試向波心去。迢迢空劫勿能收。漫道從來天地與同流。

又

（梅花盛開。走筆戲呈韓叔夏司諫。）

江頭苦被梅花惱。一夜霜須老。誰將冰玉比精神。除是淩波卻月見天真。情高意遠仍多思。只有人相似。滿城桃李不能春。獨向雪花深處露花身。

蝶戀花（和曾端伯使君用李久善韻）

洲上百花如錦繡。水滿池塘。更作濺濺溜。斷送風光惟有酒。苦吟不怕因詩瘦。尋壑經邱長是久。晚晚歸來。稚子柴門候。萬事付之醒夢後。眉頭不爲閒愁皺。

又（百花洲老桂盛開。張師明程德遠攜酒來醉花下有唱酬蝶戀花亦次其韻）

巖桂秋風南埭路。牆外行人。十里香隨步。此是薊林遊戲處。誰知不向根塵住。今日對花非浪語。憶昨明光。早荷君王顧。生怕青蠅輕點汙。思鱸何似思花去。

鷓鴣天（壽太夫人）

戲綵堂深翠幕張。南廳特地作微涼。葵花向日枝枝似。萱草忘憂日日長。門有慶。福無疆。老人星共酒生光。殷勤更假天吳手。傾瀉西江入壽觴。

又（番禺齊安郡王席上贈故人）

台榭初逢兩妙年。瑤林玉樹倚風前。疎梅影裏春同醉。紅芰香中月一船。長悵恨。短姻緣。空餘蝴蝶夢相連。誰知瘴雨蠻煙地。重上襄王玳瑁筵。

又（豫章郡王席上）

兩個鴛鴦波上來。一綸楊柳掌中迴。已愁共雪因風去。更著繁絃急管催。含淺笑。勸深杯。桃花氣暖眼邊開。司空常見風流慣。輸與山翁醉玉摧。

又（紹興己未歸休後賦）

露下風前處處幽。官黃如染翠如流。誰將天上蟾宮樹，散作人間水國秋。香郁郁，思悠悠。幾年魂夢繞江頭。今朝得到薌林醉，白髮相看萬事休。

又

（舊史載白樂天歸洛陽得楊常侍舊第有林泉之致占一都之勝薌林居士卜築清江乃楊遵道光祿故居也昔文安先生之所可而竹木池館亦甚似之其子孫與西蘇山茲從遊所謂百花洲者因東坡而得名嘗爲絕句以紀其事復戲廣其聲爲是詞云）

莫問清陽與洛陽。山林總是一般香。兩家地占西南勝，可是前人例姓楊。石作枕，醉爲鄉。藕花菱角滿池塘。雖無中島霓裳奏，獨鷓隨人意自長。

又

（有懷京師上元與韓叔夏司諫王夏卿侍郎曹仲聲少卿同賦）

紫禁煙花一萬里。鰲山宮闕隱晴空。玉皇端拱彤雲上，人物嬉遊陸海中。星轉斗，駕回龍。五侯池館醉春風。而今白髮三千丈，愁對寒燈數點紅。

又（戲韓叔夏）

只有梅花似玉容。雲窗月戶幾尊同。見來照眼明如水，欲去愁眉淡遠峯。山萬疊，水千重。一雙蝴蝶夢能通。都將淚作梅黃雨，盡把情爲柳絮風。

又（老妻生日）

玉篆題名在九天。而今且作地行仙。挂冠神武歸休後。同醉薌林是幾年。
龜游泳。鶴踟躕。疎梅修竹兩清妍。欲知福壽都多少。阜閣清江可比肩。

又（詠紅梅）

江北江南雪未消。此花獨步百花饒。青枝可愛難爲杏。綠葉初無不是桃。
多態度。足風標。蕊珠仙子醉紅潮。絕憐野外橫斜處。似與薌林慰寂寥。

又（紹興壬戌中秋前數夕與楊謹仲魯子明劉曼客及子駒兄弟待月新橋）

駕月新成碧玉梁。青天萬里瀉銀潢。廣寒宮裏無雙樹。無熱池邊不盡香。
承露液。釀秋光。直須一舉累千觴。不知世路風波惡。何似薌林氣味長。

又（紹興戊辰歲閏中秋）

明月光中與客期。一年秋半兩圓時。姮娥得意爲長計。織女歡盟可恨遲。
瞻玉兔。倒瓊彝。追懷往事記新詞。浩歌且入滄浪去。醉裏歸來凝不知。

又（曾端伯使君自虔守移帥荆南作是詞戲之）

贛上人人說故侯。從來文采更風流。題詩漫道三千號。別酒須拚一百籌。
乘畫鷁。衣輕裘。又將春色過荊州。合江繞岸垂楊柳。總學歌眉葉葉愁。

減字木蘭花（紹興辛未冬溫臘前梅花已謝去明日立春今夕大雪程德遠弟來自龍舒張琦言寄聲相

問有懷其人。

青松翠篠。一夜欹傾如醉倒。殘臘能佳。落盡梅花見雪花。詩涯酒島。何日登臨同笑傲。未老還家。飽歷年華有鬢華。

又（紹興壬申春鄞林瑞香盛開賦此詞是年三月十有六日辛亥公下世此詞公之絕華也）

斜紅疊翠。何許花神來獻瑞。粲粲裳衣。割得天孫錦一機。真香妙質。不耐世間風與日。著意遮圍。莫放春光造次歸。

阮郎歸（紹興乙卯大雪行鄱陽道中）

江南江北雪漫漫。遙知易水寒。同雲深處望三關。斷腸山又山。天可老。海能翻。消除此恨難。頻聞遣使問平安。幾時變轍還。

秦樓月

芳菲歇。故園目斷傷心切。傷心切。無邊煙水。無窮山色。可堪更近乾龍節。眼中淚盡空啼血。空啼血。子規聲外。曉風殘月。

少年遊（別韓叔夏）

去年同醉酴醿下。儘筆賦新詞。今年君去。酴醿欲破。誰與醉爲期。舊曲重歌傾別酒。風露泣花枝。章水能長。湘水遠。流不盡。兩相思。

西江月（番禺趙立之郡王席上）

風響蕉林似雨。燭生粉豔如花。客星乘興泛仙槎。誤到支機石下。歡喜地中取醉。溫柔鄉裏。爲家暖紅香霧鬧春華。不道風波可怕。

又（吳穆仲與法喜以禪悅爲樂。寄倡酬醉蓬萊。示薌林居士。有見處卽已無心卽了之句。戲作是詞答之。）

見處莫教甚著。無心慎勿沈空。本無背面與初終。說了還同說夢。欲識薌林居士。真成漁父。家風收絲乘釣月明中。總是神通妙用。

又（紹興丁巳秋。徧走湖東諸郡。遂作天台雁宕之遊。政黃柑江鱸時。足慰平生。時拜詔書薌林之賜。因成長短句。寄朱子發范元長陳去非翰林三學士。以資玉堂中一笑。）

得意穿雲度水。及時斫玉分金。茲游了却未來心。怪我歸遲一任。居士何如學士。翰林休笑。薌林個中真味少知音。不是清狂太甚。

又（政和年間。卜築宛邱。手植衆薌。自號薌林居士。建炎初。解六路漕事。中原傲擾。故廬不得返。卜居清江之五

柳坊。紹興癸丑。罷帥南海。卽棄官不仕。乙卯起。以九江郡得轉漕江東。入爲戶部侍郎。辭榮辟謫。出守姑蘇。到郡。少日。請又力焉。詔可。且賜舟曰泛宅。送之以歸。己未暮春。復遂舊隱。時仲舅李公休亦辭春陵郡守致仕。喜賦是詞。）

五柳坊中煙綠。百花洲上雲紅。蕭蕭白髮兩衰翁。不與時人同夢。拋擲麟符虎節。徜徉月下。林風世間萬事轉頭空。個裏如如不動。

又（山谷作醑醑詩極工。所謂露濕何郎試湯餅。日烘荷令炷爐香。取古人語以況此花。稱爲著題。余三十年前與晁之道猷端叔諸公。醉皇遠院東武襄家。醑醑甚盛。各賦長短句。獨記余浣溪沙一首云。翠羽衣裳白玉人。不將朱粉汗天真。清風爲伴月爲隣。枕上解隨良夜夢。壺中別是一家春。同心小綰更尖新。真成夢事。此花不殊。而心情老懶。無復當時矣。勉強作是詞云。）

紅褪小園桃杏。綠生芳草池塘。誰教芍藥殿春光。兀似醑醑官樣。翠蓋更蒙珠幘。熏爐膽熨沈香。娟娟風露滿衣裳。獨步瑤臺月上。

又（老妻生日。因取薤林中所產異物。作是詞以侑觴。）

幾見芙蓉並蒂。忽生三秀靈芝。千年老樹出孫枝。巖桂秋來滿地。白鶴雲間翔舞。綠龜葉上遊戲。齊眉偕老更何疑。個裏自非塵世。

南鄉子（大雪韓叔夏坐中）

梅與雪爭姝。試問春風管得無。除卻個人多樣態。誰如。細把冰姿比玉膚。一面倒金壺。既醉仍煩翠袖扶。同向凌風臺上看。何如。且與薤林作畫圖。

浣溪沙（寶林山聞建蘭）

綠玉叢中紫玉條。幽花疎淡更香饒。不將朱粉汗高標。空谷佳人宜結伴。貴游公子不能招。小窗相對誦離騷。

又（漁父詞。張志和之兄松巖所作也。有招玄真子歸隱之意。居士爲姑蘇郡守。浩然有歸志。因廣其聲。爲浣溪

沙示姑蘇諸友

樂在烟波釣是閒。草堂松桂已勝攀。梢梢新月幾回灣。
一碧太湖三萬頃。屹然相對洞庭山。
狂風浪起且須還。

又（戲呈牧庵舅）

進步須於百尺竿。二邊休立莫中安。要知玄露沒多般。
花影鏡中拈不起。蟾光空裏撮應難。
道人無事更參看。

又（荆公除日詩云。爆竹聲中一歲除。東風送暖入屠蘇。千門萬戶曈曈日。爭把新桃換舊符。東坡詩云。老去怕

看新曆日。退歸擬學舊桃符。古今絕唱也。呂居仁詩有畫角聲中一歲除。平明更飲屠蘇酒之句。政用以爲故事耳。薊林退居之十年。戲集兩公詩。輒以鄙意足成浣溪沙。自書以遺靈照。

爆竹聲中一歲除。東風送暖入屠蘇。曈曈曉色上林廬。
老去怕看新曆日。退歸擬學舊桃符。
青春不染白髭鬚。

又（巖桂花開。不數日謝去。每恨不能挽留。近得爐熏。頗耐久。）

醉裏驚從月窟來。睡餘如夢蕊宮回。碧雲時度小崔嵬。
疑是海山憐我老。不論時節遣花開。
從今休數返魂梅。

又（曾端伯和）

別樣清芬撲鼻來。秋香過後卻追回。博山輕霧鎖崔嵬。珍重香林一抹手。不教一日不花開。暗中錯認是江梅。(首二句或刻聽罷霓裳夢覺來。天香留得袖中回。)

又(老妻生日)

星斗昭回自一天。疎梅池畔鬪清妍。蟠桃正熟藕如船。葉上靈龜來瑞世。林間白鶴舞胎仙。春秋不記幾千年。

又(堂前巖桂犯雪開數枝。色如杏黃。適當老妻生朝。作以此侑觴。)

瑞氣氤氳拂水來。金幢玉節下瑤臺。江梅巖桂一時開。不盡秋香凝燕寢。無邊春色上尊鼻。臨風嗅蕊共徘徊。

又(和曾吉甫韻。呈宋景晉待制。宋有二小姬。小桃小蘭。)

綠繞紅圍宋玉牆。幽蘭林下正芬芳。桃花氣暖玉生香。誰道廣平心似鐵。豔妝高韻兩難忘。蘇州老矣不能狂。

又(再用韻。寄曾吉甫運使。)

靄靄停雲覆短牆。天天臨水自然芳。猗猗無處著清香。珍重蔦山溪句好。尊前頻舉不相忘。濠梁夢蝶儘春狂。

又(簡王景源元渤伯仲)

南國風煙深更深。清江相接是廬陵。甘棠兩地綠成陰。九日黃花兄弟會。中秋明月故人心。悲歡離合古猶今。

又（紹興辛未中秋。王景源使君乘流下簫灘。捨舟從陸。薊林老人以長短句贈行。）

尊俎風流意氣傾。一杯相屬忍催行。離歌更作斷腸聲。滾滾大江前後浪。娟娟明月短長亭。水程山驛總關情。

生查子

（紹興戊午。姑蘇郡齊懷歸賦。）

天上得靈根。不是凡花數。清似水沈香。色染薔薇露。薊林月冷時。玉筍雲深處。歸夢托秋風。夜夜江頭路。

又（與客醉巖桂下。落蕊忽墮酒杯中。）

月姊倚秋風。香度青林杪。吹墮酒杯中。笑靨撩人小。薊林萬事休。獨此情未了。醉裏又題詩。不覺花前老。

臨江仙

（紹興庚申。老妻生日。幼女靈照生於是歲。女子亦有弄璋之喜。）

新月低垂簾額。小梅半出檐牙。高堂開燕靜無譁。麟孫鳳女。學語正咿啞。寶鼎騰熏沈水瓊。彝爛醉流霞。薊林同老此生涯。一川風露。總道是仙家。

七娘子

山圍水繞高堂路。恨密雲不下陽臺雨。霧閣雲窗風亭月戶。分明攜手同行處。而今不見生塵步。但長江無語東流去。滿地落花漫天飛絮。誰知總是離愁緒。

減字本蘭花

維摩住處。竟日繽紛花似雨。更有難忘。十里青芳撲鼻香。當年疏傅。借問賜金那用許。何似歸艤。寶墨光芒萬丈長。

又

年年巖桂。恰恰中秋供我醉。今日重陽。百樹猶無一樹香。且傾白酒。賴有茱萸枝在手。可是清甘。繞徧東籬摘未堪。

清平樂

(薊林之居巖桂爲最。比得公是先生清平樂詞云。小山叢桂。最有留人意。拂葉攀花無限思。露濕漉漉香滿袂。別來過了秋光。翠簾昨夜新霜。多少月宮閒地。姮娥與措餘芳。因賦一首。)

幽花無外。心與薊林會。綠髮相看今老矣。不作淺俗氣味。露葉薺薺生光。風梢泛泛飄香。稱意中秋開了。餘情猶及重陽。

又 (韓叔夏)

秋光如水。釀作鵝黃蟻。散入千巖桂樹裏。惟許脩門人醉。輕鈿重上風鬟。不禁月冷霜寒。步障深沈歸去。依然愁滿空山。

又（巖桂盛開。戲呈韓叔夏司諫。）

吳頭楚尾。踏破芒屨底。萬壑千巖秋色裏。不耐惱人風味。而今老我薜林。世間百不關心。獨喜愛香韓壽。能來同醉花陰。

又（奉酬韓叔夜。）

薄情風雨。斷送花何許。一夜清香無覓處。卻返雲窗月戶。醉鄉麴米爲春。荊州富貴中人。肯入薜林淨社。玉山屬倒芳茵。

又（贈韓叔夏。）

銀鉤蠶尾。一似鍾繇字。吏部文章鱗角起。自是瑞人驚世。西垣准擬揮毫。不須苦續離騷。政看翻階紅藥。無忘叢桂香醪。

又（答桂趙彥正使君。）

人間塵外。一種寒香蕊。疑是月娥天上醉。戲把黃雲按碎。使君坐嘯清江。騰芳飛譽無雙。興寄小山叢桂。詩成斐几明窗。

又（鄭長卿資政惠以龍焙絕品。予方釀薜林春色。恨不得持去。戲有此贈。）

薜林春色。杯面雲腴白。醉裏不知天地窄。真是人間歡伯。風流玉友爭妍。酪奴可與忘年。空誦少陵佳句。飲中誰是俱仙。

更漏子（雪中韓叔夏席上）

小窗前。疏影下。鸞鏡弄妝初罷。梅似雪。雪如人。都無一點塵。暮江寒。人響絕。更著朦朧微月。山似玉。玉如君。相看一笑溫。

點絳脣（薊林老人紹興甲寅中秋與二三禪子對月寶林山中戲作長短句俗呼點絳脣）

綠水青山一輪明月林梢過。有誰同坐。妙德毗盧我。石女高歌古調無人。和還知麼。更沒別個。且莫分疏破。

又（代淨兪老）

此夜中秋不向光影門前過。披衣得坐。無佛兪生我。口鼓打皮。借問今幾和。還知麼。就中兩個鼻孔誰穿破。

又（代香巖榮老）

不昧本來太虛明月流輝過。同行獨坐。高下多由我。玉軫無絃。誰對秋風和。還知麼。老龐一個識得機關破。

又（代栖隱墨老）

折脚鐺中二時粥飯隨緣過。東行西坐。不識而今我。壞盡田園。終日且婆和。還知麼。錐也無個時露衣衫破。

又(後自和)

不挂一裘。世間萬事如風過。忘緣兀坐。皮袋非真我。個千古撲不破。

隨色摩尼。朱碧如何和。還知麼。從來只

又(別代淨允)

荆棘林中。浪夸好手曾穿過。不起千坐。逼塞虛空我。個些子平窺破。

問路臺山。婆子隨聲和。還知麼。石橋老

又(別代香嚴)

春浪桃花。禹門三尺平跳過。死生不坐。變化須歸我。個塊土何曾破。

山起南雲。北雨聲相和。還知麼。點點真

又(別代栖隱)

脫落皮膚。故人南岳峯前過。只知閒坐。千聖難窺我。個莫觸清光破。

明月澄潭。誰唱復誰和。還知麼。錦鱗沒

又(別自和)

綠水池塘。笑看野鴨雙飛過。正當呆坐。紐鼻須還我。個不免須明破。

晝日張弓。許久無人和。還知麼。難得全

又（世傳水月觀音詞徐師川惡其鄙俗戲作一首）

冰雪肌膚靚妝喜作梅花面寄情高遠不與凡情染
玉立峯前閒把經珠轉秋風便霧收雲
捲水月光中見

又（重九戲用東坡先生韻）

無熱池南歲寒亭上開新宴青山芳甸盡入真如觀
舉首高歌人在秋天半晴空遠寒江影
亂何處飛來雁

又

病臥秋風懶尋杯中追歡宴夢遊都甸不改當年觀
故舊彫零天下今無半煙塵遠淚珠零
亂怕問隨陽雁

又

今日重陽強按青蕊聊開宴我家畿甸試上連輝觀
憶著酺池古塔煙霄半愁心遠情隨雲
亂腸斷江城雁

又

（重陽後數日菊墩始有花與諸友再登賦第四首）

莫問重陽黃花滿地須遊宴休論夷甸且作江山觀
百歲光陰屈指今過半霜天晚眼昏花
亂不見書空雁

又（王景源使君寵示巖桂長短句擬和一首）

春蕙秋蘭斷崖空谷終難近。何如逸韻十里香成陣。傾蓋論交白首情無盡。因君問新聲玉振。更覺花清潤。

又（再賦示王景源使君）

璧月光輝萬山不隔蟾宮樹。金風玉露水國秋無數。老子情鍾欲向香中住。君王訴龍鸞飛舞。送到歸休處。

又（再次王景源使君韻賦第三首）

明月山頭古香吹墮青林底。世情無味伴我千巖裏。詩老風流也向花留意。歌新擬調高難比。半坐分君醉。

採桑子（鄒林爲牧庵舅作）

霜鬢七十期同老。雲水之鄉。總挂冠裳。閒裏光陰一倍長。況逢口噤籬籬邊笑。風露中香。報冷秋光。自有仙人九醞觴。

一落索

春風吹斷前山雨。行雲歸去。朝來須信本無心。回首了無尋處。欲問個中去路。阿誰能語。澄江霽月卻深知。把此意都分付。

如夢令

（予以巖桂爲爐熏。雜以龍麝。以謂未盡其妙。有一道人授取桂花真水之法。乃神仙術也。其香著人。不減名曰薝林秋露。李長吉詩亦云。山頭老桂吹古香。戲作二闕。以貽好事者。）

欲問薝林秋露。來自廣寒深處。海上說薔薇。何似桂花風度。高古高古。不著世間塵汙。

又

誰識薝林秋露。勝卻諸天花雨。休更覓曹溪。自有個中去路。參取參取。滴滴要知落處。

卜算子

臨鏡笑春風。生怕梅花妬。疑是西湖處士家。疎影橫斜處。江靜竹娟娟。綠繞青無數。獨許幽人仔細看。全勝牆東路。

又

（中秋欲雨還晴。惠刀寺江月亭用東坡先生韻。示諸禪老。寄徐師川樞密。）

雨意挾風回。月色兼天靜。心與秋空一樣清。萬象森如影。何處一聲鐘。令我發深省。獨立滄浪忘卻歸。不覺霜華冷。

又

（重陽後數日。辟亂行雙源山間。見菊花。復用前韻。時以九江郡懸辭未報。）

時菊碎榛薪。地僻柴門靜。誰道村中好客稀。明月和清影。天地一蘧廬。夢事慵思省。若個知余懶。是真心已如灰冷。

又

（督戰淝水。再用前韻。第三首。示青草堂。）

鞦韆擾擾中。本體元來靜。一段澄明絕點埃。世事如泡影。歇卽是菩提。此語須三省。古道無人著脚行。禾黍秋風冷。

又（復自和賦第四首）

千古一靈根。本妙無明淨。道個如如已是差。莫認風旛影。枯木夜堂深。默坐時觀省。月落烏雞出戶飛。萬里關河冷。

三字令

春盡日。雨餘時。紅簌簌。綠漪漪。花滿地。水平池。煙光裏。雲影上。畫船移。文鴛並。白鷗飛。歌韻響。酒行遲。將我意。入新詩。春欲去。留且住。莫教歸。

長相思（紹興戊辰閏中秋）

年重月。月重光。萬瓦千林白似霜。扁舟入醉鄉。山蒼蒼。水茫茫。嚴瀨當時不是狂。高風引興長。

南歌子

柳眼風前動。梅心雪後寒。年光渾似霧中看。報答風光無處可爲歡。一曲聊收淚。三杯強自寬。新愁不耐上眉端。怕見長安歸路懶凭闌。

減字木蘭花

無窮白水。無限菱荷紅翠裏。幾點青山。半在雲煙曉靄間。移舟橫截。臥看碧天流素月。此意虛徐。好把薌林入畫圖。

南歌子

江左稱巖桂。吳中說木犀。水沈爲骨鬱金衣。卻恨疎梅惱我得青遲。葉借山光潤。花蒙水色奇。年年勾引賦新詩。應笑薌林冷淡獨心知。

又（紹興辛酉病起）

病著連三月。誰能慰老夫。蕭蕭短髮不勝梳。風裏支離欲倒要人扶。秋月明如水。巖花忽起予。旋菑白酒入盤盃。報答風光不醉更何如。

又（韓公圭近有提舉廣東市舶之命假道清江執別年餘忽爾相逢喜甚因賦是詞云）

我入三摩地。人疑小有天。君王送老白雲邊。不用丹青圖畫上凌煙。喜攬澄清轡。能同載酒船。相逢忽漫別經年。好是兩身強健在尊前。

桂殿秋

秋色裏。月明中。紅旌翠節下蓬宮。蟠桃已結瑤池露。桂子初開玉殿風。

朝中措（王景源使君生日坐上偶作）

滿城臘雪淨無埃。觸處是花開。天上瓊林珠樹。誰知夜半移來。黃堂薦壽。請君著意。和氣潛

回。化作一江春酒。都將注入尊罍。

菩薩蠻

天仙醉把真珠擲。荷翻瀉入琉璃碧。雨過酒尊涼。紅蕖冉冉香。飛來雙白鷺。屢作傲傲舞。山鳥起清歌。晚來情更多。

好事近

(紹興辛未病起見梅)
多病臥江干。過盡春花秋葉。又見橫斜疎影。弄階前明月。呼兒取酒據胡牀。尙喜知時節。宜與老夫情厚。有鬢邊殘雪。(又云折得一枝清瘦入鬢邊殘雪)

又

(用前韻答鄧端友使君)
風勁入平林。掃盡一川黃葉。唯有長松千丈。挂娟娟霜月。使君和氣動江城。疑是芳菲節。忽到小園遊戲。見南枝如雪。

減字木蘭花

(登望韶亭)
兩峯對起。象闕端門。雲霧裏。千嶂排空。虎節龍旂。指顧中。簫韶妙曲。我試與聽音韻足。借問誰傳。松上清風石上泉。

又

翠鬢雙小。綠綺朱絃。心未了。畫戟森閒。玉子紋揪手共談。不妨扶老。未說他年無限笑。且要

忘憂莫問今朝勝幾籌。

又（梅花盛開走筆戲呈韓叔夏）

臘前雪裏幾處梅梢初破蕊。年晚江邊是處花開晚更妍。難忘宋玉牆頭婉婉香。

絕知春意不耐愁。何心與醉更有

又（韓叔夏席上戲作）

誰知瑩徹惟有碧天雲外月。一見風流洗盡胸中萬斛愁。橫陳全是巫山一段雲。

臙燒蚤炬只恐夜深花睡去。想得

又

千山萬水望極不知何處是小院迴廊夢去相尋未覺長。分攜雨後梨花曉尙啼。

絕憐清瘦雪裏梅梢春未透。常記

又

去年端午共結綵絲長命縷。今日重陽同泛黃花九醞觴。逢迎休覓空青眼自明。

經時離缺不爲萊菔髭似雪。一笑

酒邊詞卷上終

宋六十名家圖



酒邊詞卷下

江北舊詞

滿庭芳

（政和癸巳滁陽作其年京師大雪）

天宇長閒。飛仙狂醉。按雲碎玉沈空。謝家庭院。爭道絮因風。不怕寒生寶粟。深洞護犀幕重重。瑤林裏。疎梅獻笑。小萼露輕紅。瑞龍香繞處。雲間絃管。塵外簾櫳。須爛醉煙霞。莫許千鍾。聞道蟠桃正好。蓬瀛路消息潛通。飛瓊伴。偷將春色。分付入芳容。

水調歌頭（趙伯山席上見梅）

天公深藏巧。雪裏放春回。不到閒花凡草。都付與疎梅。獨立水邊林下。蕭蕭冰容孤豔。清瘦玉腰肢。觸撥暗香動。風味欲愁誰。姮娥攜青女。過夜闌時。瑤冠瓊佩。粲然一笑亦何奇。賸欲舉觴對飲。不怕月明霜重。寒氣著人衣。只恐鄰笛起。化作玉塵飛。

梅花引（戲代李師明作）

花如頰。梅如葉。小時笑弄階前月。最盈盈。最惺惺。閒愁未識。無計定深情。十年空省春風面。花落花開不相見。要相逢。得相逢。須信靈犀中自有心通。

又（向與前闕合作一闕非）

同杯勺。同斟酌。千愁一醉都推却。花陰邊。柳陰邊。幾回擬待。偷憐不成憐。傷春玉瘦慵梳掠。拋擲琵琶閒處著。莫猜疑。莫嫌遲。鴛鴦翡翠。終是一雙飛。

殢人嬌（錢卿席上贈侍人輕輕）

白似雪花柔於柳絮。蝴蝶兒鎮長一處。春風點蕩。驀然吹去。口得遊絲半空惹住。波上精神。掌中態度。分明是彩雲團做。當年飛燕。從今不數。只恐是高唐夢中神女。

玉樓春（宛邱行口之園見梅對雪）

記得江城春意動。兩行疎梅龍腦凍。佳人不用辟寒犀。踏雪穿花雲鬢重。眞珠旋滴留人共。更爇沈香暖金鳳。只今梅雪可憐時。都似綠窗前日夢。

又（與何文縝倪巨濟王元衷蘇叔黨宴張子實家侍人賀全眞妙絕一時）

雲窗霧閣春風透。蝶繞蜂圍花氣漏。惱人風味恰如梅。倚醉腰肢全是柳。細傳一曲情偏厚。淡掃兩山緣底皺。歸時好月已沈空。只有眞香猶滿袖。

鷓鴣天（與師川同過葉夢授家）

小院深明別有天花。能笑語柳能眠。雪肌得酒於中暖。蓮步凌波分外妍。釵燕重。髻荷偏。兩山斜疊翠聯娟。朝雲無限飄春態。暮雨情知更可憐。

又（宣和乙亥代人贈別）

斗帳歡盟不計年。誰知驀地遠如天。何曾一霎離心上。怎得而今在眼前。魚不斷。雁相連。可無小字寄芳牋。薄情已是拋人去。更與新愁到酒邊。

又(同前)

說著分飛百種猜。泥人細數幾時回。風流可慣曾孤冷。懷抱如何得好開。垂玉筍。下香階。並肩小語更兜鞵。再三莫遣歸期誤。第一頻教入夢來。

又

淺淺妝成淡淡梅。見梅憶著傍妝臺。書無鴻雁如何寄。腸斷催歸作麼回。千種恨。百般猜。爲伊懷抱幾時開。可堪江上風頭惡。不放朝雲入夢來。

又

幾處鞦韆懶未收。花梢柳外出纖柔。霞衣輕舉疑奔月。寶髻欹傾若墜樓。爭縹緲。鬪風流。蜂兒蛺蝶共嬉遊。朝朝暮暮春風裏。落盡梨花未肯休。

踏莎行(政和丙申九江道中)

靄靄朝雲。飄春態度。楚中夢斷尋無路。欲將尊酒遣新愁。誰知引到愁深處。不盡江山。無邊細雨。只疑都把愁來做。西山總不解遮闌。隨春直過東湖去。

鵲橋仙

合卺風流。擘釵情態。壓倒癡牛駃女。今年雲外果深期。想卻笑人間離苦。縈愁疊恨。青山綠水。杳杳重重無數。尋常猶有夢能來。到此夜無尋夢處。

虞美人（政和丁酉下雋翹漢作）

濛濛煙樹無重數。不礙相思路。晚雲分外欲增愁。更那堪疎疎雨送歸舟。雨來還被風吹去。隕淚多如雨。擬題雙葉問離憂。怎得水隨人意肯西流。

又（春恨）

去年不到瓊花底。蝶夢空相倚。今年特地趁花來。因甚不教同醉過花開。花知此恨年年有。閒伴人春瘦。一枝和淚寄春風。應把舊愁新怨入眉峯。

又（宣和辛丑）

去年雪滿長安樹。望斷揚州路。今年看雪在揚州。人在蓬萊深處若爲愁。而今不恨伊相誤。自恨來何暮。平山堂下舊嬉遊。只有舞春楊柳似風流。

又

綺窗人似鶯藏柳。巧語春心透。聲聲清切入人深。一夜不知兩鬢雪霜侵。何時月下歌金縷。醉看行雲住。懶將幽恨寄瑤琴。卻倩金籠鸚鵡遞芳音。

更漏子

（題趙伯山青白軒時王豐父劉長因同賦）

竹孤青。梅醜白。更著使君清絕。梅似竹。竹如君。須知德有隣。月同高。風同調。月底風前一笑。翻碎影。度浮香。與人風味長。

又

鵲橋邊。牛渚上。翠節紅旌相向。承玉露。御金風。年年歲歲同。懶飛梭。停弄杼。遙想綵雲深處。人咫尺。似關山。無聊獨倚闌。

鵲橋仙 (七夕)

澄江如練。遠山橫翠。一段風煙如畫。層樓傑閣倚晴空。疑便是支機石下。寶奩瓊鑑。淡勻輕掃。纖手弄妝初罷。擬將心事問天公。與牛女平分今夜。

南歌子 (代張仲宗賦)

碧落飛明鏡。晴煙幕遠山。扁舟夜下廣陵灘。照我白蘋紅蓼一杯殘。初望同盟飲。如何兩處看。遙知香霧溼雲鬢。凭暖瓊樓十二玉闌干。

鵲橋仙

飛雲多態。涼颺微度。都到酒邊歌處。冰肌玉骨照人寒。更做弄一簾風雨。同槃風味。合歡情思。不管星娥猜妬。桃花溪水接銀河。與占斷鵲橋歸路。

南歌子 (郭小娘道裝)

縹渺雲間質。輕盈波上身。瑤林玉樹出風塵。不是野花凡草等閒春。翠羽雙垂珥。烏紗巧製巾。經珠不動兩眉顰。須信鉛華銷盡見天真。

又

梁苑千花亂。情隄一水長。眼前風物總悲涼。何況眉頭心上不相忘。因夢聊攜手。憑書續斷腸。已驚蝴蝶過東牆。更被風吹鴻雁不成行。

卜算子

（東坡先生嘗作卜算子山谷老人見之云類不食煙火人語蕭林往歲見梅追和一首終恨有兒女

子態耳）

竹裏一枝梅。雨洗娟娟靜。疑是佳人日暮來。綽約風前影。新恨有誰知。往事何堪省。夢繞陽臺寂寞回。沾袖餘香冷。

菩薩蠻

鴛鴦翡翠同心侶。驚風不動雙飛去。春水綠西池。重期相見時。長憐心共語。夢裏池邊路。相見不如新。花應解笑人。

又（政和雨中）

娟娟明月如霜白。鼇山可是蓬山隔。恨不及春風。行雲處處同。暖香紅霧裏。一笑誰新喜。知得遠愁無。春衫有淚珠。

又

襖兒窄。翦鞦兒小。紋鴛並影。雙雙好。微步巧。藏人輕飛洛浦塵。前回深處見。欲近還相遠。心事不能知。教人直是疑。

南歌子

雨過林巒靜。風迴池閣涼。窺人雙燕語雕梁。笑看小荷翻處戲鴛鴦。共飲菖蒲細。同分綵線長。今朝真不負風光。絕勝幾年飛夢繞高唐。

減字木蘭花

幾年不見。蝴蝶枕中魂夢遠。一日相逢。鸚鵡杯深笑靨濃。歡心未已。流水落花愁又起。離恨如何。細雨斜風晚更多。

秦樓月

蟲聲切。柔腸欲斷傷離別。傷離別。幾行清淚。界殘紅頰。玉階白露侵羅襪。下簾卻望玲瓏月。玲瓏月。寒光零亂。照人愁絕。

生查子(與王豐父鄭曼卿兄弟嵩山道中)

月在兩山間。人在空明裏。山色碧於天。月色光於水。心閒物物幽。心動塵塵起。莫向動中來。長願閒如此。

又

春心如杜鵑。日夜思歸切。啼盡一川花。愁落千山月。遙憐白玉人。翠被餘香歇。可慣獨眠寒。減動豐肌雪。

又

近似月當懷。遠似花藏霧。好是月明時。同醉花深處。看花不自持。對月空相顧。願學月頻圓。莫化花飛去。

又

春山和恨長。秋水無言度。脈脈復盈盈。幾點梨花雨。深深一段愁。寂寂無行路。推去又還來。沒個遮闌處。

又（贈陳宋鄰）

娟娟月入眉。整整雲歸鬢。鏡裏弄妝遲。簾外花移影。斜窺秋水長。軟語春鶯近。無計奈情何。只有相思分。

又

相思懶下牀。春夢迷蝴蝶。入柳又穿花。去去輕如葉。可堪岐路長。不道關山隔。無賴是黃鸝。喚起空愁絕。

望江南 (八月十四日爲壽近有弄璋之慶)

微雨過。庭院靜無塵。天上秋期明日是。人間月影十分清。真不負佳辰。稱壽處。香霧繞花身。玉兔已成千歲藥。桂花更與一枝新。喜氣滿重闈。

浣溪沙

冰雪肌膚不受塵。臉桃眉柳已生春。手搓梅子笑迎人。欲語又休無限思。暫來還去不勝顰。夢隨蝴蝶過東隣。

西江月

微步凌波塵起。弄妝滿鏡花開。春心擲處眼頻來。秀色著人無耐。舊事如風無迹。新愁似水難裁。相思日夜夢陽臺。減盡沈郎衣帶。

點絳脣 (南昌送范師)

丹鳳飛來。細傳日下絲綸語。使君歸去。已近沙隄路。風葉露花。秋意濃如許。江天暮。離歌輕舉。愁滿西山雨。

醜奴兒 (宣和辛丑)

無雙亭下瓊花樹。玉骨雲腴。傾國稱姝。除卻揚州是處無。天教紅藥來驂乘。桃李先驅。總作花奴。翠擁紅遮到玉都。

如夢令

午夜涼生翠幔。廉外行雲撩亂。可恨白蘋風。欲雨又還吹散。腸斷。腸斷。楚夢驚殘一半。

好事近 (中秋前一日爲壽)

小雨度微雲。快樂一天新碧。恰到中秋佳處。是芳年華日。冰輪莫做九分看。天意在今夕。先占廣寒風露。怕姮娥偏得。

又 (懷安郡王席上)

初上舞裊時。爭看襪羅弓窄。恰似晚霞零亂。襯一鉤新月。折旋多態小腰身。分明是回雪。生怕因風飛去。放眞珠簾隔。

採桑子

人如濯濯春楊柳。徹骨風流。脫體溫柔。牽繫多情儘未休。最憐恰恰新眠起。雲雨初收。斜倚瓊樓。葉葉眉心一樣愁。

清平樂 (寄邵子非諸友)

雲無天淨。明月端如鏡。烏鵲繞枝栖未穩。零露垂垂珠隕。扁舟共絕湖河。秋風別去如梭。今夜淒然對影。與誰斟酌姮娥。

浣溪沙

花想儀容柳想腰。融融曳曳一團嬌。綺羅叢裏最妖嬈。歌罷碧天雲影亂。舞時紅袖雪花飄。幾回相見爲魂消。

又（趙總憐以扇頭來乞詞。戲有此贈。趙能棋分茶寫字彈琴。）

豔趙傾燕花裏仙。烏絲闌寫永和年。有時閒弄醒心絃。茗盃分雲微醉後。紋楸斜倚髻鬟偏。風流模樣總堪憐。

又（王稱心效顰亦有是請。）

曾是襄王夢裏仙。嬌癡恰恰破瓜年。芳心已解品朱絃。淺淺笑時雙靨媚。盈盈立處綠雲偏。稱人心事儘人憐。

又

一夜涼颺動碧幙。曉庭飛雨濺眞珠。玉人睡起倚金鋪。雲髻作堆初未整。柳腰如醉不勝扶。天仙風調世間無。

又（政和壬辰正月。豫章龜潭作。時徐師川洪駒父汪彥章攜酒來作別。）

璧月光中玉漏清。小梅疎影水邊明。似梅人醉月西傾。梅欲黃時朝暮雨。月重圓處短長亭。舊愁新恨若爲情。

又（連年二月二日出都門）

人意天公則甚知。故教小雨作深悲。桃花渾似淚胭脂。
經行處處是相思。理棹又從今日去。斷腸還似去年時。

又（政和癸巳儀真東園作）

花樣風流柳樣嬌。雪中微步遇溪橋。心期春色到梅梢。
折得一枝歸綠鬢。冰容玉豔不相饒。
索人同去醉金蕉。

又

守得梅開著意看。春風幾醉玉闌干。去時猶自惜餘歡。
雨後重來花掃地。葉間青子已團團。
憑誰寄與蹙眉山。

又（醉醺和狄端叔韻贈陳宋鄰）

翡翠衣裳白玉人。不將朱粉汗天真。清風爲伴月爲隣。
枕上解隨良夜夢。壺中別是一家春。
同心小綰更尖新。

又

兩點春山入翠眉。一縞楊柳作腰肢。語音嬌軟帶兒癡。
猶省當來求識面。隔溪清唱倒瓊彝。
真成相見說當時。

又

姑射肌膚雪一團。摻摻玉手弄冰紈。著人情思幾多般。水上月如天樣遠。眼前花似鏡中看。見時容易近時難。

又

雲外遙山似翠眉。風前楊柳入腰肢。凌波微步襪塵飛。倚醉傳歌留客處。佯嗔不語殢人時。風流態度百般宜。

又（許南叔席上）

百斛明珠得翠娥。風流徹骨更能歌。碧雲留住勸金荷。取醉歸來因一笑。惱人深處是橫波。酒醒情味却知麼。

相見歡

亭亭秋水芙蓉翠。團中又是一年風露。笑相逢。天機畔。雲錦亂。思無窮。路隔銀河猶解嫁。西風。

又

桃源深閉春風信。難通流水落花餘。恨幾時窮。水無定。花有盡。會相逢。可是人生長在別離中。

又

宋六十名家詞

廊。腰肢一縷纖長。是垂楊。泥泥風中衣袖。冷沈香。花如頰。眉如葉。語如簧。微笑微顰。相惱。過迴



酒邊詞跋

伯恭相家子。欽聖憲肅皇后從姪也。性極孝友。置義莊。贍宗族貧者。其立朝忠節。胡安國張九成輩極嘉與之。晚忤秦檜意。乃致仕。卜築清江楊遵道故第。竹木池館。占一郡之勝。又繞屋手植巖桂。顏其堂曰薌林。自詠云。須知道天教尤物。相伴老江鄉。又絕筆云。真香妙質。不耐世間風與日。豈米顛所謂衆香國中來。衆香國中去。薌林亦庶幾耶。湖南毛晉識。

宋六十一名家圖



溪堂詞一卷

謝逸

題溪堂詞

謝無逸臨川進士。自號溪堂。學古高傑。文辭煨煉。篇篇有古意。而尤工於詩詞。黃山谷嘗讀其詩云。晁張流也。恨未識面耳。其詩曰。山寒石髮瘦。水落溪毛彫。又曰。老鳳垂頭噤不語。枯木槎牙噪春鳥。其詞曰。黛淺眉痕沁。紅添酒面潮。又曰。魚躍冰池飛玉尺。雲橫石嶺拂蛟綃。皆百鍊乃出冶者。晁張又將避三舍矣。漫叟題。

溪堂詞

目錄

如夢令二調
採桑子三調
卜算子一調
清平樂二調
柳梢青一調
南歌子一調
鷓鴣天四調
虞美人三調
踏莎行一調
七娘子一調
江神子二調

點絳脣二調
菩薩蠻二調
謁金門一調
醉桃源三調
西江月九調
望江南二調
玉樓春四調
南鄉子一調
蝶戀花一調
漁家傲一調
千歲秋一調

浣溪沙二調
減字木蘭花一調
好事近一調
武陵春二調
燕歸梁一調
浪淘沙一調
鵲橋仙一調
醉落魄一調
臨江仙二調
青玉案一調
鷓山溪一調

宋六十名家詞

溪堂詞目錄終



溪堂詞

宋謝逸

如夢令(或刻周美成)

花落鶯啼春暮。陌上綠楊飛絮。金鴨晚香寒。人在洞房深處。無語。無語。葉上數聲疎雨。

又

門外落花流水。日暖杜鵑聲碎。蕃馬小屏風。一枕畫堂春睡。如醉。如醉。正是困人天氣。

點絳脣(或刻張子野○碧影涵雲巘作玉立峨峰遠)

九日登高倚樓人在秋空半。汝江如練。碧影涵雲巘。醉看茱萸。定是明年健。清尊滿。菊花黃淺。偏入陶潛眼。

又

金氣秋分。風清露冷。秋期半。涼蟾光滿。桂子飄香遠。素練寬衣。仙仗明飛觀。霓裳亂。銀橋人散。吹徹昭華管。

浣溪沙

樓閣簾垂乳燕飛。圓荷細細點清溪。薰風破悶晚涼時。玉軫琴邊蘭思遠。霜紈扇裏翠眉低。柔藍衫子鬪峯兒。

又
暖日溫風破淺寒。短青無數簇幽蘭。三年春在病中看。中酒心情長似夢。探花時候不曾閑。故園芳信隔秦關。

採桑子

楚山削玉雲中碧。影落沙汀。秋水澄凝。一抹江天雁字橫。金錢滿地西風急。紅蓼煙輕。簾外砧聲。驚起青樓夢不成。

又

冰霜林裏爭先發。獨壓羣花。風送清笳。更引輕相淡淡遮。抱牆溪水彎環碧。月色清華。疎影橫斜。恰似林逋處士家。

又

冷猿寒雁淮山遠。風裊青帘。飛雪廉纖。莫道空中是撒鹽。到時乳鵲喧梧影。曉捲疎簾。彩服巡簷。索共梅花笑語添。

菩薩蠻

暄風遲日春光鬧。蒲萄水綠搖輕棹。兩岸草煙低。青山啼子規。歸來愁未寢。黛淺眉痕沁。花影轉廊腰。紅添酒面潮。

又

縠紋波面浮瀾。蒲芽出水參差碧。滿院落梅香。柳梢初弄黃。衣輕紅袖皺。春困花枝瘦。睡起玉釵橫。隔簾聞曉鶯。

減字木蘭花(七夕)

荷花風細。乞巧樓中涼似水。天幕低垂。新月彎環淺暈眉。橋橫烏鵲。不負年年雲外約。殘漏疎鐘。腸斷朝霞一縷紅。

又

疎疎密密。簷蔔林中飛六出。妬舞欺梅。悠颺隨風去卻回。遙岑玉列。不見雲中浮寸碧。夜色清妍。庭下交光月午天。

卜算子

煙雨幕橫塘。紺色涵清淺。誰把并州快剪刀。翦取吳江半。隱几岸烏巾。細葛含風軟。不見柴桑避俗翁。心共孤雲遠。

謁金門

簾外雨。洗盡楚鄉殘暑。白露影邊霞一縷。紺碧江天暮。沈水煙橫香霧。茗椀淺浮瓊乳。臥聽鷓鴣啼竹塢。竹風青院宇。

好事近

疎雨洗煙波。雨過滿江秋色。風起白鷗零亂。破嵐光深碧。
荻花楓葉只供愁。清吟寫岑寂。吟罷倚闌無語。聽一聲羌笛。

清平樂

曉風殘角。月裏梅花落。宿雨醒時滋味惡。翠被輕寒漠漠。
夢回一點相思。遠山暗蹙雙眉。不覺肌膚瘦玉。但知帶減腰圍。

又（春情）

花邊柳際。已漸知春意。歸信不知何日是。舊恨欲拚無計。
故人零落西東。題詩待倩歸鴻。惟有多情芳草。年年處處相逢。

醉桃源

花枝破蕾柳梢青。春寒拂面輕。一眉新月影三星。銅荷燭燼零。
低鳳扇。裊霓旌。珊珊環珮聲。坐間誰識許飛瓊。對郎仙骨清。

又

風飄萬點落花飛。殘紅枝上稀。平蕪葉上淡煙迷。那堪春鳥啼。
風細細。日遲遲。輕紗疊雪衣。多情多病懶追隨。玉人應恨伊。

又(雪)

晨光曉色掃簷晶。寒口蝶夢驚。亂飄鴛瓦，細無聲。遊颺柳絲輕。
書幌冷。竹窗明。柴門只獨扃。
一尊濁酒爲誰傾。梅花相對清。

武陵春(茶)

畫燭籠紗紅影亂。門外紫騮嘶。分破雲團月影虧。雪浪皺清漪。
捧盃纖纖春筍瘦。乳霧泛冰
簷。兩袖清風拂袖飛。歸去酒醒時。

又(送任民望歸豐城)

拍岸蒲萄江水碧。柳帶挽歸艎。破悶琴風繞袖涼。藪藪棟花香。
淡煙疎雨隨宜好。何處不瀟
湘。願作雙飛老鳳凰。莫學野鴛鴦。

柳梢青(離別○時刻不載)

香肩輕拍。尊前忍聽。一聲將息。昨夜濃歡。今朝別酒。明日行客。
後回來則須來。便去也如何
去得。無限離情。無窮江水。無邊山色。

西江月

落窶寒香滿院。扶疎清影侵門。雪消平野晚煙昏。睡起懶勻檀粉。
皎皎風前玉樹。盈盈月下
冰魂。南枝春信夜來溫。便覺肌膚瘦損。

又

花額上堆翠葆。遠山橫處星眸。絳宮深鎖暮雲浮。月破黃昏時候。誰謂霞衣玉簡，便孤彩鳳。秦樓桃源不禁，昔人遊。曾是劉郎邂逅。

又（陳倅席上）

窄袖淺籠溫玉。修眉淡掃遙岑。行時雲霧繞衣襟。步步蓮生宮錦。菊與秋煙共晚。酒隨人意。俱深。尊前有客動琴心。醉後清狂不禁。

又（箏）

寶柱橫雲雁影。朱絃隔葉鶯聲。風生玉指曉寒清。官樣輕黃袖冷。飲罷尙留餘意。曲終自有。深情。歸來江上數峯青。梅小橫斜夜永。

又（代人上許守生日）

滴滴金盤露冷。蕭蕭玉宇風清。長庚入夢曉窗明。淡月微雲耿耿。松竹五峯秋色。笙歌三市。歡聲。華堂開宴擁娉婷。天上人間共慶。

又（送朱泚英）

青錦纏枝佩劍。紫絲絡轡飛驄。入關意氣喜生風。年少胸吞雲夢。香紅爭看荀氏第三龍。春暖桃花浪湧。金闕日高露泣。東華塵輓。

又(木芙蓉)

曉豔最便清露。晚紅偏怯斜陽。移根栽近菊花旁。蜀錦翻成新樣。坐客聯揮玉麈。歌詞細琢瓊章。從今故事記溪堂。歲歲攜壺共賞。

又

木末誰攀新萼。雪消自種前庭。莫嫌開過尙盈盈。似待詩人醉咏。霜後最添妍麗。風中更覺娉婷。影搖溪水一灣清。妝罷曉臨鸞鏡。

又

密雪未知膚白。夜寒已覺香清。振芳堂下月盈庭。踏碎橫斜疎影。且醉杯中綠蟻。休辭笛裏清聲。東君催促子青青。滋味要調金鼎。

燕歸梁

六曲闌干翠幕垂。香燼冷金猊。日高花外嘯黃鸝。春睡覺酒醒時。草青南浦。雲橫西塞。錦字杳無期。東風只送柳綿飛。全不管寄相思。

南歌子(春夜)

雨洗溪光淨。風掀柳帶斜。畫樓朱戶玉人家。簾外一眉新月。浸梨花。金鴨香凝袖。銅荷燭映紗。鳳盤宮錦小屏遮。夜靜寒生春筍。理琵琶。

望江南

臨川好。柳岸轉平沙。門外澄江丞相宅。壇前喬木列仙家。春到滿城花。行樂處。舞袖捲輕紗。漫摘青梅嘗煮酒。旋煎白雪試新茶。明月上簷牙。

又

臨川好。山影碧波搖。魚躍冰池飛玉尺。雲橫石嶺拂蛟綃。高樹竹蕭蕭。寒食近。湖水綠平橋。繁杏梢頭張錦旆。垂楊陰裏繫蘭橈。遊客解金貂。

浪淘沙(上元)

料峭小桃風。凝淡春容。寶燈山列半天中。麗服靚妝攜手處。笑語匆匆。酒滴小槽紅。一飲千鍾。銅荷擎燭絳紗籠。歸去笙歌喧院落。月照簾籠。

鷓鴣天

桐葉成陰拂畫簷。清風涼處捲疎簾。紅綃舞袖縈腰柳。碧玉眉峯媚臉蓮。愁滿眼。水連天。香箋小字倩誰傳。梅黃楚岸垂垂雨。草碧吳江淡淡煙。

又

金節平分院落涼。黃昏簾幕捲西廂。冰輪碾破粼粼碧。玉斧修成練練光。低照戶。巧侵牀。錦袍起舞謫仙狂。鵲飛影裏觥籌亂。桂子風前笑語香。

又

紅暈香腮粉未勻。梳妝閒淡穩精神。誰知碧嶂清溪畔。也有姚家一朵春。眉黛淺。為誰顰。莫將心事付朝雲。坐中有客腸應斷。忘了醪醖架下人。

又

水闊天低雁字橫。小春時節晚寒清。梅梢月上紛紛白。竹塢風來冉冉輕。人似玉。酒如澆。入關意氣喜風生。坐中有客聯鑣去。誰唱陽關第四聲。

玉樓春(寒食)

弄晴數點梨梢雨。門外畫橋寒食路。杜鵑飛破草間煙。蛺蝶惹殘花底霧。東君著意憐樊素。一段韶華天付與。妝成不管露桃嗔。舞罷從教風柳妬。

又(王守生日)

橫塘暈淺琉璃瑩。綠葉陰濃庭院靜。櫻桃熟後麥秋涼。芍藥開時槐夏永。蓬萊閣下紅塵境。青羽扇底搖鳳影。庭前玉樹一枝春。香霧和煙新月冷。

又

個中懷抱誰排遣。惻惻輕寒風翦翦。細香梅蕊晚香濃。爭似柳梢春色淺。嬌叱道字歌聲軟。醉後微渦回笑靨。更無卓氏白頭吟。只有盧郎年少恨。

又(王守生日)

青錢點水圓荷綠。解籜新篁森嫩玉。輕風冉冉揀花香。小雨絲絲梅子熟。華堂燭燼零金粟。人在洞天三十六。昭華吹徹筦聲寒。聲入壽觴紅浪蹙。

鵲橋仙

蝶飛煙草鶯啼雲樹。滿院垂楊陰綠。輕風飄散杏梢紅。更吹皺池波如縠。珠簾日晚。銀屏人散。樓上醉橫霜竹。一春若道不相思。緣底事紅綃褪玉。

虞美人

碧梧翠竹交加影。角簟紗幮冷。疎雲淡月媚橫塘。一陣荷花風起隔簾香。雁橫天末無消息。水闊吳山碧。刺桐花上蝶翩翩。唯有夜深清夢到郎邊。

又

角聲吹散梅梢雪。疎影黃昏月。落英點點拂闌干。風送清香滿院作輕寒。花鬢羯鼓催行酒。紅袖摻摻手。曲聲未徹寶杯空。飲罷香熏翠被錦屏中。

又

風前玉樹瑒金韻。碧落佳期近。疎雲影裏鵲橋低。簷外一彎新月印修眉。星河漸曉銅壺噎。又是經年別。此情莫與玉人知。引起舊家離恨淚珠垂。

南鄉子(美人)

淺色染春衣。衣上雙雙小雁飛。袖捲藕絲寒玉瘦。彈棋。贏得尊前酒一卮。冰雪拂臙脂。絳蠟香融落日西。唱徹陽關人欲去。依依。醉眼橫波翠黛低。

醉落魄

霜砌聲急。瀟瀟疎雨梧桐溼。無言獨倚闌干立。簾捲黃昏。一陣西風入。年時畫閣佳賓集。玉人檀板當筵執。銀瓶已斷絲繩汲。莫話前歡。忍對屏山泣。

踏莎行(春思)

柳絮風輕。梨花雨細。春陰院落簾垂地。碧溪影裏小橋橫。青帘市上孤煙起。鏡約關情。琴心破睡。輕寒漠漠侵鴛被。酒醒霞散臉邊紅。夢回山蹙眉間翠。

蝶戀花(春景○草堂作鳳棲梧)

豆蔻梢頭春色淺。新試紗衣。拂袖東風軟。紅日三竿簾幕捲。畫樓影裏雙飛燕。攏鬢步搖青玉碾。缺樣花枝。葉葉蜂兒顫。獨倚闌干凝望遠。一川煙草平如翦。

臨江仙(重九)

木落江寒秋色晚。颼颼吹帽風清。丹楓樓外搗衣聲。登高懷遠。山影雁邊橫。露染宮黃庭菊淺。茱萸煙拂紅輕。尊前誰整醉冠傾。酒香熏臉。落日斷霞明。

又
玉樹臨風賓欲散。黃昏約馬嘶庭。幽歡未盡有餘清。瓊糜方一啜。銀燭已雙擎。坐久香津生齒頰。何須五斗消醒。豔歌聲裏醉魂醒。明年思此會。旌旆想登瀛。

七娘子

風翦冰花飛零亂。映梅梢素影搖清淺。繡幄寒輕。蘭熏煙暖。豔歌催得金荷捲。游梁已覺相如倦。憶去年舟渡淮南岸。別後銷魂。冷猿寒雁。角聲只送黃昏怨。

漁家傲(漁父)

秋水無痕清見底。蓼花汀上西風起。一葉小舟煙霧裏。蘭棹艤。柳條帶雨穿雙鯉。自嘆直鉤無處使。笛聲吹徹雲山翠。鱸落霜刀紅縷細。新酒美。醉來獨枕莎衣睡。

青玉案

蘆花飄雪迷洲渚。送秋水連天去。一葉小舟橫別浦。數聲鴻雁。兩行鷗鷺。天淡瀟湘暮。蓬窗醉夢驚簫鼓。回首青樓在何處。柳岸風輕吹殘暑。菊開青蕊。葉飛紅樹。江上瀟瀟雨。

江神子(別情)

一江秋水碧灣灣。繞青山。玉連環。簾幕低垂。人在畫圖間。閒抱琵琶尋舊曲。彈未了。意闌珊。飛鴻數點拂雲端。倚闌看。楚天寒。擬倩東風。吹夢到長安。恰似梨花春帶雨。愁滿眼。淚闌干。

又（春思）

杏花村館酒旗風。水溶溶。颺殘紅。野渡舟橫，楊柳綠陰濃。望斷江南山色遠，人不見，草連空。夕陽樓外晚煙籠。粉香融。淡眉峯。記得年時，相見畫屏中。只有關山今夜月，千里外，素光同。

千秋歲（夏景）

揀花飄砌。蔌蔌清香細。梅雨過。蘋風起。情隨湘水遠。夢繞吳峯翠。琴書倦。鷓鴣喚起南窗睡。密意無人寄。幽恨憑誰洗。修竹畔。疎簾裏。歌餘塵拂扇。舞罷風掀袂。人散後。一鉤淡月天如水。

驀山溪（月夜）

霜清木落。深院簾櫳靜。池面捲煙波。瑩香水一匳明鏡。修筠拂檻。疎翠挽嬋娟。山霧斂。水雲收。野闊江天迥。紅消醉玉。酒面風前醒。羅幕護輕寒。錦屏空。金爐燼冷。星橫參昴。梅徑月黃昏。清夢覺。淺眉顰。窗外橫斜影。

宋六十名家詞



溪堂詞終

一四

溪堂詞跋

時本溪堂詞卷首蝶戀花以迄禪尾望江南共六十有三闋皆小令輕倩可人中間字句舛繆無從攷索既獲溪堂全集末載樂府一卷今依其章次就梓近來吳門抄本多花心動一闋其詞云風裏楊花輕薄性銀燭高燒心熱香餌懸鉤魚不輕吞辜負釣兒虛設桑蠶到老絲長絆針刺眼淚流成血思量起拈枝花朶果兒難結海樣情深忍撇似夢裏相逢不勝歡悅出水雙蓮摘取一枝可惜並頭分拆猛期月滿會姮娥誰知是初生新月折翼鳥甚是於飛時節疑是麝筆不敢溷入附記以俟識者湖南毛晉識

宋六十名家詞



樵隱詞一卷

毛升

題樵隱詞

樵隱詩餘一卷。信安毛平仲所作也。平仲爲人傲世自高。與時多忤。獨與錫山尤。遂初厚善。臨終以書別之。囑以志墓。遂初旣爲墓誌銘。又序其集。或病其詩文視樂府頗不逮。其然豈其然乎。乾道柔兆閏茂陽月永嘉王木叔題。

樵隱詞

目錄

賀新郎一調
水龍吟一調
燕山亭一調
滿江紅三調
蝶戀花一調
浪淘沙一調
畫堂春一調
謁金門二調

風流子一調
瑞鶴仙一調
水調歌頭五調
江城子二調
醉落魄一調
眼兒媚一調
應天長令一調
點絳脣一調

薄倖一調
念奴嬌八調
滿庭芳三調
漁家傲二調
玉樓春二調
秋蕊香一調
好事近一調

宋六十名家詞



蘇軾詩集

樵隱詞

宋毛 升

賀新郎

風雨連朝夕。最驚心春光碗晚。又過寒食。落盡一番新桃李。芳草南園似積。但燕子歸來幽寂。况是單棲饒惆悵。儘無聊有夢寒猶力。春意遠。恨虛擲。東君自是人間客。暫時來匆匆却去。爲誰留得。走馬插花當年事。池碗空餘舊跡。奈老去流光堪惜。杳隔天涯人千里。念無憑寄長相憶。回首處。暮雲碧。

風流子

新禽初弄舌。東郊外。催爾踏青期。漸晴灩翠漪。惠風駘蕩。暖蒸紅霧。淑景輝遲。粉牆外杏花無限。笑楊柳不勝垂。閒裏歲華。但驚蕭索。老來心賞。尤惜芳菲。平生歌酒地。空回首。惆悵觸緒沾衣。誰見素琴翻恨。青鏡留悲。念千里雲遙。暮天長短。十年人杳。流水東西。惟有寄情芳草。依舊萋萋。

薄倖

柳橋南畔。駐驄馬。尋春幾徧。自見了生塵羅襪。爾許嬌波流盼。爲感郎松柏深心。西陵已約平生願。記別袖頻招。斜門相送。小立釵橫鬢亂。恨暗寫如蠶紙。空目斷高城人遠。奈當時消息。

黃姑織女。又成王謝堂前燕。託琴心怨。怕嬌雲弱雨。東風幕地。輕吹散。傷春病也。狼籍飛花滿院。

水龍吟（登吳江橋作）

渺然震澤東來。太湖望極。平無際。三吳風月。一江煙浪。古今絕致。羽化蓬萊。胸吞雲夢。不妨如此。看垂虹千丈。斜陽萬頃。盡倒影。青匳裏。追想扁舟去後。對汀洲白蘋風起。只今誰會。水光山色。依然西子。安得超然相從。物外此生終矣。念素心空在。徂年易失。淚如鉛水。

瑞鶴仙

柳風清晝溽。山櫻晚。一樹高紅爭熟。輕紗睡初足。悄無人。欹枕虛檐鳴玉。南園秉燭。歎流光容易過目。送春歸。去有無數。弄禽滿徑。新竹閒記。追歡尋勝。杏棟西廂。粉牆南曲。別長會促。成何計。奈幽獨。縱湘絃難寄。韓香終在。屏山蝶夢。斷續對沿階。細草萋萋。爲誰自綠。

念奴嬌（陪張子公登覽輝亭）

層闌飛棟。壓孤城。臨瞰并吞空闊。千古吳京佳麗地。一覽江山奇絕。天際歸舟。雲中行樹。鷺點汀洲雪。三山無際。渺然相望。溟渤鳳玄遺響。悲涼故臺。今不見。蒼煙蕪沒。千騎重來。初起廢。緬想六朝人物。峴首他年。羊公終在。笑幾人磨滅。一時尊俎。且須同賦風月。

又

少年奇志笑功名。畫虎文章刻鵠。永夜漫漫悲晝短。難挽蒼龍銜燭。飛藿飄零。浮雲遷變。過眼
郵傳速。昔人真意渺然。千載誰屬。猶喜二子當年。諸公籍甚。賞雲和孤竹。翰墨流傳知幾許。
遺響宮商相續。夢裏京華。不須驚嘆。春草年年綠。赤霄歸去。更看奔電歎玉。

又（暮秋登石橋追和視子權韻）

十年湖海歎潘郎。憔悴無心雲閣。強起登臨驚暮序。目極清霜搖落。散髮層阿。振衣千仞。浩蕩
窮林壑。沈寥無際。鏡天收盡雲脚。長嘯聲落悲風。想滄洲萬里。當年歸約。回首區中無限事。
此意誰同商略。欲駕飛鴻。翩然獨往。汗漫期相諾。滯留防事。坐令雙鬢如鵲。

又（次韻施德初席上）

麗譙春晚望東南。千里湖山佳色。畫戟門前清似水。時節初過燈夕。封井年登。京華日近。每報
平安驛。滿城花柳。正須千騎尋覓。憶我年少追遊。叨兔園客右。多慚英識。今日懷人無限意。
老淚尊前重滴。賦詠空傳。雄豪誰在。鬢點吳霜白。招呼一醉。幸公時慰愁寂。

又（追和張巨山牡丹詞）

倚風含露似輕顰。微笑盈盈脈脈。染素勻紅知費盡。多少東君心力。國豔酣晴。天香融暖。畫手
爭傳得。綠窗朱戶。曉妝誰見凝寂。獨占三月芳菲。千花百卉。算難爭春色。欲寄朝雲無限意。
回首京塵猶隔。舞破霓裳。一枝渾似。醉倚香亭北。舊懽如夢。老懷那更追惜。

又(題曾氏溪堂)

王孫老去。算無地傾倒。胸中豪逸。小築三間便席卷。多少江山風月。萬壑回流。千峯輸秀。人境成三絕。登臨佳處。鳥飛不盡空闊。追念輞水斜川。有風流千載。淵明摩詰。何必斯人聊一笑。俯仰今猶前日。只恐東州。催成棠蔭。又作三年別。賞心難繼。莫教辜負華髮。

又(記夢)

阿環家住。閬風頂。絳闕瑤臺相接。翳鳳乘鸞。人不見。隱隱霓裳雲袂。秀骨貞風。長眉翠淺。映白咽紅頰。非煙深處。渺然雲浪千疊。一笑徐福扁舟。春風空老盡。當時童妾。骨冷魂清。驚夢到。同看碧桃千葉。寄語青童。何時丹就。爲我留瓊笈。天鷄催曉。却愁吹墮塵劫。

又(中秋夕)

素秋新霽。風露洗。寥廓珠宮瓊闕。簾幕生寒。人未定。鵲羽驚飛林樾。河漢無聲。微雲收盡。相映寒光發。三千銀界。一時無此奇絕。正是老子南樓。多情辜負了。十分佳節。起舞徘徊。誰爲我。傾倒杯中明月。欲攬嫦娥。扁舟滄海。戲濯淩波襪。漏殘鐘斷。坐愁人世超忽。

燕山亭(勅任求睡紅亭爲賦)

暖靄輝遲。雨過夜來。簾外春風徐轉。霞散錦舒。密映窺亭亭。萬枝開徧。一笑嫣然。猶記有畫圖曾見。無伴。初睡起。昭陽弄妝日晚。長是相趁佳期。有尋舊流鶯。貪新雙燕。惆悵共誰。細繞花

陰空懷紫簫淒怨。銀燭光中。且更待夜深重看。留戀愁酒醒緋千片。

水調歌頭（次韻陸務觀陪太守方務德登多景樓）

襟帶大江左。平望見三州。鑿空遺跡千古。奇勝米公樓。太守中朝耆舊。別乘當今豪逸。人物眇應劉。此地一尊酒。歌吹擁貔貅。楚山曉。淮月夜。海門秋。登臨無盡須信。詩眼不供愁。恨我相望千里。空想一時高唱。零落幾人收。妙賞頻回首。誰復繼風流。

又（上元羣集）

春意滿南國。花動雪明樓。千坊萬井此時。燈火隘追遊。十里寒星相照。一輪明月斜掛。縹緲映紅毬。共嬉不禁夜。光彩徧飛浮。豔神仙。轟鼓吹。引鰲頭。文章太守此時。賓從敵應劉。回首昇平舊事。未減當年風月。一醉爲君酬。明日朝天去。空復想風流。

又（和人新堂）

小築百年計。雅志幾人成。亂山深處烟雨。面面對縈青。巾屨方安吾土。花木仍供眞賞。隣有阮嵇生。歲月拋身外。塵事更無營。鳥知歸。雲出岫。兩忘情。從渠華屋回首。烟草弔頽傾。何似生涯纔足。欹枕南窗北牖。醉夢落樵聲。更喜濯纓處。門外一江清。

又（送周元特）

漢代李元禮。江左管夷吾。英姿雅望凜凜。玉立冠中都。礪礪胸中千丈。不肯低回青禁。引去臥

江湖更學鴟夷子。一舸下東吳。送公別。杯酒盡。少躊躇。舊棠陰下幾人。臨路擁行車。歸近雲天尺五。夢想經綸賢業。談笑取單于。爲問茗溪水。留得此翁無。

又（次劉若訥韻）

十載劉夫子。名過庾蘭成。人人爭看角犀。今喜試豐盈。傾耳新詩千首。妙處端須擊節。金石破蟲聲。此士難復得。黃口鬧如羹。憶年少。游俠窟。戲荆卿。結交投分馳心。千里劇搖旌。我老公方豪健。儻許相從晚歲。忼慨激中情。洗眼功名會。一箭取遼城。

滿庭芳（自宛陵易倅東易留別諸同寮）

世事難窮。人生無定。偶然蓬轉萍浮。爲誰教我。從宦到東州。還似翩翩海燕。乘春至。歸及涼秋。回頭笑。渾家數口。又泛五湖舟。悠悠當此去。黃童白叟。莫漫相留。但谿山好處。深負重游。珍重諸公送我。臨岐淚欲語。先流。應須記。從今風月。相憶在南樓。

又

五十年來。追思疇昔。佳時去若雲浮。依然重見。感涕話西州。幸喜靈光不改。空自笑。蒲柳先秋。成何事。風波末路。險畏有沈舟。別愁都幾許。相從未數。我去公留。况狂直平生。誰念遨遊。月夕風天正好。還驚悵失此詩流。江南岸。明朝更遠。回首仲宣樓。

又（行次四安。用前韻寄章叔通沈無愆）

獲落難容。崎嶇堪笑。一年陸走川浮。又攜妻子。兩度過神州。紫蟹鱸魚正美。涼天氣恰傍中秋。今宵意。無人伴我。快瀉玉雙舟。功名聊爾耳。千金聘楚。萬戶封留。又爭如物外。閒曠優游。好在東阡北陌。相從有諸老風流。家山近。歸休去也。不上望京樓。

滿江紅（送施德初）

東馬嚴徐。名籍甚。西京人物。誰不羨。伏蒲忠鯁。演綸詞筆。雅意中朝。今小試。二年東郡。弦風跡。數中興。循吏兩三人。公居一。溫詔趣還丹闕。傾容相。方前席。看雲臺登踐。論思密勿。超覽堂中遺愛在。幾人同戀津亭別。顧倦游。雲路僕登仙。心如失。

又（懷家山作）

回首吾廬。思歸去。石谿樵谷。臨翫有門前流水。亂松疏竹。幽草春餘荒井徑。鳴禽日在窺牆屋。但等閒。凭几看南山。雲相逐。家釀美。招鄰曲。朝飯飽。隨耕牧。况東臯二頃。歲時都足。麟閣功名身外事。牆陰不駐流光促。更休論。一枕夢中驚。黃梁熟。

又

潑火初收。鞦韆外。輕煙漠漠。春漸遠。綠楊芳草。燕飛池閣。已著單衣寒食後。夜來還是東風惡。對空山。寂寂杜鵑啼。梨花落。傷別恨。閒情作。十載事。驚如昨。向花前月下。共誰行樂。飛蓋低迷南苑路。湔裙悵望東城約。但老來。憔悴惜春心。年年覺。

江城子（和德初燈夕詞次葉石林韻）

神仙樓觀梵王宮。月當中。望難窮。坐聽三通。譙鼓報籠銅。還憶當年京輦舊。車馬會。五門東。華堂歌舞間笙鐘。夕香濛。度花風。翠袖傳杯。爭勸紫髯翁。歸去不堪春夢斷。烟雨曉。亂山重。

又

倚牆高樹落驚禽。小窗深。夜沈沈。酒醒燈昏。人靜更愁霖。惆悵行雲留不住。攜手處。却分襟。悠悠風月兩關心。擁孤衾。恨難禁。何況一春。憔悴到如今。最苦清宵無寐極。想見夢也難尋。

漁家傲

極目丹楓迎霽曉。山明水淨新霜早。燕去鴻歸無事了。天渺渺。風吹平野低寒草。漸過初冬時節好。尋梅踏雪城南道。追憶舊遊人已老。懽更少。孤懷擬共誰傾倒。

又（次丹陽憶故人）

楊子津頭風色暮。孤舟渺渺江南去。憶得佳人臨別處。愁返顧。青山幾點斜陽樹。可忍歸期無定據。天涯已聽邊鴻度。昨夜鄉心留不住。無驛數。夢中行了來時路。

蝶戀花

羅襪匆匆曾一過。烏鴉歸來。怨感流年度。別袖空看啼粉汗。相思待倩誰分付。殘雪江村迴馬路。嫋嫋春寒。簾晚空凝佇。人在梅花深處住。梅花落盡愁無數。

醉落魄（梅）

暮寒淒冽。春風探繞南枝發。更無人處增清絕。冷蕊孤香。竹外朦朧月。西洲昨夢憑誰說。攀翻剩憶經年別。新愁悵望催華髮。雀啀江頭。一樹垂垂雪。

玉樓春

日長澹澹光風轉。小尾黃蜂隨早燕。行尋香徑不逢人。惟有落紅千萬片。酒成憔悴花成怨。閒殺羽觴難會面。可堪春事已無多。新筍遮牆苔滿院。

又

（來如春夢幾多時。去似朝雲無覓處。是歐陽永叔現成對子。平仲向稱詞家能品。亦肯襲人耶。）

曲房小院匆匆過。急鼓疏鐘催又去。來如春夢幾多時。去似潮雲無覓處。金瓶落井翻相誤。可惜馨香隨手故。錦囊空有斷腸書。彩筆不傳長恨句。

浪淘沙

簾幕燕雙飛。春共人歸。東風惻惻雨霏霏。水滿西池花滿地。追惜芳菲。回首昔遊非。別夢依稀。一成春瘦不勝衣。無限樓前傷遠意。芳草斜暉。

眼兒媚

小溪微月淡無痕。殘雪擁孤村。攀條弄蕊。春愁相值。寂默無言。忍寒宜立何人見。應怯過黃昏。朝陽夢斷。熏殘沈水。誰爲招魂。

秋蕊香

蕩暖花風滿路。織翠柳陰和霧。曲池門草舊遊處。憶試春衫白苧。暗驚節意朱絃柱。送春去。曉來一陣掃花雨。惆悵薔薇在否。

畫堂春

華燈收盡雪初殘。踏青還爾遊盤。落梅強半已飛翻。剗地春寒。多病故人日遠。幾時雙燕來還。可憐樓上一凭闌。不見長安。

應天長令

曲闌十二閒亭沼。履迹雙沈。人悄悄。被池寒。香燼小。夢短女牆鶯喚曉。柳枝風。輕嫋嫋。門外落花多少。日日離愁縈繞。不知春過了。

好事近（次韻葉夢楊陳天子南園作）

飛蓋滿南園。想見八仙遙集。幾樹海棠開徧。正新晴天色。休辭一醉任無還。衣上酒痕濕。便恐歲華催去。聽秋蟲相泣。

謁金門

春已半。芳草池塘綠徧。山北山南花爛熳。日長蜂蝶亂。閒掩屏山六扇。夢好強教驚斷。愁對畫梁雙語燕。故心人不見。

又

傷離索。猶記並肩池閣。病起綠窗閒倚薄。一秋天氣惡。玉臂都寬金約。歌舞新來忘却。回首故人天一角。半江楓又落。

點絳脣

夜彩侵霜。蕭蕭絡緯啼金井。夢寒初警。一倍銅壺永。無限思量。展轉愁重省。熏爐冷。起來人靜。窗外梧桐影。

樵隱詞終

樵隱詞

樵隱詞跋

平仲三衢人仕止州倅禮部尙書友之子負才玩世頗有毛伯成之風撰樵隱集十五卷尤延之爲序惜乎不傳楊用修云毛拜小詞一卷惟余家有之極賞其撥火初收一闕今亦不多見余近得楊夢羽先生祕藏宋元名家詞抄本二十七種內有樵隱詩餘一卷共四十二首調名二十有三亟梓而行之庶不與集俱湮耳湖南毛晉識

竹山詞

蔣捷

題竹山詞

竹山先生出義興鉅族。宋南渡後。有名璩字宣卿者。善書。仕亦通顯。子孫俊秀。所居擅溪山之勝。故先生貌不揚。長於樂府。此稿得之於唐士牧家藏本。雖無詮次。庶幾無遺逸云。至正乙巳歲次秋七月十有七日。湖濱散人題。

竹山詞

目錄

賀新郎五調
大聖樂一調
花心動一調
畫錦堂一調
木蘭花慢二調
春夏兩相期一調
聲聲慢一調
探芳信一調
最高樓一調
解珮令一調
柳梢青一調
小重山二調
虞美人二調

沁園春二調
解連環一調
金盞子一調
水龍吟一調
珍珠簾一調
念奴嬌一調
尾犯一調
梅花引一調
祝英臺一調
一翦梅二調
阮郎歸一調
白苧一調
南鄉子二調

女冠子二調
永遇樂一調
喜遷鶯二調
瑞鶴仙四調
高陽臺三調
絳都春一調
滿江紅二調
洞仙歌二調
風入松一調
糖多令一調
金蕉葉一調
蝶戀花一調
步蟾宮二調

宋六十名家詞

玉樓春一調

燕歸梁一調

行香子一調

賀新郎三調

喜遷鶯二調

應天長一調

高陽臺一調

少年遊二調

如夢令一調

戀繡衾一調

步蟾宮一調

粉蝶兒一調

摸魚子一調

齊天樂一調

賀新郎一調

探春令一調

柳梢青一調

浪淘沙二調

南鄉子一調

翠羽吟一調

沁園春一調

念奴嬌一調

玉漏遲二調

秋夜雨四調

霜天曉角一調

竹山詞

宋 蔣 捷

賀新郎(秋曉)

渺渺啼鴉了。亘魚天、寒生峭嶼。五湖秋曉。竹几一燈人做夢。嘶馬誰行古道。起搔首、窺星多少。月有微黃籬無影。挂牽牛、數朵青花小。秋太淡、添紅棗。愁痕倚賴西風掃。被西風、翻催鬢鬢。與秋俱老。舊院隔霜簾不捲。金粉屏邊醉倒。計無此、中年懷抱。萬里江南吹簫恨。恨參差、白雁橫天杪。煙未斂、楚山杳。

又(約友三月旦飲)

雁嶼晴嵐薄。倚層屏、千樹高低。粉纖紅弱。雲隘東風藏不盡。吹豔生香萬壑。又散入汀蘅州藥。擾擾匆匆塵土面。看歌鶯、舞燕逢春樂。人共物、知誰錯。寶釵樓上圍簾幕。小嬋娟、雙調彈箏。半霄鸞鷁。我輩中人無此分。琴思詩情當卻也。勝似愁橫眉角。芳景二分才過二。便綠陰、門巷楊花落。沾斗酒、且同酌。

又(吳江)

浪湧孤亭起。是當年、蓬萊頂上。海風飄墜。帝遣江神長守護。八柱蛟龍纏尾。鬪吐出寒烟寒雨。昨夜鯨翻神軸動。卷雕翬、擲向虛空裏。但留得、絳虹住。五湖有客扁舟艤。怕羣仙、重游到此。

翠旌難駐。手拍闌干呼白鷺。爲我殷勤寄語。奈鷺也驚飛沙渚。星月一天雲萬壑。覽茫茫宇宙。知何處。鼓雙楫。浩歌去。

又（懷舊）

夢冷黃金屋。嘆秦箏斜鴻陣裏。素絃塵撲。化作嬌鶯飛歸去。猶認紗窗舊綠。正過雨。荆桃如菽。此恨難平君知否。似瓊臺湧起。彈棋局。消瘦影。嫌明燭。鴛樓醉瀉東西玉。問芳踪。何時再展。翠釵難卜。待把宮眉橫雲樣。描上生綃畫幅。怕不是新來妝束。綵扇紅牙。今都在。恨無人解聽。開元曲。空掩袖。倚寒竹。

又（兵後寓吳）

深閣簾垂繡。記家人。軟語燈邊。笑渦紅透。萬疊城頭哀怨角。吹落霜花滿袖。影嘶伴。東奔西走。望斷鄉關。知何處。羨寒鴉。到著黃昏後。一點點。歸楊柳。相看只有山如舊。嘆浮雲。本是無心。也成蒼狗。明日枯荷包冷飯。又過前頭小阜。趁未發。且嘗村酒。醉探枵囊毛錐在。問鄰翁。要寫牛經否。翁不應。但搖手。

沁園春（爲老人書南堂壁）

老子平生。辛勤幾年。始有此廬。也學那陶潛。籬栽些菊。依他杜甫。園種些蔬。除了雕梁。肯容紫燕。誰管門前長者車。怪近日。把一庭明月。卻借伊渠。鬢邊白髮紛如。又何苦。招賓納客。歎但

夏榻宵眠。面風欹枕。冬簷晝短。背日觀書。若有人尋。只教僮道。這屋主人今日居。休羨彼。有搖金寶轡。織翠華裾。

又（次強雲卿韻）

結算平生。風流債負。請一筆勾。蓋攻性之兵。花圍錦陣。毒身之鳩。笑齒歌喉。豈識吾儒。道中樂地。絕勝珠簾十里迷。樓因底。嘆晴乾不去。待雨淋頭。休休。著甚來由。硬鐵漢從來氣食牛。但只有千篇好詩好曲。都無半點閒悶閒愁。自古嬌波。溺人多矣。試問還能溺我否。高擡眼看牽絲傀儡。誰弄誰收。

女冠子（元夕）

蕙花香也。雪晴池館如畫。春風飛到。寶釵樓上。一片笙簫。琉璃光射。而今燈漫掛。不是暗塵明月。那時元夜。況年來。心嬾意怯。羞與蛾兒爭耍。江城人悄。初更打。問繁華誰解。再向天公借。剔殘紅燄。但夢裏。隱隱鈿車羅帕。吳牋銀粉。待把舊家風景。寫成閒話。笑綠鬢鄰女。綺窗猶唱。夕陽西下。

又（競渡）

電旂飛舞。雙雙還又爭渡。湘灘雲外。獨醒何在。翠藥紅蕖。芳菲如故。深衷全未語。不似素車白馬。卷潮起怒。但悄然。千載舊跡。時有閒人弔古。生平慣受椒蘭苦。甚魄沈寒浪。更被饑蛟妬。

結瓊紉璐。料貝闕隱隱騎鯨煙霧。楚妃花倚暮。玉簫吹了。沂陂同步。待月明洲渚。小留旌節。朗吟騷賦。

大聖樂（陶成之生日）

笙月涼邊。翠翹雙舞。壽仙曲破。更聽得豔拍流星。慢唱壽詞初了。羣唱蓮歌。主翁樓中披鶴氅。展一笑。微微紅透。過襟懷好。縱炎官駐繖。長是春和。千年鼻祖事業。記曾趁雷聲飛快梭。但也會三徑。撫松採菊。隨分吟哦。富貴浮雲。榮華風過。淡處還他滋味多。休辭飲。有碧荷貯酒。深似金荷。

解連環（岳園牡丹）

妬花風惡。吹青陰漲却。亂紅池閣。駐媚景。別有仙葩。徧瓊甃小臺。翠油疏箔。舊日天香。記曾繞玉奴絃索。自長安路遠。膩紫肥黃。但譜東洛。天津霽虹似昨。聽鶉聲度月。春又寥寞。散豔魄。飛入江南。轉湖渺。山茫。夢境難托。萬疊花愁。正困倚鉤闌斜角。待攜尊醉歌。醉舞勸花自落。

永遇樂（綠陰）

清逼池亭。潤浸山閣。雲氣凝聚。未有蟬前。已無蝶後。花事隨逝水。西園支徑。今朝重到。半碣醉筇吟袂。除非是鶯身瘦小。暗中引雛穿去。梅簷溜滴。風來吹斷。放得斜照。一縷玉子敲枰。香綃落翦。聲度深幾許。層層離恨。淒迷如此。點破漫煩輕絮。應難認。爭春舊館。倚紅杏處。

花心動（南塘元夕）

春入南塘。粉梅花盈盈倚風微笑。虹暈貫簾。星毯攢巷。徧地寶光交照。湧金門外樓臺影。參差浸西湖波渺。暮天遠芙蓉萬朵。是誰移到。鬢鬢雙仙未老。陪玳席佳賓。暖香雲繞。翠篋叩冰。銀管噓霜。瑞露滿鍾頻酌。醉歸深院重歌舞。瑠盤轉珍珠紅小。鳳洲柳絲絲淡煙弄曉。

金盞子（秋思）

練月縈窗。夢乍醒黃花翠竹庭館。心字夜香消。人孤另。雙鷓被他羞看。擬待告訴天公。減秋聲一半。無情雁。正用恁時飛來。叫雲尋伴。猶記杏樞暖。銀燭下纖影卸。佩鸞春過。暈紅豆小。鶯衣嫩珠痕淡。印芳汗。自從信誤青驪。想籠鶯停喚。風刀快。翦畫簷梧桐。怎翦愁斷。

喜遷鶯（暮春）

游絲纖弱。漫著意絆春。春難憑託。水暖成紋。雲晴生影。芳草漸侵裙幄。露添牡丹新豔。風擺鞦韆閑索。對此景。動高歌一曲。何妨行樂。行樂君聽取。鶯轉綠窗也似來相約。粉壁題詩。香街走馬。爭奈鬢絲輸卻。夢回晝長無事。聊倚闌干斜角。翠深處。看悠悠幾點楊花飛落。

又（改前詞）

游絲纖弱。漫著意絆春。春難憑託。水暖成紋。雲晴生影。雙燕又窺簾幕。露添牡丹新豔。風擺鞦韆閑索。對此景。動高歌一曲。何妨行樂。行樂春正好。無奈綠窗孤負。敲棋約。錦幄調笙。銀瓶

索酒爭奈也曾迷著，自從髮凋心倦，常倚釣闌斜角。翠深處，看悠悠幾點楊花飛落。

畫錦堂（荷花）

染柳煙消，敲菰雨斷，歷歷猶寄斜陽。掩冉玉妃芳袂，擁出靄塲。倩他鴛鴦來寄語，駐君舴艋亦何妨。漁榔靜，獨奏擢歌，邀妃試酌清觴。湖上雲漸暝，秋浩蕩，鮮風支盡蟬糧。贈我非環非佩，萬斛生香。半蝸茅屋歸吹影，數螺苔石壓波光。鴛鴦笑，何似且留雙楫，翠隱紅藏。

水龍吟（傲稼軒體招落梅魂）

醉兮瓊瀆浮觴些，招兮遣巫陽些。君母去此，颶風將起，天微黃些。野馬塵埃，汗君楚楚，白霓裳些。駕空兮雲浪，茫洋東下，流君往他方些。月滿兮西廂些，叫雲兮笛淒涼些。歸來兮爲我重倚蛟背，寒鱗蒼些。俯視春紅，浩然一笑，吐出香些。翠禽兮弄曉，招君未至，我心傷些。

瑞鶴仙（紅葉）

縞霜霏霽雪，漸翠設涼痕，猩浮寒血。山窗夢淒切，短吟筇猶倚，鶯邊新榭。花魂未歇，似追惜芳消豔滅。挽西風，再入柔柯，誤染紺雲成纈。休說深題錦翰，淺泛瓊漪，暗春曾泄。情條萬結，依然是未愁絕。最憐他南苑，空階堆徧，人隔仙蓬，怨別鎖芙蓉小殿。秋深碎蟲訴月。

又（鄉城見月）

紺煙迷雁迹，漸口鼓零鐘，街喧初息。風檠背寒壁，放冰蜍飛到，絲絲簾隙。瓊魂暗泣，念鄉關霜

蕪似織。漫將身化鶴來。忘却舊遊端的。懽極。蓬壺渠浸。花院梨溶。醉連春夕。柯雲罷弈。櫻桃
在。夢難覓。勸清光乍可。幽窗相伴。休照紅樓夜笛。怕人閒換譜伊涼。素蛾未識。

又（壽東軒立冬前一日）

玉霜生穗也。渺洲雲翠痕。雁繩低也。層簾四垂也。錦堂寒早近。開爐時也。香風遞也。是東籬花
深處也。料此花伴我仙翁。未肯放秋歸也。嬉也。縉波穩舫。鏡月危樓。醕瓊醢也。籠鶯睡也。紅
妝旋舞衣也。待紗燈客散。紗窗日上。便是嚴凝序也。換青毡小帳圍春。又還醉也。

又（買妾名雪香）

素肌元是雪。向雪裏帶香。更添奇絕。梅花太孤潔。問梨花何似。風標難說。長洲漾楫。料鴛邊嬌
蓉乍折。對珠籠自翦涼衣。愛把淡羅輕疊。清徹。螺心翠靨。龍吻瓊涎。總成虛設。微微醉緜。窗
燈暈。弄明滅。算銀臺高處。芳菲仙佩。步徧織雲萬葉。覺來時人在紅幃。半廊界月。

木蘭花慢（冰）

傍池闌倚徧。問山影是誰偷。但鷺斂瓊絲。鴛藏繡羽。礙浴妨浮。寒流黑衝片響。似犀椎帶月靜
敲秋。因念涼荷院宇。粉丸曾泛金甌。妝樓曉澀翠罌油。倦鬢理還休。更有何意緒。憐他半夜
餅破梅愁。紅凋淚乾萬點。待穿來寄與薄情收。只恐東風未轉。悞人日望歸舟。

又（再賦前題）

渺琉璃萬頃。冷光射夕陽洲。見敗柳漂枝，殘蘆泛葉。欲去仍留。羅幃少年夢裏，正窺簾月浸素肌柔。誰念衰翁自老，斷髭凍得成虬。凝眸一望絕飛鷗。宇宙正清幽。漫細敲紫硯，轉呵翠管，吟思難抽。颼颼晚風又起，但時聽碎玉落簷頭。多少梅花片腦，醉來誤整香篝。

珍珠簾（壽岳君選）

書樓四面筠簾捲。微熏起。翠弄懸纖絲軟。樓上讀書仙，對寶笈霏轉。繡館釵行雲度影，澹壽觥盈盈爭勸。爭勸奈芸邊事切，花中情淺。金奏未響昏蜩，早傳言放却舞衫歌扇。柳雨一窩涼，再展開湘卷。萬顆菜心瓊珠輓，細滴與銀朱小硯。深院待月滿廊腰，玉笙又遠。

高陽臺（芙蓉）

霞鑠簾珠。雲蒸篆玉。環樓婉婉飛鈴。天上王郎，颺輪此地曾停。秋香不斷臺隍遠，溢萬叢錦豔鮮明。事成塵。鸞鳳簫中空度歌聲。臞翁一點清寒性，慣殮英菊嶼。飲露蘭汀。透屋高紅。新營小樣花城。霜濃月淡三更夢，夢曼仙來倚吟屏。共襟期。不是瓊姬，不是芳卿。

又（送翠英）

燕捲晴絲。蜂黏落絮。天教綰住閒愁。閒裏清明，匆匆粉澀紅羞。燈搖縹暈茸窗冷，語未闌娥影分收。好傷情。春也難留，人也難留。芳塵滿目總悠悠。問縈縈珮響，還繞誰樓。別酒纔斟，從前心事都休。飛鶯縱有風吹轉，奈舊家苑已成秋。莫思量。楊柳灣西，且擢吟舟。

又(鬪元宵)

橋尾星沈街心塵歛。天公還把春饒。桂月黃昏。金絲柳換星搖。相逢小曲方嫌冷。便暖薰珠絡。香飄却憐他。隔歲芳期。枉費囊綃。人情終似娥兒舞。到頻翻宿粉。怎比初描。認得游蹤。花驄不住嘶驕。梅梢一寸殘紅。炬喜尙堪移。照櫻桃。醉醺醺。不記元宵。只道花朝。

春夏兩相期(壽謝令人)

聽深深謝家庭館。東風對語雙燕。似說朝來。天上婺星光現。金裁花結紫泥香。繡裏藤輿紅茵。軟散蠟宮輝。行鱗廚品。至今人羨。西湖萬柳如線。料月仙當此。小停鸞。付與長年。教見海心波淺。縈雲玉珮五侯門。洗雲華洞三春苑。慢拍調鶯。急鼓催鸞。翠陰生院。

念奴嬌(壽薛稼堂)

稼翁居士有幾多抱負。幾多聲價。玉立繡衣。霄漢表。曾覽八州風化。進退行藏。此時正要。一著高天下。黃埃撲面。不成也。控羸馬。人道雲出無心。纔離山後。豈是無心者。自古達官。酣富貴。往往遭人描畫。只有青門。種瓜閒客。千載傳佳話。稼翁一笑。吾今亦愛吾稼。

絳都春(春愁)

春愁怎畫。正鶯背帶綠。醪醑花謝。細雨院深。淡月廊斜。重簾挂。歸時記約。燒燈夜。早拆盡鞦韆。紅架。縱然歸近。風光又是。翠陰初夏。姪姪。嚙青。泣白。恨玉珮罷舞。芳塵凝榭。幾擬倩人。付與

蘭香秋羅帕。知他墮策斜。攏馬在底處垂楊樓下。無言暗擁嬌鬢。鳳釵溜也。

聲聲慢(秋聲)

黃花深巷。紅葉低窗。淒涼一片秋聲。豆雨聲來。中間夾帶風聲。疏疏二十五點。麗譙門不鎖更聲。故人遠。問誰搖玉珮。簷底鈴聲。彩角聲吹月墮。漸連營馬動。四起笳聲。閃爍鄰燈。燈前尙有砧聲。知他訴愁到曉。碎嚶嚶多少。蛩聲訴未了。把一半分與雁聲。

尾犯(寒夜)

夜倚讀書牀。敲碎唾壺。燈暈明滅。多事西風。把齋鈴頻掣。人共語溫溫。芋火雁孤飛。簫簫檢雪。徧闌干外。萬頃魚天未了。予愁絕。鷄邊長劍舞。念不到此樣豪傑。瘦骨稜稜。但淒其衾鐵。是非夢無痕。堪記似雙瞳。繽紛翠纈。浩然心在我。逢著梅花便說。

滿江紅

一掬鄉心。付杳杳露莎煙葦。來相伴。淒然客影。謝他窮鬼。新綠舊紅春又老。少玄老白人生幾。况無情。世故盪摩中。凋英偉。詞場筆行。羣蟻戰場。冑藏羣蟻。問如何。清晝倚藤凭棊。流水青山屋上下。束書壺。酒船頭尾。任垂涎。斗大印黃金。狂周顛。

又(秋旅)

秋本無愁。奈客裏秋徧岑寂。身老大。懽秦缶。懶移陶甓。萬誤曾因疏處起。一閒且向貧中覓。笑

新來多事是征鴻。聲嘹唳。雙戶掩。孤燈剔。書束架。琴懸壁。笑人間無此。小窗幽闥。浪遠微聽。葭葉響。雨殘細。數梧桐。滴正依稀。夢到故人家。誰橫笛。

探芳信(菊)

翠吟哨。似有人黃裳。孤竚埃表。漸老侵芳歲。識君恨不早。料應陶令吟魂在。凝此秋香妙。傲霜姿。尙想前身。倚窗餘傲。回首醉年少。控駿馬。蓉邊紅鞵。茸帽淡泊東籬。有誰肯。夢飛到。正襟三誦悠然句。聊遣花微笑。酒休賒。醒眼看花正好。

梅花引(荆溪阻雪○或作江城梅花引)

白鷗問我泊孤舟。是身留。是心留。心若留時。何事鎖眉頭。風拍小簾燈暈舞。對閒影。冷清清。憶舊遊。憶舊遊。舊遊今在否。花外樓。柳下舟。夢也夢也。夢不到。寒水空流。漠漠黃雲。溼透木綿裘。都道無人愁似我。今夜雪。有梅花。似我愁。

洞仙歌(對雨思友)

世間何處最難忘。杯酒唯是停雲想。親友此時無一盞。千種離愁。西風外。長伴枯荷衰柳。去年深夜語。傾倒書窗。口燭心懸小紅豆。記得到門時。雨正蕭蕭。嗟今雨。此情非舊。待與子相期。采黃花。又未卜重陽。果能晴否。

又(柳)

枝枝葉葉。受東風調弄。便是鶯穿也微動。自鵝黃千縷。數到飛綿。閒無事。誰管將春迎送。輕
柔心性在。教得遊人酒舞花吟恣狂縱。更誰家鸞鏡裏。貪學織蛾。移來傍妝樓新種。總不道江
頭鎖清愁。正雨渺煙茫。翠陰如夢。

最高樓（催春）

新春景。明媚在何時。宜早不宜遲。軟塵巷陌青油幟。重簾深院畫羅衣。要些兒。晴日照。暖風吹。
一片片雪兒休要下。一點點雨兒休要灑。纔恁地。越愆期。悠悠不趁梅花到。匆匆枉帶柳花
飛。倩黃鶯。將我話。報春歸。

祝英臺（次韻）

柳邊樓。花下館。低捲繡簾半。簾外天絲。擾擾似情亂。知他蛾綠纖眉。鵝黃小袖。在何處閒遊閒
玩。最堪嘆。箏面一寸塵深。玉柱網斜雁。譜字紅鸞。薦翦燭記同看。幾回傳語東風。將愁吹去。
怎奈向東風不管。

風入松（戲人去妾）

東風方到舊桃枝。仙夢已雲迷。畫闌紅子。檇蒲處。依然是春晝簾垂。恨殺河東獅子。驚回海底
鷗兒。尋芳少步。莫嫌遲。此去却慵移。斷腸不在分襟後。元來在襟未分時。柳岸猶攜素手。闌
房早掩朱扉。

解佩令(春)

春晴也好。春陰也好。著些兒春雨越好。春雨如絲。繡出花枝紅裊。怎禁他孟婆合皂。梅花風小。杏花風小。海棠風。驀地寒峭。歲歲春光。被二十四風吹老。棟花風爾且慢到。

一翦梅(宿龍游朱氏樓)

小巧樓臺眼界寬。朝卷簾看。暮卷簾看。故鄉一望。一心酸。雲又迷漫。水又迷漫。天不教人客夢安。昨夜春寒。今夜春寒。梨花月底兩眉攢。敲徧闌干。拍徧闌干。

又(舟過吳江)

一片春愁待酒澆。江上舟搖。樓上帘招。秋娘度與秦娘嬌。風又飄飄。雨又蕭蕭。何日歸家洗客袍。銀字笙調。心字香燒。流光容易把人拋。紅了櫻桃。綠了芭蕉。

糖多令(壽東軒)

秋碧瀉晴灣。樓臺雲影閒。記仙家元在蓬山。飛到雁峯塵更少。三萬頃。玉無邊。金醖倒垂蓮。歌搖香霧鬢。任芙蓉月轉朱闌。天氣已涼猶未冷。重九後。小春前。

柳梢青(有談舊娼潘氏)

小飲微吟。殘燈斷雨。靜戶幽窗。幾度花開。幾番花謝。又到昏黃。潘娘不是潘郎。料應也霜黏鬢旁。鸚鵡闌空。鴛鴦壺破。煙渺雲茫。

阮郎歸(客中思馬跡山)

雲飛燈背雁聲低。寒生紅被池。小屏風畔立多時。閒看番馬兒。新搵淚，舊題詩。一般羅帶垂。瓊簫夜夜挾愁吹。梅花知不知。

金蕉葉(秋夜不寐)

雲裏翠幕。滿天星碎珠迸索。孤蟾闌外照我。看看過轉角。酒醒寒砧正作。待眠來夢魂怕惡。枕屏那更畫了。平沙斷雁落。

小重山

晴浦溶溶明斷霞。樓臺搖影處。是誰家。銀紅裙襖皺宮紗。風前坐。閒鬪鬱金芽。人散樹啼鴉。粉欄黏不住。舊繁華。雙龍尾上月痕斜。而今照。冷淡白菱花。

又

曾伴芳卿鏘珮環。西風吹夢斷。墮人寰。假饒無分入雕闌。窺妝鏡。也令小溪灣。此地有誰憐。斜陽半臥處。牧童攀。勸花休苦恨天天。從來道。簿命是朱顏。

白苧

正春晴。又春冷。雲低欲落瓊苞未剖。早是東風作惡。旋安排。一雙銀蒜鎮羅幕。幽壑水生漪。皺嫩綠潛鱗初躍。悄悄門巷。桃樹紅纔約。略知甚時。霽華烘破青青萼。憶昨引蝶花邊。近來重

見身學垂楊瘦削。問小翠眉山，爲誰攢却。斜陽宇任蛛絲罥。玉箏絃索，戶外惟聞放剪刀聲。深在妝閣料想裁縫。白苧春衫簿。

蝶戀花（風蓮）

我愛荷花花最軟。錦撈雲挨。朵朵嬌如顫。一陣微風來自遠。紅低欲醮涼波淺。莫是羊家張靜婉。抱月飄煙。舞得腰肢倦。偷把翠羅香被展。無眠却又頻翻轉。

虞美人（梳樓）

絲絲楊柳絲絲雨。春在溟濛處。樓兒忒小不藏愁。幾度和雲飛去覓歸舟。天憐客子鄉關遠。借與花消遣。海棠紅近綠闌干。纔卷朱簾却又晚風寒。

又（聽雨）

少年聽雨歌樓上。紅燭昏羅帳。壯年聽雨客舟中。江闊雲低斷雁叫西風。而今聽雨僧廬下。鬢已星星也。悲歡離合總無情。一任階前點滴到天明。

南鄉子

泊雁水汀洲。冷淡滿裙水漫秋。裙上唾花無覓處。重游。隔柳惟存月半鉤。準擬架層樓。望得伊家見始休。還怕粉雲天末起。悠悠。化作相思一片愁。

又（塘門元宵）

翠幃夜游車。不到山邊與水涯。隨分紙燈三四盞。鄰家。便做元宵好景誇。誰解倚梅花。思想燈毬墜絳紗。舊說夢華猶未了。堪嗟。纔百餘年又夢華。

步蟾宮（木犀○或刻玉樓春）

綠華翦碎嬌雲瘦。賸妝點菊前蓉後。涓涓月也染成香。又何況纖羅襟袖。秋窗一夜西風驟。翠匳鎖瓊珠花鏤。人間富貴總腥羶。且和露攀花三嗅。

又（春景）

玉窗掣銷香雲漲。喚綠袖低敲方響。流蘇拂處字微訛。但斜倚紅梅一餉。濛濛月在簾衣上。做池館春陰模樣。春陰模樣不如晴。這催雪曲兒休唱。

玉樓春（桃花灣馬跡）

秦人占得桃源地。說道花深堪避世。桃花灣內豈無花。呂政馬來攔不住。明朝與子穿不去。去看霜蹄剜石處。茫茫秦事是耶非。萬一問花花解語。

戀繡衾

倩金小袖花下行。過橋亭倚樹聽鶯。被柳線低縈鬢。紺雲垂釵鳳半橫。紅薇影轉晴窗盡。樣蘭心未到繡絰。奈一點春恨在。青娥鸞處又生。

浪淘沙（夜景）

人愛曉妝鮮，我愛妝殘。翠釵扶住欲欹鬟。印了夜香無事也。月上涼天。新譜學箏難。愁湧蛾彎。一牀衾浪未紅翻。聽得人催佯不采。去洗珠鈿。

又（重九）

明露浴疏桐。秋滿簾櫳。揜琴無語意忡忡。指破東窗窺皓月。早上芙蓉。前事渺茫中。煙水孤鴻。一尊重九又成空。不解吹愁吹帽落。恨殺西風。

燕歸梁（風蓮）

我夢唐宮春晝遲。正舞到、曳裾時。翠雲隊仗絳霞衣。慢騰騰、手雙垂。忽然急鼓催將起。似綵鳳亂驚飛。夢回不見萬瓊妃。見荷花、被風吹。

步蟾宮（中秋）

去年雲掄冰輪皎。喜今歲、微陰俱掃。乾坤一斤玉琉璃。怎算得、清光多少。無歌無酒癡頑老。對愁影、番嫌分曉。天公元不負中秋。我自把、中秋誤了。

南鄉子（黃葵）

冷淡是秋花。更比秋花冷淡些。到處芙蓉供醉賞。從他。自有幽人處士誇。寂寞兩三葩。晝日無風也帶斜。一片西窗殘照裏。誰家。捲卻湘裙薄薄紗。

行香子（舟宿簡灣）

紅了櫻桃綠了芭蕉。送春歸客，尙蓬飄。昨宵穀水，今夜蘭皋。奈何雲溶溶，風淡淡，雨瀟瀟。銀字笙調，心字香燒。料芳踪乍整，還凋待將春恨，都付春潮。過窈娘隄，秋娘渡，秦娘橋。

粉蝶兒(殘春)

啼鴉聲中，春光化成春夢。問東君仗誰時送。燕憐晴，鶯愛暖，一窗芳哄。奈匆匆，催他柳綿狂縱。輕羅小扇，桐花又飛，么鳳。記寒吟沁梅霜凍。古今人易老，莫閒雙鞵。尙堪遊茶蘼粉雲香洞。

翠羽吟

紺露濃映素空樓。觀峭玲瓏。粉凍霽英，冷光搖蕩，古青松。半規黃昏淡月，梅氣山影溟濛。有麗人步依脩竹，瀟然態若游龍。綃袂微皺，水溶溶。仙莖清瀟，淨洗斜紅。勸我浮香桂酒，環珮暗解，聲飛芳靄中。弄春弱柳垂絲，慢按翠舞嬌童。醉不知何處，驚翦翦淒緊霜風。夢醒尋痕訪蹤，但留殘挂穹。梅花未老，翠羽雙吟，一片曉峯。

賀新郎(鄉士以狂得罪賦此餞行)

甚矣君狂矣。想胸中些兒磊砢，酒澆不去。據我看來何所似，一似韓家五鬼，又一似楊家風子。怪鳥啾啾鳴未了，被天公捉在樊籠裏。這一錯，鐵難鑄。濯溪雨漲荆溪水，送君歸，輒蛟橋外。水光清處，世上恨無樓百尺，裝著許多俊氣。做弄得棲棲如此。臨別贈言朋友事，有殷勤六字。君聽取，節飲食，慎言語。

又（贈彈琵琶者）

妾有琵琶譜。抱金槽。慢撚輕拋。柳梢鶯柘。羽調六幺。彈徧了。花底靈犀暗度。奈敲斷玉釵纖股。低畫屏深朱戶。揜捲西風。滿地吹塵土。芳事往。蝶空訴。天天把妾芳心誤。小樓東。隱約誰家。鳳簫鼉鼓。淚點染衫雙袖翠。修竹淒其。又暮。背燈影。蕭條情互。捐佩洲前。裙步步。渺無邊。一片相思苦。春去也。亂紅舞。

又（題後院畫像）

綠墮雲垂領。背琵琶。盈盈裏手。粉間紅靚。依約春游歸來捲。又似春眠未醒。灑寒泚。低迷蓉影。鶯帶鬆聲飛過也。柳窗深。尙記停針聽。魂浩蕩。孤芳景。金釵斷股。瓶沈井。問蘇城香銷卷子。倩誰題詠。燈暈青紅殘。醉在小院屏昏帳。暝。誤嗔怪。眉心慵整。人道真真招得下。任千呼萬喚。無言應。空對此。淚花冷。

摸魚子（壽東軒）

擘吟鞭。雁峯高處。曾游長壽仙府。年年長見。瑤簪會。霞杪蓋芝輕度。開繡戶。芙蓉萬朵。香紅贖。染秋光素。清簫麗。任灑玉杯深。鸞酣鳳醉。猶未洞天暮。塵緣誤。迷卻桃源舊步。飛瓊芳夢同。賦朝來。聞道仙童晏。翹首翠房玄圃。雲又霧。身恍到。微茫認得胎禽舞。遙汀近浦。便一葦漁航。擇煙載雨。歸去伴寒鷺。

沁園春（壽岳君舉）

昔裴晉公生甲辰歲。秉唐相鈞。向東都治第。纔娛老眼。北門建節。又絆閒身。燠館花濃。涼臺月淡。不記弓刀千騎塵。誰堪羨。羨南塘居士。做散仙人。南塘水向晴雲。三百樹。鳳洲楊柳春。有綠衣奏曲。金口小雁。綵衣勸酒。玉跪雙麟。前後同年。逸勞異趣。中立番成雌甲辰。斯言也。是梅花說與竹里山民。

喜遷鶯（金村阻風）

風濤如此。被閒鷗。誚我君行良苦。榭葉深灣。蘆窠窄港。小憇倦篙慵櫓。壯年夜吹笛去。驚得魚龍。嗥舞。悵今老。但篷窗緊揜。荒涼愁悵。別浦雲斷處。低雁一繩。攔斷家山路。佩玉無詩。飛霞乏序。滿席快飈。誰付醉中幾番重九。合度芳尊。孤負便晴否。怕明朝蝶吟。黃花秋圃。

又（青晴）

晴天寥廓。被孤雲畫出。離愁消索。玉局彈棋。金釵翦燭。芳思可勝搖落。鏡妝爲慵遲晚。笙曲綠愁差錯。倒纖指。口從頭細數。年時同樂。寂寞花院悄。昨夜醉眠。夢也難憑托。車角生時。馬足方後。才始斷伊漂泊。悶無半分消遣。春又一番擔閣。倚闌久。奈東風忒冷。紅綃單薄。

齊天樂（元夜閱夢華錄）

銀蟾飛到觚稜外。娟娟下窺龍尾。電紫鞘輕。雲紅簋曲。雕玉輿穿燈底。峯繒岫綺。沸一簇人聲。

道隨竿媚。侍女迎鑾。燕嬌鶯詫。炫珠翠。華胥仙夢未了。被天公。瀕洞吹換塵世。淡柳湖山。濃花巷陌。誰說錢塘而已。回頭汴水。望當日辰遊。萬里發處。但有寒蕪。夜深青燐起。

念奴嬌（夢有奏方響而舞者）

夜深清夢。到叢華深處。滿襟冰雪。人在瓊雲方響樂。杳杳衝牙清絕。翠篋翔龍。金縱躍鳳。不是蕤賓鐵。淒鏘仙調。風敲珠樹新折。中有五色光開。參差披影。對舞山香徹。霧閣雲窗歸去也。笑擁靈君旌節。六曲闌干。一聲鸚鵡。霍地花空滅。夢回孤館。秋茄霜孤鳴咽。

應天長（次清真韻）

柳湖載酒。梅墅賒棋。東風袖裏寒色。轉翠籠池閣。含櫻薦鶯食。匆匆過。春是客。弄細雨。晝陰生。寂似瓊花。滴下紅裳。再返仙籍。無限倚闌愁。夢斷雲簫。鶻叫度青壁。漫有戲龍盤。盈盈住花宅。驕驄馬。嘶巷陌。戶半揜。墮鞭無迹。但追想。白苧裁縫。燈下初識。

賀新郎（慶栢松詩）

絕代幽人獨。揜芳姿。深居何處。亂雲深谷。自說關中良家子。零落聊依草木。世喪敗誰收骨肉。輕薄兒郎爲夫婿。愛新人。窈窕顏如玉。千萬事。風前燭。鴛鴦一旦成孤宿。最堪憐。新人歡笑。舊人哀哭。侍婢賣珠回來後。相與牽蘿補屋。漫采得。柏枝盈掬。日暮山中天寒也。翠綃衣薄甚。肌生粟。空斂袖。倚修竹。

玉漏遲（壽東軒）

客窗空翠杪。前生飲慣。長生瓊醪。回首紅塵。換了□花幃草。隔水神仙洞府。但只有飛霞能到。誰信道。西風送我。還陪清嘯。縹緲柳側。畫樓已繡幕。圍春露深煙悄。魚尾榜時。雪上鬢雲猶少。醉傍芙蓉日語。願來此年年簪帽。青嶼小。鶴立淡煙秋曉。

又（傳巖隱木如武林納浴堂徐氏女子于客樓其歸也亦貯之所居樓上而圖西湖景于樓壁）

翠鴛雙穗冷。鶯聲喚轉。春風芳景。花湧袖香。此度徐妝偏稱。水月仙人院宇。到處有西湖如鏡。煙岫暝。纖蔥誤指。蓮峯篁嶺。料想小閣初逢。正浪拍紅猊。袖飛金餅。樓倚斜暉。晴把佳期重省。萬種惺鬆笑語。一點溫柔情性。釵倦整。盈盈背燈嬌影。

高陽臺（江陰道中有懷）

宛轉憐香。徘徊顧影。臨芳更倚苔身。多謝殘英。飛來遠遠隨人。回顧却望晴簷下。等幾番小摘微薰。到而今。獨裊鞭梢。笑不成。春愁吟未了。烟林曉。有垂楊夾路。也爲輕輦。今夜山窗還是。費繞梨雪。行囊不是吳牋少。問倩誰去寫花真。待歸時。葉底紅肥。細雨如塵。

探春令（春怨）

玉窗蠅字記春寒。滿茸絲紅處。畫翠鴛雙展。金蠅翅。未抵我愁紅膩。芳心一點天涯去。絮濛濛。濛遮住。對花彈阮。纖瓊指。爲粉靨空彈淚。

秋夜雨(秋雨)

黃雲水驛秋笳噎。吹人雙鬢如雪。愁多無奈處。漫碎把寒花輕撚。紅雲轉入香心裏。夜漸深。人語初歇。此際愁更別。雁落影西窗殘月。

又(春)○蔣正夫令作春夏冬各一闕次前韻

金衣露濕鶯喉噎。春情不解分雪。寶箏絃斷盡。但萬縷閒愁難撚。長紅小白誰亭館。過禁烟。彈指芳歇。今夜休要別。且醉宿細桃花月。

又(夏)

鬢車轉急風吹噎。冰絲鬆藕新雪。有人涼滿袖。怕汗溼紅綃猶撚。三更夢斷敲荷雨。細聽來。疎點還歇。茉莉標致別。占斷了紗廚香月。

又(冬)

紅鱗不暖餅笙噎。爐灰一片晴雪。醉無香嗅醒。但手把新燈閒撚。更深凍損梅花也。聽畫堂。簫鼓方歇。想是天氣別。豫借與春風三月。

少年遊(春思)

梨邊風緊雪難晴。千點照溪明。吹絮窗低。唾茸窗小。人隔翠陰行。而今白鳥橫飛處。烟樹渺鄉城。兩袖春寒。一襟春恨。斜日淡無情。

又(秋思)

楓林紅透晚烟青。客思滿鷗汀。二十年來，無家種竹，猶借竹爲名。春風未了秋風到，老去萬緣輕。只把平生閒吟閒詠，譜作權歌聲。

柳梢青(游女○或刻蔣達)

學唱新腔，鞦韆架上，釵股敲雙。柳雨花風，翠鬆裙褶，紅膩鞦韆。歸來門掩銀缸，淡月裏疏鐘漸撞。嬌欲人扶，醉嫌人問，斜倚樓窗。

霜天曉角(折花)

人影窗紗。是誰來折花。折則從他折去。知折去，向誰家。簷牙枝最佳。折時高折些。說與折花人道。須插向，鬢邊斜。

如夢令(村景)

夜月谿篁鸞影。曉露巖花鶴頂。半世踏紅塵。到底輸他村景。村景。村景。樵斧耕蓑漁艇。

竹山詞終

竹山詞跋

昔人評詞盛稱李氏晏氏父子及耆卿子野子游子瞻美成堯章止矣。蔣勝欲混焉無聞。今讀竹山詞一卷語語纖巧真世說靡也。字字妍倩真六朝險也。豈其稍劣於諸公耶。或讀招落梅魂一詞謂其磊落橫放與辛幼安同調其殆以一斑而失全豹矣。湖南毛晉識。

宋六十名家詞



書舟詞

程垓

題書舟詞

程正伯以詩詞名鄉之人所知也。余頃歲遊都下，數見朝士，往往亦稱道正伯佳句，獨尚書公以爲不然，曰：正伯之文過於詩詞，此乃識正伯之大者也。今鄉人有欲刊正伯歌詞，求余書其首，余以此告之，且爲言：正伯方爲當塗諸公以制舉論薦，使正伯惟以詞名世，豈不小哉！則曰：古樂府亦文爾，初何損於正伯之文哉！余用是樂爲書之。雖然，昔晏叔原以大臣子處富貴之極，爲靡麗之詞，其政事堂中舊客，尙欲其捐有餘之才，豈未至之德者！蓋叔原獨以詞名爾，他文則未傳也。至少游魯直，則已並之，故陳無己之作，自云不減秦七、黃九，是亦推尊其詞爾。余謂正伯爲秦、黃，則可爲叔原，則不可。紹熙甲寅端午前一日，王稱季平序。

書舟詞

目錄

摸魚兒一調
 水龍吟一調
 念奴嬌一調
 滿庭芳一調
 雪獅兒一調
 最高樓一調
 孤雁兒二調
 碧牡丹一調
 天仙子一調
 酷相思一調
 破陣子一調
 臨江仙二調
 南鄉子三調

洞庭春色一調
 四代好一調
 閨怨無悶一調
 玉漏遲一調
 攤破江城子一調
 瑤階草一調
 一叢花一調
 小桃紅一調
 青玉案一調
 漁家傲二調
 折紅英一調
 鳳樓梧十五調
 鵲橋仙一調

南浦一調
 木蘭花慢一調
 八聲甘州一調
 滿江紅三調
 驀山溪一調
 上平曲一調
 祝英臺近一調
 紅娘子一調
 芭蕉雨一調
 攤破南鄉子一調
 一翦梅三調
 醉落魄三調
 虞美人一調

宋六十名家詞

木蘭花二調

浪淘沙一調

望秦川三調

西江月三調

烏夜啼四調

憶秦娥三調

謁金門七調

減字木蘭花一調

點絳脣一調

長相思三調

瑞鷓鴣二調

雨中花令三調

南歌子五調

眼兒媚一調

虞美人影一調

好事近四調

卜算子三調

菩薩蠻十五調

愁倚欄令二調

如夢令一調

鷓鴣天三調

望江南一調

入塞一調

朝中措五調

一落索二調

清平樂四調

霜天曉角二調

浣溪沙五調

生查子三調

憶王孫一調

書舟詞

宋 程 垓

摸魚兒

掩淒涼。黃昏庭院。角聲何處。嗚咽。矮窗曲屋。風燈冷。還是苦寒時節。凝竚切。念翠被熏籠。夜夜成虛設。倚闌愁絕。聽鳳竹聲中。犀幃影外。簌簌釀寒輕雪。傷心處。卻憶當年輕別。梅花滿院。初發吹香弄蕊。無人見。惟有暮雲千疊。情未徹。又誰料而今。好夢分胡越。不堪重說。但記得當初。重門鎖處。猶有夜深月。

洞庭春色

錦字親裁。淚巾偷裛。細說舊時。記笑桃門巷。妝窺寶靨。弄花庭榭。香溼羅衣。幾度相隨遊冶去。任月細。風尖猶未歸。多少事。有垂楊眼見。紅燭心知。如今事都過也。但贏得雙鬢成絲。歎半妝紅豆。相思有分。兩分青鏡。重合難期。惆悵一春飛絮。夢悠颺。教人分付誰。銷魂處。又梨花雨暗。半掩重扉。

南浦

金鴨懶熏香。向晚來春醒。一枕無緒。濃綠漲瑤窗。東風外吹盡亂紅飛絮。無言竚立。斷腸惟有流鶯語。碧雲欲暮。空惆悵韶華。一時虛度。追思舊日心情。記題葉西樓。吹花南浦。老去覺歡

疎。傷春恨都付斷雲殘雨。黃昏院落。問誰猶在。凭闌處。可堪杜宇。空只解聲聲。催他春去。

水龍吟

夜來風雨匆匆。故園定是花無幾。愁多愁極。等閒孤負。一年芳意。柳困花慵。杏青梅小。對人容易。算好春長在。好花長見。元只是人憔悴。回首池南舊事。恨星星不堪重記。如今但有。看花老眼。傷時清淚。不怕逢花瘦。只愁怕老來風味。待繁紅亂處。留雲借月。也須拚醉。

四代好

翠幕東風早。蘭窗夢又被鶯聲驚覺。起來空對。平階弱絮。滿庭芳草。厭厭未欣懷抱。記柳外人家曾到。凭畫闌。那更春好。花好。酒好人好。春好尙恐闌珊。花好又怕飄零。難保直饒酒好。酒未抵意中人好。相逢盡拚醉倒。况人與才情未老。又豈關春去春來。花愁花惱。

木蘭花慢

(春怨)

倩嬌鶯婉燕。說不盡此時情。正小院春闌。芳園晝鎖。人去花零。憑高試回望眼。奈遙山遠水。隔重雲。誰遣風狂雨橫。便教無計留春。誰知雁冥與鴻冥。自難寄丁寧。縱柳院顰深。桃門笑在。知屬何人。衣篝幾回忘了。奈殘香猶有。舊時熏。空使風頭卷絮。爲他飄蕩花城。

念奴嬌

(秋夜)

秋風秋雨。正黃昏供斷。一窗愁絕。帶減衣寬誰念我。難忍重城離別。轉枕寒帷。挑燈整被。總是

相思切。知他別後。負人多少風月。不是怨極愁濃。只愁重見了。相思難說。料得新來魂夢裏。不管飛來蝴蝶。排悶人間。寄愁天上。終有歸時節。如今無奈。亂雲依舊千疊。

閨怨無悶

天與多才。不合更與。殢柳憐花情分。甚總爲才情。惱人方寸。早是春殘花褪。也不料一春都成病。自失笑。因甚腰圍半減。淚珠頻搵。難省也。怨天也。自恨。怎免千般思忖。倩人說與。又卻不忍。拚了一生愁悶。又只恐愁多無人問。到這裏。天也憐人。看他穩也不穩。

八聲甘州

問東君。旣解遣花開。不合放花飛。念春風枝上。一分花減。一半春歸。忍見千紅萬紫。容易漲桃溪。花自隨流水。無計追隨。不忍憑高南望。記舊時行處。芳意菲菲。嘆年來春減。花與故人非。總使梁園賦猶在。奈長卿老去。亦何爲。空搔首。亂雲堆裏。立盡斜暉。

滿庭芳

(時在臨安晚秋登臨)

南月驚烏。西風破雁。又是秋滿平湖。採蓮人盡。寒色戰菰蒲。舊信江南好景。一萬里輕覓尊鱸。誰知道。吳儂未識。蜀客已情孤。憑高增悵望。湘雲盡處。都是平蕪。問故鄉何日。重見吾廬。縱有荷紉菱製。終不似。菊短籬疎。歸情遠。三更雨夢。依舊繞庭梧。

玉漏遲

一春渾不見。那堪又是花飛時節。忍對危闌數曲。暮雲千疊。門外星星柳眼。看誰似當時風月。愁萬結。憑誰爲我。殷勤低說。不是慣卻春心。奈新燕傳情。舊鶯饒舌。冷篆餘香。莫放等閒消歇。縱使繁紅褪盡。猶自有。酴醾堪折。魂夢切。不耐飛來蝴蝶。

滿江紅（憶別）

門掩垂楊。寶香度翠簾重疊。春寒在羅衣初試。素肌猶怯。薄靄籠花天欲暮。小風送角聲初咽。但獨褰幽幌。悄無言。傷初別。衣上雨。眉間月。滴不盡。顰空切。羨栖梁歸燕。入簾雙蝶。愁緒多於花絮亂。柔腸過似丁香結。問甚時重理錦囊書。從頭說。

又

水遠山明。秋容淡不禁搖落。况正是樓臺高處。晚涼猶薄。月在衣裳風在袖。冰生枕簟香生幕。算四時佳處。是清秋。須行樂。東籬下。西窗角。尋舊菊。催新酌。笑廣平何事。對秋蕭索。搖葉聲聲深院宇。折荷寸寸閒池閣。待歸來。閒把木犀花。重熏卻。

又

葺屋爲舟。身便是烟波釣客。况人間元似。泛家浮宅。秋晚雨聲篷背穩。夜深月影窗樺白。滿船詩酒。滿船書。隨宜索。也不怕。雲濤隔。也不怕。風帆側。但獨醒還睡。自歌還歇。以後從教。鱖鱖舞。醉來一任乾坤窄。恐有時撐向大江頭。占風色。

雪獅兒

斷雲低晚。輕煙帶暝。風驚羅幙。數點梅花。香倚雪窗搖落。紅爐對語。正酒面瓊酥初削。雲屏暖。不知門外。月寒風惡。迤邐慵雲半涼。笑盈盈。閒弄寶箏絃索。暖極生春。已向橫波先覺。花嬌柳弱。漸倚醉。要人攬著。低告託。早把被香熏卻。

攤破江城子

娟娟霜月又侵門。對黃昏。怯黃昏。愁把梅花。獨自泛清尊。酒又難禁花又惱。漏聲遠。一更更總斷魂。斷魂斷魂不堪聞。被半溫。香半溫。睡也睡也。睡不穩。誰與溫存。只有牀前紅燭伴啼痕。一夜無眠。連曉角。人瘦也。比梅花。瘦幾分。

驀山溪

老來風味。是事都無可。只愛小書舟。膽圍著。琅玕幾個。呼風約月。隨分樂生涯。不羨富。不憂貧。不怕烏蟾墮。三杯徑醉。轉覺乾坤大。醉後百篇詩。儘從他。龍吟鶴和。升沈萬事。還與本來天。青雲上。白雲間。一任安排我。

最高樓

舊心事。說著兩眉羞。記得凭肩遊。綉裙羅襪桃花岸。薄衫輕扇杏花樓。幾番行。幾番醉。幾番留。也誰料春風吹已斷。又誰料朝雲飛亦散。天易老。恨難酬。蜂兒不解知人苦。燕兒不解說人

愁舊情懷消不盡。幾時休。

瑤階草

空山子規叫。月破黃昏冷。簾幕風輕。綠暗紅又盡。自從別後。粉銷香膩。一春成病。那堪晝閒日永。恨難整。起來無語。綠萍破處。池光淨。悶理殘妝。照花獨自。憐瘦影。睡來又怕。飲來越醉。醒來却悶。看誰似我孤另。

上平曲（惜春）

愛春歸。憂春去。爲春忙。旋點檢。雨障雲妨。遮紅護綠。翠幃羅幕。任高張。海棠明月杏花天。更惜濃芳。喚鶯吟。招蝶拍。迎柳舞。倩桃妝。盡呼起。萬籟笙簧。一觴一咏。儘教陶瀉。繡心腸。笑他人世漫嬉遊。擁翠偎香。

孤雁兒

在家不覺窮冬好。向客裏方知道。故園梅子正開時。記得清尊頻倒。高燒紅蠟。暖熏羅幌。一任花枝惱。如今客裏傷懷抱。忍雙鬢隨花老。小窗獨自對黃昏。只有月華飛到。假饒真個。雁書頻寄。何似歸來早。

又（有尼從人而復出者。戲用張子野事賦此）

雙鬢乍縮橫波溜。記當日香心透。誰教容易逐雞飛。輸却春風先手。天公元也。管人憔悴。放出

花枝瘦。幾宵和月來相就。問何處春山鬪。祇應深院鎖嬋娟。枉却嬌花時候。何時爲我。小梯橫閣。試約黃昏後。

一叢花（閨怨○或刻御街行）

傷春時候一憑闌。何況別離難。東風只解催人去。也不道鶯老花殘。青牋未約。紅綃忍淚。無計鎖征鞍。寶釵瑤鈿一時閒。此恨苦天慳。如今直恁拋人去。也不念人瘦衣寬。歸來忍見。重樓淡月。依舊五更寒。

祝英臺近（晚春）

墜紅輕。濃綠潤。深院又春晚。睡起厭厭。無語小妝懶。可堪三月風光。五更魂夢。又都被杜鵑催。憤。怎消遣。人道愁與春歸。春歸愁未斷。閒倚銀屏。羞怕淚痕滿。斷腸沈水重熏。瑤琴閒理。奈依舊夜寒人遠。

碧牡丹

睡起情無著。曉雨盡。春寒弱。酒盞飄零。幾日頓疎行樂。試數花枝。問此情何若。爲誰開。爲誰落。正愁卻不是。花情薄。花元笑人蕭索。舊觀千紅。至今冷夢難託。燕麥春風。更幾人驚覺。對花羞。爲花惡。

小桃紅

不恨殘花彈。不恨殘春破。只恨流光。一年一度。又催新火。縱青天白日。繫長繩。也留春得麼。花院從教鎖。春事從教過。燒筍園林。嘗梅臺榭。有何不可。已安排珍簞小。胡牀待日長閒坐。

紅娘子

小小閒窗底。曲曲深屏裏。一枕新涼。半牀明月。留人歡意。奈梅花引裏。喚人行。苦隨他無計。幾點清觴淚。數曲烏絲紙。見少離多。心長分短。如何得是。到如今留下許多愁。枉教人憔悴。

天仙子

慘慘霜林冬欲盡。又是溪梅寒弄影。矮窗曲屋夜香燒。人已靜。燈垂燼。點滴芭蕉和雨聽。約個歸期猶未定。一夜夢魂終不穩。知他勾得許多情。真個悶。無人問。說與畫樓應不信。

青玉案(用賀方回韻)

寶林巖畔凌雲路。記藉草尋梅去。詠綠書紅知幾度。行雲歸後。碧雲遮斷。寂寞人何處。一聲長笛江天暮。別後誰吟倚樓句。勻面照溪心已許。欲憑錦字寫人愁。去生怕梨花雨。

芭蕉雨

雨過涼生藕葉。晚庭消盡暑。渾無熱。枕簟不勝香滑。爭奈寶帳情生。金尊意愜。玉人何處夢蝶。思一見冰雪。須寫個帖兒。丁寧說。試問道肯來麼。今夜小院無人。重樓有月。

酷相思(惜別)

月掛霜林寒欲墜。正門外催人起。奈離別如今真個是。欲住也留無計。欲去也來無計。馬上離情衣上淚。各自供憔悴。問江路梅花開也未。春到也須頻寄。人到也須頻寄。

漁家傲（彭門道中早起）

野店無人霜似水。清燈照影寒侵被。門外行人催客起。因個事。老來方有思家淚。開也未。愛花只有歸來是。想見小喬歌舞地。渾含喜。天涯不念人憔悴。寄問梅花

又

獨木小舟煙兩溼。燕兒亂點春江碧。江上青山隨意覓。人寂寂。落花芳草催寒食。今日客。吹愁不得東風力。細拾殘紅書怨泣。流水急。不知那個傳消息。昨夜青樓

攤破南鄉子

休賦惜春詩。留春住說與人知。一年已負東風瘦。說愁說恨。數期數刻。只望歸時。啼。真個也喚得人歸。歸來休恨花開了。梁間燕子。且教知道。人也雙飛。莫怪杜鵑

破陣子

小小紅泥院宇。深深翠色屏幃。簇定熏爐酥酒軟。門外東風寒不知。恰疑三月時。釵影半欹。綠子歌聲輕度。紅兒醉裏不愁更漏斷。更要梅花看幾枝。起來霜月低。釵影半欹

折紅英（卽釵頭鳳正伯更名折紅英）

桃花暖。楊花亂。可憐朱戶春強半。長記憶。探芳日。笑凭郎肩。殢紅偎碧。惜惜惜。春宵短。離腸斷。淚痕長。向東風滿。憑青翼。問消息。花謝春歸。幾時來得。憶憶憶。

一翦梅

舊日心期不易招。重來孤負。幾個良宵。尋常不見儘相邀。見了知他許大無聊。昨夜梅花插翠翹。影落清溪。應也魂消。假饒真個住山腰。那個金章。換得漁樵。

又

小會幽歡。整及時。花也相宜。人也相宜。寶香未斷燭光低。莫厭杯遲。莫恨歡遲。夜漸深深漏漸稀。風已侵衣。露已沾衣。一盃重勸莫相違。何似休歸。何自同歸。

又

斗轉參橫。一夜霜。玉律聲中。又報新陽。起來無緒賦行藏。只喜人間一線添長。簾幕垂垂。月半廊。節物心情都付椒觴。年華漸晚。鬢毛蒼。身外功名。休苦思量。

臨江仙(合江放舟)

送我南來舟一葉。誰教催動鳴榔。高城不見水茫茫。雲灣纔幾曲。折盡九回腸。買酒澆愁愁不盡。江煙也共淒涼。和天瘦了也何妨。只愁今夜雨。更做淚千行。

又

濃綠鎖窗閒院靜。照人明月團團。夜長幽夢見伊難。瘦從香臉薄。愁到翠眉殘。只道花時容易見。如今花盡春闌。畫樓依舊五更寒。可憐紅繡被。空記合時歡。

鳳棲梧（客臨安連日愁霖旅枕無寐起作）

九月江南煙雨裏。客枕淒涼。到曉渾無寐。起上小樓觀海氣。昏昏半約漁樵市。斷雁西邊家。萬里料得秋來笑。我歸無計。劍在牀頭書在几。未甘分付黃花淚。

又

有客錢塘江上住。十日齋居。九日愁風雨。斷送一春彈指去。荷花又繞南山渡。湖上幽尋君已許。消息不來。望得行雲暮。芳草夢魂應記取。不成忘却池塘句。

又

門外飛花風約住。消息江南。已釀黃梅雨。蜀客望鄉歸不去。當時不合催南渡。憂國丹心曾獨許。縱吐長虹。不奈斜陽暮。莫道春光難攬取。少陵辨得尋花句。

又（南窗偶題）

薄薄窗油清似鏡。兩面疎簾。四壁文書靜。小篆焚香消日永。新來識得閒中性。人愛人嫌都莫問。絮自沾泥。不怕東風緊。只有詩狂消不盡。夜來題破窗花影。

又（送子廉姪南下）

九月重湖寒意早。目斷黃雲。冉冉連衰草。慘別臨江愁滿抱。酒尊時事都相惱。聞道吳天消息好。鴛鴦西池。咫尺君應到。若見故人相問勞。爲言未分書舟老。

又（下十闋或另刻蝶戀花）

日下船篷人未起。一個燕兒。說盡傷春意。江上殘花能有幾。風催雨促成容易。湖海客心千萬里。著力東風。推得人行未。相次桃花三月水。菱歌誰伴西湖醉。

又

滿路梅英飛雪粉。臨水人家。先得春光嫩。樓底杏花樓外影。牆東柳線牆西恨。擷翠揉紅何處問。暖入眉峯。已作傷春困。歸路月痕彎一寸。芳心只爲東風損。

又（春風一夕浩蕩曉來柳色一新）

寒意勒花春未足。只有東風。不管春拘束。楊柳滿城吹又綠。可人青眼還相屬。小葉星星眠未熟。看盡行人。唱徹陽關曲。心事一春何計續。芳條未展眉先蹙。

又（自東江乘晴過蠓頤濟園小飲）

晴帶溪光春自媚。繞翠縈青。來約束風醉。雲補斷山疎復綴。雨回綠野清還麗。拄杖不妨舒客意。臨水人家。問有花開未。江左風流今有幾。逢春不要人憔悴。

又

翠幕成陰簾拂地。池館無人。四面生涼意。荷氣竹香俱細細。分明著莫清風袂。玉枕如冰笙
似水。纔解橫釵。早被鶯呼起。今夜月明人未睡。只消三四分來醉。

又

畫閣紅爐屏四向。梅擁寒香。次第侵帷帳。燭影半低花影幌。修眉正在花枝傍。帶粉偎香羞
一餉。未識春風。已覺春情蕩。醉裏不知霜月上。歸來已踏梅花浪。

又

樓閣吹花煙月墮。的皪韶妍。又向梅心破。釵上綵旛看一個。賞心已覺春生坐。莫恨年華風
雨過。人日嬉遊。次第連燈火。翠幄高張金盞大。已拚醉袖隨香鞞。

又

小院菊殘煙雨細。天氣淒涼。惱得人憔悴。被暖橙香羞早起。玉釵一任慵雲墜。樓上珠簾鉤
也未。數尺遙山。供盡傷高意。佇立不禁殘酒味。繡羅依舊和香睡。

又（月下有感）

小院秋光濃欲滴。獨自鉤簾。細數歸鴻翼。鴻斷天高無處覓。矮窗催暝蛩催織。涼月去人纔
數尺。短髮蕭騷。醉傍西風立。愁眼望天收不得。露華衣上三更溼。

又

晴日溪山春可數。水繞池塘。知有人家住。尋日尋花花不語。舊時春恨還如許。苦恨東風無
意緒。只解催花。不解催人去。日晚荒煙迷古戍。斷魂正在梅花浦。

醉落魄（賦石榴花）

夏園初結。綠深深處紅千疊。杜鵑過盡芳菲歇。只道無春。滿意春猶愜。折來一點如猩血。透
明冠子輕盈帖。芳心蹙破情尤切。不管花殘。猶自揀雙葉。

又（別少城舟宿黃龍）

風催雨促。今番不似前歡足。早來最苦離情毒。唱我新詞。掩著面兒哭。臨行只怕人行遠。殷
勤更寫多情曲。相逢已是腰如束。從此知他。還減幾分玉。

又

晚涼時節。翠梧風定蟬聲歇。有人睡起香浮頰。倚著闌干。笑揀青荷葉。如今往事愁難說。曲
池依舊閒風月。田田翠蓋香羅疊。留得露痕。都是淚珠結。

南鄉子

幾日訴離尊。歌盡陽關不忍分。此度天涯真個去。銷魂。相送黃花落葉村。斜日又黃昏。蕭寺
無人半掩門。今夜粉香明月淚。休論。只要羅巾記舊痕。

又

纔合又輕離。心事多違。小窗燈影記親移。可奈酒酣花困處。不省人歸。山翠又如眉。腸斷幽期。相思有夢阿誰知。莫遣重來風絮亂。不似當時。

又

老去懶尋花。獨自生涯。幾枝疎影浸窗紗。昨夜月來人不睡。看盡橫斜。門外欲啼鴉。香意凌霞。從渠千樹繞人家。世上一枝元也足。不要隨他。

鵲橋仙（秋日寄懷）

角聲吹月。風聲落枕。夢與柔腸俱斷。誰教當日太情濃。颺不下新愁一段。黃花開了。梅花開未。曾約那時相見。莫教容易負幽期。怕真個孤他淚眼。

虞美人（春愁）

輕紅短白東城路。憶得分襟處。柳絲無賴舞春柔。不繫離人。只解繫離愁。如今花謝春將老。柳下無人到。月明門外子規啼。喚得人愁。爭似喚人歸。

木蘭花

疎枝半作窺窗老。又是一年春意早。風低小院得香遲。月傍女牆和影好。去年苦被離情惱。今日逢花休草草。後時花紫盡從他。且趁先春拚醉倒。

又（二江得書作）

別時已有重來願。誰料情多天不管。分明咫尺是青樓。抵死濃雲遮得徧。寄聲只倚西飛雁。雁落書回空是怨。領愁歸去有誰知。水又茫茫山又斷。

瑞鷓鴣(瑞香)

東風冷落舊梅臺。猶喜山花拂面開。紺色染衣春意淨。水沈熏骨晚風來。柔條不學丁香結。矮樹仍參茉莉栽。安得方盆栽幽植。道人隨處作香材。

又(春日南園)

門前楊柳綠成陰。翠塢籠香徑自深。遲日暖熏芳草眼。好風輕撼落花心。無多春恨鶯難語。最晚朝眠蝶易尋。惟有狂醒不相貸。釀成憔悴到如今。

鷓鴣天

昨夜思量直到明。拂明心緒更愁人。風披露葉高低怨。冷雨寒煙各自輕。休賴酒。莫求神。爲誰教爾許多情。如今早被思量損。好更當時做弄成。

又

木落江空又一秋。大寒幾日不登樓。紅綃帳裏橙猶在。青瑣窗深菊未收。新畫閣。小書舟。篆煙熏得晚香留。只因貪伴開爐酒。惱得紅兒一夜謳。

又(寄少城)

淚溼芙蓉城上花。片飛何事苦參差。鎖深不奈鶯無語。巢穩爭如燕有家。情未老。鬢先華。可憐各自淡生涯。楊花不解知人意。猶自沾泥也學他。

浪淘沙

山盡兩溪頭。水合天浮。行人莫賦大江愁。且是芙蓉城下水。還送歸舟。魚雁兩悠悠。煙斷雲收。誰教此水卻西流。載我相思千點淚。還與青樓。

雨中花令

聞說海棠開盡了。怎生得夜來一笑。顰綠枝頭。落紅點裏。問有愁多少。小院閉門春悄悄。禁不得瘦腰如嬾。豆蔻濃時。醪醖香處。試把菱花照。

又

舊日愛花心未了。緊消得花時一笑。幾日春寒。連宵雨悶。不道幽歡少。記得去年深院悄。梁畔一枝香嫋嫋。說與西樓。後來明月。莫把菱花照。

又

卷地芳春都過了。花不語對人含笑。花與人期。人憐花病。瘦似人多少。聞道重門深悄悄。愁不盡露啼煙嫋。斷得相思。除非明月。不把花枝照。

望江南（夜泊龍橋灘前遇雨作）

篷上雨。篷底有人愁。身在漢江東畔去。不知家在錦江頭。煙水兩悠悠。吾老矣。心事幾時休。沈水熨香年似日。薄雲垂帳夏如秋。安得小書舟。（家有擬舫名書舟）

望秦川（早春感懷）

柳弱眠初醒。梅殘舞尙癡。春陰將冷傍簾幃。又是東風和恨向人歸。樂事燈前記。愁腸酒後知。老來無計遣芳時。只有閒情隨分品花枝。

又

竹粉翻新箨。荷花拭靚妝。斷雲侵晚度橫塘。小扇斜釵。依約傍牙牀。蘸蜜分紅荔。傾筒瀉碧香。醉時風雨醒時涼。明月多情。依舊過西廂。

又

翠黛隨妝淺。銖衣稱體香。好風偏與十分涼。卻扇含情。獨自繞池塘。碧藕絲絲嫩。紅榴葉葉雙。牽絲摘葉爲誰忙。情到厭厭。拚醉又何妨。

南歌子

雨燕翻新幕。風鶻繞舊枝。畫堂春盡日遲遲。又是一番平綠漲西池。病起尊難盡。腰寬帶易垂。不堪村落子規啼。問道行人一去幾時歸。

又（楊光輔又寄示尋春）

淡靄籠青鎖。輕寒薄翠綃。有人憔悴帶寬腰。又見東風不忍見柔條。悶酒尊難盡。閒香篆易銷。夜來溪雪已平橋。溪上梅魂憑仗一相招。

又（早春）

梅塢飛香定。蘭窗翠色齊。水邊沙際又春歸。領略東風能有幾人知。愛月眠須晚。尋花去未遲。誰家庭院更芳菲。費盡才情休負一春詩。

又

荷蓋傾新綠。榴巾蹙舊紅。水亭煙樹晚涼中。又是一鉤新月靜房櫳。絲藕清如雪。蠟紗薄似空。好維今夜與誰同。喚取玉人來共一簾風。

又

野水尋溪路。青山踏晚春。偶來相值卻鍾情。一樹瓊瑤洗盡客衣襟。曲沼通詩夢。幽窗淨俗塵。何時散髮伴簷裙。後夜相思生怕月愁人。

入塞

好思量。正秋風半夜長。奈銀缸一點耿耿背西窗。衾又涼。枕又涼。露華淒淒月半牀。照得人真個斷腸。窗前誰浸木犀黃。花也香。夢也香。

西江月

華筵飲散撒芳尊。人影亂紛紛。且約玉驄留住，細將團鳳平分。一甌看取，招回酒興，爽徹詩魂。歌罷清風兩腋，歸來明月千門。

又（湯詞）

龍團分罷覺芳滋。歌徹碧雲詞。翠袖且留纖玉，沈香載捧冰瓠。一聲清唱，半甌輕啜，愁緒如絲。記取臨分餘味，圖教歸後相思。

又（詠三十九數）

真遊六六洞中仙。騎鶴下三天。休道日斜歲暮，行年方是韶華。相逢一笑，此心不動，須待明年。要得安排穩當，除非四十相連。（樂天詩有行年三十九歲暮日斜時之句）

又

片花飛後水東流。無計挽春留。香小誰栽杜若，夢回依舊揚州。破瓜年在，嬌花豔冶，舞柳纖柔。莫道劉郎霜鬢，才情未放春休。

烏夜啼

楊柳拖煙漠漠。梨花浸月溶溶。吹香院落春還盡。憔悴立東風。只道芳時易見，誰知密約難通。芳園繞遍無人問。獨自拾殘紅。

又（醉枕不能寐）

白酒欺人易醉。黃花笑我多愁。一年只有秋光好。獨自卻悲秋。風急常吹夢去。月遲多爲人留。半黃橙子和詩卷。空自伴牀頭。

又

綠外深深柳港。紅間曲曲花樓。一春想見貪遊冶。不知有人愁。三月東風易老。幾宵明月難留。醪醕白盡窗前也。還肯醉來否。

又

靜院槐風綠漲。小窗梅雨黃垂。欲看春事留連處。惟有夜寒知。夢長閒消午醉。掃花共坐風涼。歸來窗北胡牀興。在羲皇以上。

虞美人影

粉霜拂拂凝香砌。醞釀梅花天氣。月上小窗如水。冷浸人無寐。平生可慣閒憔悴。擔負新愁不起。消遣夜長無計。只倚熏香睡。

一落索

門外鶯寒楊柳。正減歡疎酒。春陰早是做人愁。更何況花飛後。莫倚東風消瘦。有醪醕入手。儘假香玉醉何妨。任花落愁依舊。

又（歌者索詞名一東）

小小腰身相稱。更著人心性。一聲歌起繡簾陰。都遏住行雲影。聞道玉郎家近。被春風勾引。從今莫怪一東看。自壓盡人間韻。

憶秦娥

青門深。海棠開盡春陰陰。春陰陰。萬重雲水。一寸歸心。玉樓深鎖煙消沈。知他何日同登臨。同登臨。待收紅淚。細說如今。

又

情脈脈。半黃橙子和香擘。和香擘。分明記得。袖香熏窄。別來人遠關山隔。見梅不忍和花摘。和花摘。有書無雁。寄誰歸得。

又

愁無語。黃昏庭院黃梅雨。黃梅雨。新愁一寸。舊愁千縷。杜鵑叫斷空山苦。相思欲計人何許。人何許。一重雲斷。一重山阻。

好事近（資中道上無雙堠感懷作）

別夢記春前。春盡苦無歸日。想見鵲聲庭院。誤幾回消息。萬重離恨萬重山。無處說思憶。只有路傍雙堠。也隨人孤隻。

又（待月不至）

天淡一簾秋。明月幾時來得。何事桂低香近。把清光邀勒。人間明晦總由天。何必問通塞。且爲人如月好。醉莫分南北。

又

煙盡戍樓空。又是一簾佳月。何事山城留滯。負好花時節。燒燈翦綵沒心情。應有翠娥說。欲借好風吹恨。奈亂雲愁疊。

又

急雨鬧冰荷。銷盡一襟煩暑。趁取晚涼幽會。近翠陰濃處。風梢危滴撼珠璣。灑面得新句。莫惜玉壺傾盡。待月明歸去。

清平樂

山城桃李。催促春無幾。日日爲花須早起。猶惜花無計。阿誰留得春風。長教繞綠圍紅。莫遣十分芳意。輸他萬點愁容。

又(酬王靜父紅木犀詞)

秋香誰買。散入琉璃界。點綴小紅全不礙。還卻鉛華餘債。夜來月底相期。一枝未覺香遲。恰似青綾帳底。絳羅初試裙兒。

又(詠雪)

疎疎整整。風急花無定。紅燭照筵深欲凝。時見篩簾玉影。夜深明月籠紗。醉歸涼面香斜。猶有惜梅心在。滿庭誤作吹花。

又

綠深紅少。柳外橫橋小。雙燕不知幽夢好。驚起碧窗春曉。起來瞢瞢多時。玉臺金鏡慵移。多少春愁未說。卻來閒數花枝。

謁金門（杏花）

春悄悄。紅到一枝先巧。酒入半腮微帶茆。粉寒香未飽。芳意枝頭偏鬧。困盡蜂鬚鶯爪。擬倩玉纖和露拗。情多愁易攪。

又（茶蘼）

花簇簇。觸眼萬條垂玉。小院春深窗鎖綠。水沈風斷續。明月又侵樓曲。羞向枕囊拘束。只待夜深清影足。醉來花底宿。

又（陪蘇子重諸友飲東山）

烏帽側行徧杏花春色。野意青青分隴麥。人家煙水隔。春事莫催行客。彈指青梅堪摘。醉倚暮天江拍拍。雨晴沙路白。

又（病起）

花半溼。一霎晚雲籠密。天氣未佳風又急。小庭愁獨立。酒病起來無力。懊惱篆煙鎖碧。一餉春情無處覓。小屏山數尺。

又

春夜雨。催潤柳塘花塢。小院深深門幾許。畫簾香一縷。獨立晚庭凝竚。細把花枝閒數。燕子不來天欲暮。說愁無處所。

又

風陣陣。吹落楊花無定。酒病厭厭三月盡。花檀紅自隱。新綠軒窗清潤。月影又移牆影。手撚青梅無處問。一春長悶損。

又

濃睡醒。驚對一簾秋影。楓葉乍零風不定。半窗疎雨影。愁與年光不盡。老入星星雙鬢。只擬上樓尋遠信。雁遙煙水暝。

卜算子

枕簟暑風消。簾幕秋風動。月到夜來愁處明。只照團衾鳳。去意杳無憑。別語愁難送。一紙魚牋枕底香。且做新來夢。

又

獨自上層樓。樓外青山遠。望到斜陽欲盡時。不見西飛雁。
獨自下層樓。樓下蛩聲怨。待到黃昏月上時。依舊柔腸斷。

又

幾日賞花天。月淡茶糜小。寫盡相思喚不來。又是花飛了。
春在怕愁多。春去憐歡少。一夜安排夢不成。月墮西窗曉。

霜天曉角

幾夜瑣窗揭。素蟾光似雪。恰恨照人欹枕。紗幮爽。簟紋滑。
迤邐篆香裊。好懷誰共說。若是知人風味。來分付。半牀月。

又

玉清冰樣潔。幾夜相思切。誰料濃雲遮擁。同心帶。甚時結。
匆匆休惜別。還有來時節。記取江陰歸路。須共踏。夜深月。

減字木蘭花

雙雙相竝。一點紅邊偏照映。玉翦雲裁。不比浮花共蒂開。
幾回心下。選勝摘來情自足。插向雲鬢。要與仙郎比竝看。

菩薩蠻

和風暖日西郊路。遊人又踏青山去。何處碧雲衫。映溪纔兩三。
疎松分翠黛。故作羞春態。回首杳煙消。月明歸渡橋。

又

春回綠野煙光薄。低花矮柳田家樂。隴麥又青青。喧蜂閒趁人。
野翁忘近遠。怪識劉郎面。斷卻小橋溪。怕人溪外知。

又（訪江東外家作）

畫橋拍拍春江綠。行人正在春江曲。花潤接平川。有人花底眠。
東風元自好。只怕催花老。安得萬垂楊。繫教春日長。

又

平蕪冉冉連雲綠。斜陽襯雨明溪足。小鴨睡晴沙。翠烘三兩花。
春光閒婉婉。盡日無人見。試著小屏山。圖歸雲際看。

又（正月三日西山即事）

山頭翠樹調鶯舌。山腰野菜飛黃蝶。來爲等閒休。去成多少愁。
小庭花木改。猶有啼痕在。別後不曾看。怕花和淚殘。

又

羅衫乍試寒猶怯。妬花風雨連三月。燈冷閉門時。有愁誰得知。

此情真個苦。只爲當時語。莫

又

夜來花底鶯。饒舌把人心事分明說。許大好因緣。只成容易傳。

春闌無好計。唯有歸來是。從

又

小窗蔭綠清無暑。篆香終日縈蘭炷。冰簟漲寒濤。清風一枕高。

有人團扇卻。門掩庭花落。少

待月侵牀。照教魂夢涼。

又(同文)

暑庭消盡風鳴樹。樹鳴風盡消庭暑。橫枕一聲鶯。鶯聲一枕橫。

扇紈低粉面。面粉低紈扇。涼

又

東風有意留人住。熏風無意催人去。去住兩茫然。相逢成短緣。

平生花柳笑。過後關心少。今

日奈情何。爲伊饒恨多。

又

去年恰好雙星節。鵲橋未渡人離別。不恨障雲生。恨他真個行。天涯消息近。不見乘鸞影。柳外鷓鴣聲。幾回和夢驚。

又

淺寒帶暝和煙下。輕陰挾雨隨風灑。翠幕護重簾。篆香銷半匳。平生風雨夜。怕近芭蕉下。今夕定愁多。蕭蕭聲奈何。

又

客窗曾翦燈花弄。誰教來去如春夢。冷落舊梅臺。小桃相次開。人間春易老。只是山中好。閒卻槿花籬。莫教溪外知。

又

曉煙籠日浮山翠。春風著水回川媚。遠近碧重重。人家山色中。野花香自度。似識幽人處。安得著三間。與山終日閒。

又

扶犁野老田東睡。插花山女田西醉。醉眼眩東西。看看桃滿溪。耕桑山下足。紈綺人間俗。莫管舊東風。從教吹輭紅。

浣溪沙（病中有以鬪花相供者戲書）

天女殷勤著意多。散花猶記病維摩。肯來丈室問云何。腰佩摘來煩玉筍。鬢香分處想秋波。不知真個有情麼。

又

遙想當年出鳳雛。王口風有未全疎。祇今朱紱爲誰紆。芳草池塘春夢後。粉香簾幕曉晴初。一簪華髮要人梳。

又

翠葆扶疎傍藥闌。亂飄綠沼滿書單。清明時節又看看。小雨勒成春尾恨。東風偏作夜來寒。琴心老盡不須彈。

又

薄日移陰午暑空。一杯何事便潮紅。扇紈揮盡卻疎慵。早睡情懷冰枕外。夜涼消息雨荷中。不須留燭眩房櫳。

又

閒倚前榮小扇車。晚妝無力鞞雲鵝。凝情香落一庭花。笑挽清風歸玉枕。懶隨缺月傍窗紗。羞紅兩臉上嬌霞。

點絳脣

梅雨收黃。暑風依舊。閒庭院。露荷輕顫。只有香浮面。
掛起西窗。月澹無人見。幽情遠。墮釵低
扇。好個涼方便。

愁倚闌令（三榮道上賦）

山無數。雨蕭蕭。路迢迢。不似芙蓉城下去。柳如腰。
夢隨春絮飄飄。知他在第幾朱橋。說與杜
鵲休喚怕魂銷。

又

春猶淺。柳初芽。杏初花。楊柳杏花交影處。有人家。
玉窗明暖烘霞。小屏上水遠山斜。昨夜酒
多春睡重。莫驚他。

生查子

溪光曲曲村。花影重重樹。風物小桃源。春事還如許。
情知送客來。又作尋芳去。可惜一春詩。
總爲閒愁賦。

又

長記別郎時。月淡梅花影。梅影又橫窗。不見江南信。
無心換夕香。有分憐朝鏡。不怕瘦稜稜。
只怕梅開盡。

又（春日閨情）

蘭帷夜色高。繡被春寒擁。何事玉樓人。屢踏楊花夢。分明相見陳。不道幽情重。乞個好因緣。莫待來生種。

長相思

對重陽。感重陽。身在西風天一方。年年人斷腸。景淒涼。客淒涼。縱有黃花祇異鄉。晚雲連夢長。

又

酒孤斟。客孤吟。戲馬臺荒露草深。英雄何處尋。愛登臨。莫登臨。定是愁來關客心。暮天煙水沈。

又

風敲窗。雨敲窗。窗外芭蕉雲作幢。聲聲愁對牀。對銀缸。點銀缸。夢採芙蓉隔一江。幾時蝴蝶雙。

如夢令

風入藕花翻重。夜氣與香俱縱。月又帶風來。涼意一襟誰共。情重情重。可惜短宵無夢。

憶王孫

蕭蕭梅雨斷人行。門掩殘春綠蔭生。翠被寒燈枕自橫。夢初驚。窗外啼鶉催五更。

宋六十名家圖



書舟詞終

三

書舟詞跋

正伯與子瞻中表兄弟也。故集中多溷蘇作。如意難忘一翦梅之類。今悉刪正。其酷相思四代好折紅英諸闋。詞家皆極欣賞。謂秦七黃九莫及也。湖南毛晉識。

宋六十名家圖



三六

坦庵詞一卷

趙師俠

題坦庵詞

詞古詩流也。吟詠情性，莫工於詞。臨淄六一，當代文伯。其樂府猶有憐景泥情之偏，豈情之所鍾，不能自巳於言耶？坦庵先生金閨之彥，性天夷曠，吐而爲文，如泉出不擇地，連收兩科，如俯拾芥。詞章迺其餘事，人見其模寫風景體狀物態，俱極精巧，初不知得之之易，以至得趣忘憂，樂天知命，茲又情性之自然也。因爲編次，俾錄諸木，觀者當自識其胸次云。門人尹覺先之序。

坦庵詞

目錄

- 萬年歡一調
- 沁園春二調
- 永遇樂三調
- 蝶戀花八調
- 浣溪沙六調
- 醉蓬萊一詞
- 訴衷情四調
- 點絳脣三調
- 賀聖朝一調
- 武陵春二調
- 謁金門七調
- 少年遊二調
- 江南好一調
- 浪淘沙三調
- 水調歌頭八調
- 酬江月七調
- 風入松一調
- 鷓鴣天七調
- 菩薩蠻十三調
- 漢宮春一調
- 一翦梅二調
- 撲蝴蝶一調
- 踏莎行二調
- 清平樂三調
- 東坡引三調
- 小重山一調
- 關河令二調
- 雙頭蓮令一調
- 滿江紅五調
- 促拍滿路花二調
- 鳳凰閣一調
- 柳梢青十調
- 好事近二調
- 廳前柳二調
- 朝中措六調
- 醉桃源三調
- 憶秦娥一調
- 鵲橋仙四調
- 生查子五調
- 霜天曉角二調
- 採桑子二調
- 畫堂春一調

坦庵詞

宋六十名家詞

南柯子一調

南鄉子一調

伊洲三臺一調

西江月二調

行香子一調

洞仙歌一調

卜算子五調



坦庵詞

宋 趙師俠

萬年歡

電繞神樞虹流華渚。誕彌良用佳辰。萬寓謳歌歸舞。寶曆增新。四七年間盛事。皇威暢邊鄙。無塵仁恩被。華夏咸安。太平極治。懽聲重華道隆。德茂亘古今。希有揖遜重聞。聖子三宮歡聚。兩世慈親。幸際千秋聖日。霑鎬宴普率。惟均封人祝億萬斯年。壽皇尊並高真。

水調歌頭

(龍帥宴王公明)

金鼎調元手。玉殿渙恩華。宣威蜀道。曾見千騎擁高牙。憑仗元樞籌略。寬我宸旒西顧。惠澤被幽遐。爲憶江城好。南浦艤仙槎。格天心。膺帝眷。極褒嘉。琳宮香火緣在。還近玉皇家。霖雨久思賢佐。看卽聲傳丹禁。喚仗聽宣麻。袞繡公歸去。宰路築堤沙。

又

(春野亭送別)

江亭送行客。腸斷木蘭舟。水高風快。滿目煙樹織成愁。咿軋數聲柔櫓。拍塞一懷離恨。指顧隔汀洲。獨立滄茫外。欲去強遲留。海山長。雲水闊。思難收。小亭深院歌笑。不忍記同游。唯有當時明月。千里有情還共。後會尙悠悠。此恨無重數。和淚付東流。

又（癸卯信豐送春）

韶華能幾許。節物歎推移。羣花競芳爭豔。無奈隙駒馳。紅紫隨風何處。唯有搏技新綠。暗逐雨
催肥。喬木鶯初囀。深院燕交飛。漸清和。微扇暑。日遲遲。新荷泛水搖漾。萍藻弄晴漪。百歲光
陰難挽。一笑歡娛易失。莫惜酒盈卮。無計留連住。還是送春歸。

又（萬載煙雨觀）

江流清淺外。山色有無中。平田坡岸迴曲。一目望難窮。波面輕鷗容與。沙際野航橫渡。不信畫
圖工。路入神仙宅。翠鎖梵王宮。俯晴郊。增勝概。氣橫空。雲林城市層列。知有幾重重。更上危
亭高處。從倚闌干。虛敞象緯。逼璇穹。要盡無邊景。煙雨看空濛。

又（戊申春陸用舊韻賦二詞。呈族守德遠）

人生如寄耳。世態逐時移。浮名薄利能幾。方寸漫交馳。麤足生涯隨分。到眼風光可樂。終不羨
輕肥。有志但長嘆。無路且卑飛。恨年華。何去速。又來遲。綠陰濃映池沼。穀浪皺風漪。囀午鶯
聲睨皖。滾地楊花飄蕩。愛景惜芳卮。此意誰能解。一笑任春歸。

又

心景兩無著。情物豈能移。超然遠覽失笑。名利苦紛馳。一品官資榮顯。百萬金珠豪富。空自喜
家肥。會得個中理。川湧與雲飛。靜中樂。閒中趣。自舒遲。心如止水無風。無自更生漪。已是都

忘人我。一任吾身醒醉。有酒引連卮。萬法無差別。融解卽同歸。

又（和石林韻）

世態萬紛變。人事一何忙。胸中素韜奇蘊。匣劍豈能藏。不向燕然紀績。便與漁樵爭席。擺脫是非鄉。要地時難得。閒處日偏長。志橫秋。謀奪衆。漫軒昂。蠅頭蝸角微利。爭較一毫芒。幸有喬林脩竹。隨分粗衣糲食。何必計冠裳。我已樂蕭散。誰能共平章。

又（丁巳長沙壽王樞使）

台星明翼軫。和氣滿瀟湘。長懷勝處地靈。應產股肱良。共仰三朝元老。要識一時英傑。人物自堂堂。直氣薄霄漢。德望聳巖廊。擁貔貅。森棨戟。鎮藩方。折衝尊俎春融。花柳侑壺觴。兩世麟符玉節。九郡恩風惠雨。仁者壽宜長。鳳詔來丹闕。繡袞覲明光。

滿江紅（甲午豫章和李思永）

渺渺春江。迷望眼。蒲萄漲綠。春過也。蕭疎庭戶。寂寥心目。念遠不禁啼鴉鬧。愁多易遣脩蛾蹙。向小窗時把綵牋看。翻新曲。晴晝永。便新浴。相思淚。不成哭。空無言。憔悴暗銷肌玉。目斷碧雲無信息。試憑青翼飛南北。聽掀簾。疑是故人年。風敲竹。

又（辛丑赴信豐舟行贛石中）

煙浪連天。寒尙峭。空濛細雨。春去也。紅銷芳徑。綠肥江樹。山色雲籠迷遠近。灘聲水滿忘羈阻。

挂片帆掠岸晚風輕。停煙渚。浮世事。皆如許。名利役。驚時序。歎清明。寒食。小舟爲旅。露宿風餐。安所賦。石泉榴火。知何處。動歸心。猶賴翠煙中。無杜宇。

又（王子秋社。蕭中賦桃花）

露冷天高。秋氣爽。千林葉落。驚初見。小桃枝上。盛開紅萼。淺淡胭脂。經雨洗。翦裁碼礪。如雲薄。問素商。何事鬪春工。施丹雘。芙蓉苑。顏如灼。曾暗與。花王約。要乘秋。名字。並傳京雒。回首瑤池。高宴處。桂花香裏。驂高鷁。但莫教。容易逐。西風輕飄卻。

又（丙辰中秋。定玉台卽席。餞富次律）

涼入三湘。秋氣爽。江澄沙白。人欲去。離愁黯黯。莫留行色。盍在中朝。陪鷓鴣。暫來南楚。分風月。與元樞。鸚薦共扶搖。朝天闕。皇華使。和戎策。西府贊。中興業。有緇衣同美。武公勛烈。檣燕已。知添別意。驪駒誰爲歌新闕。恨此情。如月過中秋。圓還缺。

又（丁巳和濟時几宜送春）

去去春光。留不住。情懷索寞。那堪是。日長人困。雨餘寒薄。葉底青青。梅勝豆。枝頭顆顆。花留萼。歎流年。空有惜春心。憑春酌。歌共酒。誰酌酢。非與是。忘今昨。且隨時。隨分。強歡尋樂。世事燕鴻。南北去。人生烏兔。東西落。問故園。不負送春期。明年約。

沁園春（和伍子嚴避暑二首）

雨接梅霖。風祛槐暑。麥天已秋。正榴燃紅炬。枝頭色豔。荷翻綠蓋。池面香浮。心景俱清。身名何有。且向忙中早轉頭。塵勞事。枉朝思夕計。細慮深謀。悠悠不復徵求。但安分隨緣。休便休。縱官居極品。徒爲美玩。家稱鉅富。未免閑愁。遇酒開顏。逢歡樂意。有似木人騎土牛。從他笑。看一朝解悟。八極遨遊。

又

羊角飄塵。金烏爍石。雨涼念秋。有虛堂臨水。披襟散髮。紗幘霧捲。湘簟波浮。遠列雲峯。近參荷氣。臥看文書。琴枕頭。蟬聲寂。向莊周夢裏。栩栩無謀。茶甌醒困。堪求麤飽飯。安居可以休。算脩閒靜勝。吾能自樂。榮華紛擾。人漫多愁。習嬾非癡。覺迷是病。一力那能勝九牛。但休問。且追尋觴詠。知友從游。

酬江月（題趙文炳枕屏）

枕山平遠。記當年小閣。牙牀曾展。圍幅高深。春晝永。寂寂重簾不捲。櫂艤西湖。人歸南陌。酒暈紅生臉。困來無那。玉肌小倚。嬌軟。堪恨身在天涯。曲屏環枕。此意何由見。想像高唐無夢到。獨擁閒衾展轉。物是人非。山長水闊。觸處思量徧。愁遮不斷。夜闌依舊斜掩。

又（丙午螺川）

飄流踪跡。趁春來還趁。春光歸去。九十韶華能幾許。著意留他不住。攢柳催花。摧紅長翠。多少

風和雨。蜂閒蝶怨。盡憑枝上鶯語。歸櫂去去難留。桃花浪暖。綠漲迷津浦。回首重城天漾遠。人在重城深處。惜別愁分。凝暗有淚。總寄陽關句。不堪腸斷。恨隨江水東注。

又(乙未白蓮待廷對)

斜風疎雨。正無聊情緒。天涯寒食。煙重雲嬌。春爛熳。卻得輕寒邀勒。柳褪鵝黃。池添鴨綠。桃杏渾狼藉。亂山深處。尙留些子春色。海燕未便歸來。踏青鬪草。誰與同尋覓。杜宇多情芳樹裏。只管聲聲歷歷。似勸行人。不如及早。作箇歸消息。休教腸斷。夢魂空費思憶。

又(乙未中元自柳州過白蓮)

曉風清暑。映湖光如練。山光如染。十里荷花香滿路。飛蓋斜欹妝面。一葉扁舟。數聲柔櫓。陡覺紅塵遠。六橋三塔。恍然圖畫中見。因念當日三賢。兩山佳處。應也經行徧。琢月吟風無限句。景物隨人俱顯。賀監風流。玄真清致。我亦情非淺。漁蓑投老。利名何用深羨。

又(信豐賦茉莉)

化工何意向天涯。海嶠有花清絕。縞袂綠裳無俗韻。不畏炎荒煩熱。玉骨無塵。冰姿有豔。雅淡天然別。真香冶態。未饒紅紫春色。底事口落江南。水仙兄弟。端自難優劣。瘴雨蠻煙魂夢遠。寧識溪橋霜雪。簷蔔同芳。素馨爲伴。百和清芬。蕪淒然風露。夜涼香泛明月。

又(萬載龍江眼界)

平生奇觀。愛登高臨遠。尋幽選勝。欲上層巔窮望眼。一半崎嶇危徑。萬瓦鱗鱗。四山簇簇。咫尺疎林映。山川城郭。恍然多少清興。殘照斜斂。餘紅橫陳平遠。一抹輕煙暝。何處飛來雙白鷺。點破遙空澄瑩。鶴嶺雲平。龍江波渺。不羨瀟湘詠。襟懷舒曠。曲闌倚了還凭。

又（足樂園牡丹）

韶華婉婉。正和風遲日。暄妍清晝。紫燕黃鸝爭巧語。催老芬芳花柳。灼灼花王。盈盈嬌豔。獨殿春光後。鶻翎初拆。露霑香沁珠溜。遙想京洛風流。姚黃魏紫。間綠如鋪繡。小蓋低回雕檻曲。車馬紛馳園囿。天雨曼珠。玉槃金束。占得聲名久。留連朝暮。賞心不厭芳酒。

促拍滿路花（信豐黃師尹跳珠亭）

栽花春爛熳。疊石翠嶺。小亭相對倚。數峯寒。主人尋勝。接竹引清泉。鑿破蒼苔地。一掬泓澄。六花疑是深淵。（山前六花小池）向閒中百慮。翛然情事寄鳴絃。爐香陪茗椀。可忘言。噴珠濺雪。歷歷聽潺湲。塵世知何計。不老朱顏。靜看日月跳丸。

又（瑞蔭亭贈錦屏苗道人）

連枝蟠古木。瑞蔭映晴空。桃江江上景。古今同。忙中取靜。心地儘從容。掃盡荊榛蔽。結屋誅茆。道人一段家風。任鳥飛兔走匆匆。世事亦何窮。官閒民不擾。更年豐。簞瓢雲水。時與話西東。真樂誰能識。兀坐忘言。浩然天地之中。

永遇樂（重明節）

金昊行秋。季商回律。天氣佳處。瑞應皇家。祥開聖旦。寶曆綿基祚。瑤池人祝。鈞天樂奏。湛露宴均寰宇。萬花覆千官。盡醉盛事。頓超今古。中興天統。四三傳序。揖遜自歸明主。黃屋非心。羅圖有永。還付當今主。希夷高蹈。壽康長保。五世祖孫。懽聚尊之。至千秋令節。萬年聖父。

又（甲午走筆和岳大用梅詞韻）

秋滿衡皋。淡雲籠月。晚來風勁。一抹殘霞。數聲過雁。還是黃昏近。憑高臨遠。倚樓凝睇。多少斷愁幽興。聽漁村鳴榔隱隱。別浦暮煙收暝。湘妃起舞。芳蘭紉佩。約略亂峯雲鬢。景物悲涼。楚天澄淡。過盡歸颿影。斜陽低處。遠山重疊。蕭樹亂鴉成陣。空無言闌干。凭暖悶懷似困。

又（爲盧顯文家金林擒賦）

日麗風暄。暗催春去。春尙留戀。香褪花梢。苔侵柳徑。密幄清陰展。海棠零亂。梨花淡竚。初聽鬧空鶯燕。有經盈妍姿靚態。緩步闌風仙苑。綠叢紅萼。芳鮮柔媚。約略試妝深淺。細葉來禽。長梢戲蝶。簇簇枝頭見。駝顏鬢髮。春愁無力。困倚畫屏嬌軟。只應怕風欺雨橫。落紅萬點。

風入松（戊申泮榭衡永舟泛瀟湘）

溪山佳處是湘中。今古言同。平林遠岫。渾如畫更。漁村返照。斜紅兩岸。荻風策策。一江秋水溶溶。蒼崖石壁景尤雄。人自西東。利名汨沒。黃塵裏。又那知清勝無窮。何日輕舸。蓑笠持竿。獨

釣西風

鳳凰閣（己酉歸舟衡陽作）

正薰風初扇。梅黃暑溽。並搖雙槳去程速。那更黃流浩淼。白浪如屋。動歸思離愁萬斛。平生
奇觀。頗快江山寓目。日斜雲定晚風熟。白鷺飛來。點破一川明綠。展十幅瀟湘畫軸。

蝶戀花（戊戌和鄧南秀）

柳眼窺春春漸吐。又是東風。搖曳黃金樹。宜入新春聞好語。一犁處處催耕雨。未有花鬢金
縷。縷醉夢悠颺。似蝶翩躚舞。一枕仙遊何處去。覺來依舊江南住。

又（己亥同常監游洪陽洞題肯堂壁）

春到園林能幾許。昨夜疎疎。過卻催花雨。暖日晴嵐原上路。雕鞍暫繫芳菲樹。仙洞同遊皆
勝侶。翻憶年時。醉裏曾尋句。要與龍江春作主。翩然又趁東風去。

又（癸卯信豐賦芙蓉）

翦翦西風催碧樹。亂菊殘荷。節物驚秋暮。綠葉紅苞迎曉露。錦屏繡幄圍芳圃。塵世鸞驂那
肯駐。尚憶層城。仙苑飛瓊侶。能共牡丹爭幾許。惜花對景聊爲主。

又（道中有簪二色菊花）

百疊霜羅香蕊細。嫋嫋垂鈴。綴簇黃金碎。獨占九秋風露裏。芳心不與羣花比。采采東籬今

古意秀色堪餐。更惹蘭膏膩。不用南山橫紫翠。悠然消得因花醉。

又（臨安道中賦梅）

翦水淩虛飛雪片。認得清香。雪樹深深見。傅粉凝酥明玉豔。含章簷下春風面。照影溪橋情不淺。羌管聲中。疊恨傳幽怨。隴首人歸芳信斷。萬重雲水江南遠。

又（戊申秋夜）

夜雨鳴簷聲淅淅。薄酒澆愁。不那更籌促。感舊傷今難舉目。無聊獨翦西窗燭。彈指光陰如電速。富貴功名。本自無心逐。糲食麤衣隨分足。此身安健他何欲。

又（丙辰嫣然賞海棠）

春入園林新雨過。次第芳菲。惹起情無那。蜀錦青紅初翦破。枝頭點點胭脂顆。柳帶隨風金嬈娜。隱映餘霞。燦燦紅雲墮。高燭夜寒光照坐。只愁沈醉誰扶我。

又（用宜笑之語作）

解語花枝嬌朵朵。不爲傷春。愛把眉峯鎖。宜笑精神偏一個。微澗媚靨櫻桃破。先自腰肢常嬈娜。更被新來。酒飲頻過火。茶飲不懽猶自可。臉兒瘦得些娘大。

鷓鴣天（壬辰豫章惠月佛閣）

煙靄空濛江上春。夕陽芳草渡頭情。飛紅已逐東風遠。嫩綠還因夜雨深。情脈脈。思沈沈。捲

簾愁與暮雲平。闌干倚徧東西曲。杜宇一聲腸斷人。

又（豫章大閱）

玉帶紅花供奉班。裏頭新樣總宜男。鬧裝鞍轡青驄馬。帖體衣裳紫窄衫。雲鬢重。黛眉彎。內家妝束冠江南。輕裘緩帶風流帥。錦繡叢花擁騎還。

又（揖翠晚望）

榕葉陰陰未著霜。淺寒猶試夾衣裳。霧濃煙重遙山暗。雲淡天低去水長。風淅瀝。景淒涼。亂鴉聲裏又斜陽。孤颿落處驚鷗鷺。飛映書空雁字行。

又（七夕）

一葉驚秋風露清。砌蛩初聽傍窗聲。人逢役鵲飛烏夜。橋渡牽牛織女星。銀漢淡。暮雲輕。新蟾斜挂一鉤明。人間天上佳期處。涼意還從過雨生。

又（湘江舟中應叔索賦）

風定江流似鏡平。斜陽天外挂微明。雲歸遠岫千山暝。霧映疎林一抹橫。漁火細。釣絲輕。黃塵撲撲漫爭榮。何時了卻人間事。泛宅浮家過此生。

又（贈妙惠）

妙曲清聲壓楚城。蕙心蘭態見柔情。凌波穩稱金蓮步。蘸甲從教玉筍斟。歌緩緩。笑吟吟。向

人真處可憐生。仙源幸有藏春處。何事乘風逐世塵。

又（丁巳除夕）

爆竹聲中歲又除。頓回和氣滿寰區。春風解綠江南樹。不與人間染白鬚。殘蠟燭。舊桃符。寧辭末後飲屠蘇。歸歟幸有園林勝。次第花開可自娛。

柳梢青（祭戶立春）

節物推移。青陽景變。玉琯灰飛。綵仗泥牛。星毬雪柳。爭報春回。絲金縷玉蟠兒。更斜曷東風應時。宜入新春。人隨春好。春與人宜。

又（荼蘼屏）

紅紫凋零。化工特地。翦玉裁瓊。碧葉叢芳。檀心點素。香雪團英。柔風喚起娉婷。似無力斜欹翠屏。細細吹香。盈盈浥露。花裏傾城。

又（和趙顯祖）

漠漠輕陰。養花天氣。乍暗還明。曲徑風微。蜂迷紅片。蝶趁游人。平蕪極目青青。漫悵望誰招斷魂。柳外愁聞。鶯雛喚友。鳩婦呼晴。

又（黃梔林送李粹伯）

料峭餘寒。元宵欲過。燈火闌珊。宿酒難醒。新愁未解。搖兀吟鞍。深林百舌關關。更雨洗桃紅。

未乾野燒痕青荒陂水滿春事何堪

又(富陽江亭)

煙斂雲收夕陽斜照暮色遲留天接波光水涵山影都在扁舟
是休潮落潮生吳山越嶺依舊臨流

虛名白盡人頭問來往何時

又(聚八仙花)

人閒春足一番紅紫水流風逐戲蝶初閒輕搖粉翅高低飛撲
映綠后土瓊芳蓬萊仙伴蕊紛香粟

雨昏煙暝增明似積雪枝間

又(邵武熙春台席上呈修可叔)

矯首遐觀崇臺徙倚心目俱寬一水縈藍羣峯聳翠天接高寒
好山雨暗前汀雲生衣袂身勸躋攀

平生江北江南總未識闌中

又(王子莆陽壺山閣)

暑懷煩鬱危闌徙倚凝情獨立榕葉連陰橫岡接秀壺峯凝碧
暮集卻憶瀟湘孤村煙渚晚風斜日

海山雲樹微茫更無數歸颿

又(鑑止月下賞蓮)

水滿方塘菰蒲深處戲浴鴛鴦燦錦舒霞紅幢綠蓋時遞幽香

天弓搖挂孤光映烟樹雲間

渺茫散髮披襟。都忘身世。真在仙鄉。

又（和張伯壽紫笑詞）

濃碧擗枝柔黃襯紫。獨殿春風。菡萏輕盈。甘瓜馥郁。葉萼相重。人生一笑難同。更餘韻都藏笑中。日助清芬。酒添風味。須與從容。

浣溪沙（癸巳豫章）

日麗風和春晝長。杏花枝上正芬芳。無情社雨亦何狂。一洗嬌紅啼嫩臉。半開新綠映殘妝。畫梁空有燕泥香。

又（滕王閣席上贈段雲輕）

落日沈沈墮翠微。斷雲輕逐晚風歸。西山南浦畫屏圍。一目波光明欲溜。兩眉山色翠常低。須知人與景相宜。

又（鳴山驛道中）

松雪紛紛落凍泥。棲禽猶困傍枝低。茆簷冰柱玉鞭垂。流水濺濺春意動。羣山燦燦曉光迷。朔風寒日度雲遲。

又（螺川從善席上敘別）

不比陽關去路賒。使君行即返京華。清江江上是吾家。聚散有時思夜雨。留連無計勸流霞。

紅愁綠慘一川花。

又（盤止宴坐）

雪絮飄池點綠漪。舞風游漾燕交飛。陰陰庭院日遲遲。一縷水沈香散後，半甌新茗味回時。脩閒萬事總忘機。

又（鴛鴦紅梅）

本是孤根傲雪霜。肌膚不肯浣鉛黃。要隨塵世淺勻妝。似杏著花尤燦燦。比梅成實自雙雙。青枝巧綴碧鴛鴦。

菩薩蠻（癸巳自豫章檄歸）

扁舟又向瀟灘去。危檣卻繫江頭樹。風送雨聲來。涼生真快哉。電光雲際掣。白浪天相接。不用怯風波。風波平地多。

又

嬌花媚柳新妝靚。裙邊微露雙鴛並。笑靨最多情。春從兩臉生。香羅縈皓腕。翠袖籠歌扇。餘韻遏雲低。梁塵簌簌飛。

又

晚風斷送歸颿急。重城回首天連碧。猶有小樓情。西山如舊青。故園今漸近。應卜燈花信。一

喜一牽縈。平分兩處心。

又（用三謝詩。故人心尚遠。故心人不見之句）

故人。心上如天遠。故心人更何由見。腸斷楚江頭。淚和江水流。

江流空滾滾。淚盡情無盡。不

怨薄情人。人情逐處新。

又（瑞蔭秋望）

小春愛日融融暖。危亭望處晴嵐滿。江靜綠迴環。橫陳無際山。探嶺頭梅。點紅開未開。

清霜欺遠樹。黃葉風扶去。試

又（可人梅軸）

瓊英爲惜輕飛去。可人妙筆移縑素。瀟灑向南枝。永無開謝時。必問逃禪人。人間水墨仙。

閨房難並秀。自是春風手。何

又（韻勝竹屏）

多情可是憐高節。濡毫幻出真清絕。雨葉共風枝。天寒人倚時。用翠成林。坡仙曾賞音。

蕭蕭襟韻勝。堪與梅兄並。不

又（玉山道中）

霜風落木千山遠。護霜雲散晴曦暖。瀟灑小旗亭。山花照眼明。

粉妝勻未了。一捻春風小。把

酒恨匆匆。深情眉媚中。

又（梅林渡寄興伯）

行舟蕩漾鳴雙槳。江流爲我添新漲。指顧隔汀洲。人歸心尙留。

陽關三疊舉。怨柳離情苦。何

似莫來休。不來無許愁。

又（永州牧人亭和聖徒季行韻）

故人話別情難已。故人此別何時會。江上駐危亭。離懷牽故情。

悠悠東去水。簇簇漁村市。應

記合江濱。瀟湘別故人。

又（春陵迎陽亭）

西風又老瀟湘樹。翩翩黃葉辭枝去。斜日淡雲籠。溪山烟靄中。

危闌閒獨倚。穀浪連天際。殘

角起江城。書空征雁橫。

又（辛亥二月雪）

東皇不受人間俗。爲嫌花柳紛紅綠。特地闕春和。連延雨雪多。

梅梢封玉蕊。春半開猶未。還

恐怨韶華。吹綿作柳花。

又（鑑止蓮花穿闌干開）

水風葉底波光淺。亭亭翠蓋紅妝面。六月下塘春。平鋪雲錦屏。

露涼輕點綴。綠映珍珠袂。渾

似太真妃倚闌嬌困時。

好事近（垂絲海棠）

紅杏已香殘。唯有海棠堪惜。天氣著花如酒醉。嬌紅無力。娉娉嬝嬝倚東風。柔媚忍輕摘。憑仗暮寒要住。賽錦川春色。

又（癸巳催妝）

雲度鵲成橋。青翼已傳消息。綵仗蕊宮初下。應人間佳夕。龍烟縹緲散妝樓。香霧擁搖席。準擬洞房披扇。看仙家春色。

醉蓬萊（重明節丙辰長汝）

正金風零露。玉宇生涼。晚秋天氣。華渚流虹。應生商佳瑞。電繞神樞。慶綿宗社。御寶圖宸極。脫屣塵凡。遊心澹泊。逍遙物外。聖子神孫。祖皇文母。上接三宮。下通五世。至盛難名。亙古今無比。誕節重明。燕樂和氣。動普天均被。壽祝南山。尊傾北海。臣鄰歡醉。

漢宮春（壬子莆中鹿鳴宴）

丹詔天飛。見皇家願治。側席英才。鴻儒抱負。素蘊壯志。興懷文場。戰勝便從此。脫迹蒿萊。人共羨。鹿鳴勸駕。還因計吏偕來。先春占早。爭開。是人間第一。唯有江梅。莆中舊傳盛事。六亞三魁。桃花浪暖。更平地聽一聲雷。藍綬嬾蘆。鞭駿馬。長安走徧天街。

廳前柳

晚秋天過暮雨雲容斂月澄鮮正風露淒清處砌蛩喧更黃葉舞翩翩念故里千山雲水隔被名韁利鎖縈牽莫作悲秋意對尊前且同樂太平年

又(丹桂)

景清佳正倦客凝秋思浩無涯遞十里香芬馥桂初華向碧葉露芳葩為粟粒鵝兒情淡薄倩西風染就丹砂不比黃金雨燦餘霞送幽夢到仙家

訴衷情(鑑止初夏)

清和時候雨初晴密樹翠陰成新篁嫩搖碧玉芳徑綠苔深雛燕語乳鶯聲暑風輕簾旌微動沈篆烟消午枕除清

又(莆中酌獻白湖靈惠妃三首)

神功聖德妙難量靈應著莆陽湄洲自昔仙境宛在水中央孚惠愛備祈禳降嘉祥雲車風馬盼嚮來歆桂酒椒漿

又

茫茫雲海浩無邊天與水相連舳艫萬里來往有禱必安全專掌握雨暘權屬豐年瓊厄玉醴饗此精誠福慶綿綿

又
威靈千里護封圻。十萬戶歸依。白湖宮殿雲聳，香火盡虔祈。
傾壽酒，誦聲詩。諒遙知。民康俗阜，雨潤風滋，功與天齊。

一翦梅（莆中賞梅）

雪裏盈盈玉破花。遐想風流。壓盡京華。點酥團粉任欹斜。獨露春妍。問誰似他。有酒何須稚子賒。訪戴歸來。倚櫂溪涯。人生得意定談誇。除却西湖。不記誰家。

又（丙辰冬長沙作）

暖日烘梅冷未甦。脫葉隨風。獨見枯株。先春占早又何如。玉點枝頭。猶自蕭疎。江北江南景不殊。雪裏花清。月下香浮。他年調鼎費工夫。且與藏春。處士西湖。

朝中措（莆中共樂台）

斜陽留照有餘紅。烟靄淡冥濛。麥隴青搖一望，前山翠失雙峯。
高臺徙倚，松飄逸韻，梅減冰容。俯眎塵寰如掌，翩然我欲乘風。

又

疎疎簾幕映娉婷。初試曉妝新。玉腕雲邊緩轉，修蛾波上微顰。
鉛華淡薄，輕勻桃臉，深注櫻脣。還似舞鸞窺沼，無情空腦行人。

又(乙未中秋夢湖舟中)

西風著意送歸船。家近總欣然。去日梅開爛熳，歸時秋滿山川。京華倦客，難堪羈思，歷盡愁邊。寄語姮娥休笑，月圓人亦團圓。

又(山樊)

亂山春過雪成堆。七里遞香回。蕊簇玲瓏金粟，花裝碎屑玫瑰。蘭衰梅謝，桃粗李俗，誰與追隨。清絕殿春仙侶，清風吹破茶蘼。

又(月季)

開隨律琯度芳辰。鮮豔見天真。不比浮花浪蕊，天教月月常新。薔薇顏色，玫瑰態度，寶相精神。休數歲時月季，仙家闌檻長春。

又(丁亥益陽賀王宜之)

眉間黃色喜何如。花縣拜恩初。五品榮頒命服，十行祇奉天書。萱堂繡閣，均封大邑，盛事同居。此日銀章朱紱，行看玉帶金魚。

點絳脣(和翁子西)

日暖風暄。殿春瓊蕊依臺榭。雪堆花架。不用丹青寫。瑩徹精神，映月唯宜夜。幺幺香帕。倩風扶下。碎玉殘妝卸。

又
漠漠春陰褪。花時候。餘寒峭。數聲啼鳥。喚起簾櫳曉。

雲鬢慵梳。淡拂春山小。情多少。亂縈愁

抱。風裏垂楊裊。

又（同會無玷觀沈賽娘棋）

鼻鼻娉娉。可人尤賽娘。風韻花嬌玉潤。一捻春期近。

占路藏機。已向碁中進。但休問。酒旗花

撲蝴蝶

清和時候。熏風來小院。琅玕脫箨。方塘荷翠颭。柳絲輕度流鶯。畫棟低飛乳燕。園林綠陰初徧。景何限。輕紗細葛。綸巾和羽扇。披襟散髮。心清塵不染。一杯洗滌無餘。萬事消磨去遠。浮名薄利休羨。

醉桃源（桐江舟中）

微雲掃盡碧虛寬。月華光影寒。山河表裏鑑中看。沈沈清夜闌。風細細。露溥溥。神遊八極間。九霄回首望塵寰。悠然醉夢還。

又（單葉茶蘼）

纖枝延蔓走青虬。風清體更柔。故饒檀蕊著花稠。疎疎如綴旒。瓊作鬢。玉成裘。玫瑰應輩流。

惜香愁怕罨搔頭。寧隨口事休。

又

杜鵑花發映山紅。韶光覺正濃。水流紅紫各西東。綠肥春已空。閒戲蝶。嬾遊蜂。破除花影重。問春何事不從容。憂愁風雨中。

賀聖朝（和宗之梅）

千林脫落羣芳息。有一枝先白。孤標疎影壓花叢。更清香堪惜。吟情無盡。賞音未已。早紛紛。藉藉想貪結子去調羹。任叫雲橫笛。

踏莎行

白雪開殘紅雲吹盡。園林新綠迷芳徑。榆錢不解買青春。隨風亂點蒼苔暈。紫燕飛忙黃鸝聲嫩。日長煙暖游蜂困。憑高念遠思無窮。那堪宿酒厭厭病。

又

萬事隨緣。一身須正。功名富貴皆前定。多圖廣計要爭強。如何人力將天勝。極費機謀。徒勞奔競。到頭畢竟由他命。安時處順得心閒。飢餐困寢虧賢甚。

憶秦娥（和劉希宋）

傷離索。不堪涼月穿珠箔。穿珠箔。料應別後。粉銷瓊削。無聊倚徧西樓角。枝頭幾誤驚飛鵲。

驚飛鵲。先來憔悴。更逢搖落。

武陵春（和王叔度桃花）

一陣曉風花信早。先到小桃枝。冉冉紅雲映翠微。開宴憶瑤池。零亂分飛貪結子。芳徑自成蹊。消得劉郎去路迷。腸斷武陵溪。

又（信豐瑋翠閣）

乍雨籠晴雲不定。芳草綠纖柔。燕語鶯啼小院幽。春色二分休。試凭危闌凝遠目。山與水光浮。滾滾閒愁逐水流。流不盡許多愁。

清平樂（萍鄉必東館）

舞風輕燕。繚繞深深院。晝永人間簾不捲。時聽鶯簧巧囀。清和天氣陰陰。南風初奏熏琴。喚起午窗新夢。愁添一掬歸心。

又（陽春亭）

一宵風雨。春與人俱去。春解再來花作主。只有行人無據。殷勤滿酌離觴。陽關唱起愁腸。苦恨無情杜宇。聲聲叫斷斜陽。

又（迎春花一名金腰帶）

纖穠嬌小。也解爭春早。占得中央顏色好。裝點枝枝新巧。東皇初到江城。殷勤先去迎春。乞

與黃金腰帶壓持紅紫紛紛

鵲橋仙（歸舟過六和塔）

風波平地塵埃撲面。總是爭名競利。悟時不必苦貪圖。但言任流行坎止。忽來忽去。何榮何辱。天也知人深意。一颿風送過桐江。喜跳出瑤璃井裏。

又（安仁道中雪）

同雲空幕。狂風浩浩。激就六花飛下。山川滿目白模糊。更茅舍溪橋瀟灑。玉田銀界。瑤林瓊樹。光映乾坤不夜。行人不爲旅人忙。怎解識天然圖畫。

又（同教國華飲。聞啼鵲。卽席作）

春光已暮。花殘葉密。更值無情風雨。斜陽芳樹翠煙中。又聽得聲聲杜宇。血流無用。離魂空斷。只撓淒涼爲旅。在家誰道不如歸。你何似隨春歸去。

又（丁巳七夕）

明河風細。鵲橋雲淡。秋入庭梧先墜。摩孩羅荷葉傘兒輕。總排列雙雙對對。花瓜應節。蛛絲卜巧。望月穿針樓外。不知誰見女牛忙。漫多少人間歡會。

謁金門

風和雨。又送一番春去。春去不知何處住。惜春無覓處。柳老空搏香絮。鶯嬌乍遷芳樹。回念

故園如舊否。不堪聞杜宇。

又（丁酉冬昌山渡）

江水綠。江上數峰如簇。喚渡小舟來岸北。筍輿行太速。

素豔窗紗籠玉。不負看花心目。今夜

又（就岡迳隱尉）

沙畔路。記得舊時行處。藹藹疎煙迷遠樹。野航橫不渡。

竹裏疎花梅吐。照眼一川鷗鷺。家在

又

風雨急。紅紫又還狼藉。嫩綠團枝苔徑溼。簾開雙燕入。

院靜晝閒人寂。一縷水沈煙直。心事

又（常山道中）

風策策。山迴暮煙橫白。浙瀝穿林翻敗葉。鬢懷愁倦客。

問宿荒村山驛。誰識離情脈脈。雁足

又（和從善二首）

花夜雨。渺渺綠波南浦。擘絮晴雲山外吐。凝情誰共語。

十二玉梯空杳。閒卻鎖窗朱戶。久客

念歸歸未許。寸心愁萬縷。

又

風雨半。春鎖綠楊深院。幕浪不翻香穗捲。輕寒閒便面。歸興新來不淺。勾引閒愁撩亂。一枕春醒誰與管。曉鶯驚夢斷。

東坡引（別周誠可）

相看情未足。離觴已催促。停歌欲語眉先蹙。何期歸太速。如今去也。無計追逐。怎忍聽陽關曲。扁舟後夜灘頭宿。愁隨煙樹簇。

又（癸巳豫章）

飛花紅不聚。都因夜來雨。枝頭冷落情如許。東風誰是主。看看滿地。堆卻香絮。但目斷章臺路。殘英剝蕊留春住。春歸何處去。

又（龍江趙去非席上）

杯行情意密。今宵是何夕。行人此別真堪惜。愁腸空悶鬱。明朝去也。回首相憶。要留戀如何得。無端聚雨飄何急。人來心上滴。人來心上滴。

生查子（宜春記賓亭別王希白庚）

梅從隴首傳。柳向郵亭折。鴛瓦曉霜濃。掠面凝寒色。相逢意便親。欲去如何說。我亦是行人。

更與行人別。

又（萍鄉陽春亭）

千山擁翠屏。一水縈羅帶。雨過水痕添。雲散山容在。

亭高景最幽。天迴風尤快。啼鳥一聲閒。

喚起情無奈。

又

遲遲春晝長。冉冉東風軟。寒食乍晴天。紅紫芳菲徧。

前峯積翠橫。新漲按藍遠。向晚淡煙迷。

一段屏山展。

又（丙午鐵爐岡回）

春光不肯留。風雨催將去。紅逐故園塵。綠滿江南樹。

陰晴寒食天。寂寞西郊路。芳草織新愁。

悵望人何處。

又

庭虛任雀喧。院靜無人到。回首十年非。賴得知幾早。

心隨香篆銷。意與梅花好。萬事轉頭空。

一笑吾身老。

少年遊（梅）

玉壺冰結暮天寒。朔吹繞闌干。雪破梢頭。香傳花外。春信入江南。巡檐索笑情何限。一點已

微酸待得黃垂。冥冥煙雨。綠樹裊金丸。

又

冰霜凝凍臘殘時。暖律漸推移。綵勝羅幡。土牛春杖。和氣與春回。花心柳眼知時節。微露向陽枝。喜入新春。稱心百事。如意想都宜。

小重山（農人以夜雨晝晴爲夜春）

樂歲農家喜夜春。朝來收宿霧。快新晴。雲移日轉。午風輕。香羅薄。喧暖困游人。積水滿春塍。綠波翻鬱鬱。露秧針。幸無離緒。苦牽情。煙林外。時聽杜鵑聲。

霜天曉角（三衢道中）

雨餘風勁。霧重千山暝。茆舍寒林相映。分明是。書圖景。去程何日定。天遠長安近。喚起新愁無盡。全沒箇。故園信。

又（舟行清溪）

艤舟砂磧。秋淨波澄碧。極目青山橫遠。懸崖斷。擁蒼壁。傍巖漁艇集。渡頭人物立。八景瀟湘真畫。雲籠日晚。風急。

江南好

天共水。水遠與天連。天淨水平寒月漾。水光月色兩相兼。月映水中天。人與景。人景古難全。

景若佳時心自快。心還樂處景應妍。休與俗人言。

關河令（清遠軒晚望）

亭臯霜重飛葉滿。聽西風斷雁。閒凭危闌。斜陽紅欲斂。行人歸期太晚。誤髣髴征帆幾點。水遠連天。愁雲遮望眼。

又（己亥宜春舟中）

江頭伊軋動柔櫓。漸楚天欲暮。浩蕩輕鷗。波間自容與。岸蓼汀蘋無緒。更滿目瀟疎江樹。此意何窮。憑誰圖畫取。

採桑子（三月晦必東館大雨）

連朝雨驟驅春去。瓦注盆傾。不記初春。潤柳催花忒有情。春光解有重來日。甯耐休爭。待得秋深。聽你無聊點滴聲。

又（櫻桃花）

梅花謝後櫻花綻。淺淺勻紅。試手天工。百卉千葩一信通。餘寒未許開舒妥。怨雨愁風。結子筠籠。萬顆勻圓訝許同。

浪淘沙（杏花）

絳萼襯輕紅。綴簇玲瓏。天桃繁李一時同。獨向枝頭春意鬧。嬌倚東風。飛片入簾櫳。粉淡香

濃。鳳簾聲斷月明中。只恐明朝風雨惡。燕嘴泥融。

又（桃花）

桃萼正芳菲。初占春時。蒸霞燦錦望中迷。料出繁枝臨曲沼。鸞鑑妝遲。蜂蝶鎮相依。天氣融怡。空教追憶武陵溪。片片漫隨流水去。風暖煙霏。

又（柳）

搖曳萬絲風。輕染煙濃。鵝黃初褪綠茸茸。雨洗雲嬌春向晚。雪絮空濛。車馬灞橋中。別緒匆匆。只知攀折怨西東。不道曉風殘月岸。離恨無窮。

雙頭蓮令（信豐雙蓮）

太平和氣兆嘉祥。草木總成雙。紅苞翠蓋出橫塘。兩兩鬪芬芳。幹搖碧玉並青房。仙髻擁新妝。連枝不解引鸞皇。留取映鴛鴦。

畫堂春（梅）

西真仙子宴瑤池。素裳瓊豔冰肌。瑞籠香霧撲銖衣。鳳翥鸞飛。玉骨解凌風露。鉛華不涴凝脂。戍樓羌管正孤吹。月淡煙低。

南柯子（送朱辰州千方壺小隱）

木落千山瘦。風微一水澄。清霜暖日快歸程。喚渡沙頭。款款話離情。傍岸漁舟集。橫空雁字

輕。凭闌凝望眼增明。一片瀟湘真個畫難成。

西江月（丁巳長沙大閱）

笳鼓旌旗改色，弓刀鎧甲增明。攢花簇隊馬蹄輕。稟聽元戎號令。羊祜輕裘臨陣，亞夫細柳屯營。觀瞻已聳定王城。飛虎成名日振。

又（同蔡受之趙中甫巡城飲于南楚樓）

森森澄清波面，依依紫翠山光。危闌徒倚對斜陽。山影波流蕩漾。世事一番醒醉，人生幾度炎涼。高情收拾付觥觴。何至羲皇人上。

洞仙歌（丁巳元夕大雨）

元宵三五正好嬉遊去。梅柳蛾蟬鬪濟楚。換鞦兒添頭面。只等黃昏恰恨有些子。無情風雨。心忙腹熱沒頓。渾身處。急把燈臺炎艾炷。做匙婆許蔥油麵。灰畫葫蘆更漏轉。越睩不停不住。待歸去猶自意遲疑。但無語空將眼兒厮覷。

南鄉子（尹先之索淨圓子詞）

元夜景尤殊。萬斛金蓮照九衢。鎚拍鼓湯都賣得爭如。甘露杯中萬顆珠。應是著工夫。腦麝濃熏費小廚。不比七夕黃蠟做。知無。耍底圓兒糖上浮。

行香子

春日遲遲。春景熙熙。漸郊原芳草萋萋。天桃灼灼。楊柳依依。見燕喃喃。蜂簇簇。蝶飛飛。閒庭寂寂。曲沼漪漪。更鞦韆紅索垂垂。遊人隊隊。樂意嬉嬉。盡醉醺醺。歌緩緩。語低低。

卜算子（立石道中）

晴日斂春泥。陌上東風軟。料峭寒禁花柳閒。枉恨春工淺。綠漲一江深。黛潑千山遠。目斷平蕪無際愁。數盡征鴻點。

又（丙午春卽席和從善）

楊柳褪金絲。豔杏搖紅影。欲雨還晴二月天。春色渾無定。曉夢不堪驚。午晝新來永。一掬歸心萬疊愁。空惹長亭恨。

又（和從善壽安堂賞海棠）

嬌豔醉楊妃。輕裊憐飛燕。人在昭陽睡足時。初試妝深淺。一段錦新裁。萬思來何遠。高燭休教照夜寒。媚臉融香豔。

又（和徐師川韻贈歌者）

綠暗柳藏煙。紅淡花經雨。更著如花似玉人。豔態嬌波注。纖手捧瑤卮。緩遏歌雲縷。只恐鶯花不解留。還逐東風去。

又（赴春陵和向伯元送行詞）

雲斂峭寒輕。雨漲春波渺。旅枕無堪夢易驚。啼鳩聲催曉。尙憶故園花。紅紫爲容好。世路崎嶇長短亭。來往何時了。

伊洲三臺（丹桂）

桂華移自雲巖。更被靈砂染丹。青露溼醅顏。醉乘風下臨世間。素娥襟韻蕭閒。不與羣芳並看。藪藪絳綃單。覺身輕夢回廣寒。

坦庵詞跋

介之汴人。一名師俠，生於金閨。捷於科第，故其詞亦多富貴氣。或病其能作淺淡語，不能作綺豔語。余正謂諸家頌酒麴色，已極濫觴，存一淡妝，以愧濃抹，亦初集中放翁一流也。湖南毛晉識。



惜香樂府十卷

趙長卿

惜香樂府目錄

卷一 春景

水龍吟一調

花心動一調

蝶戀花一調

南歌子一調

青玉案一調

驀山溪一調

江神子一調

青玉案一調

點絳脣五調

小重山二調

卷一 春景

水龍吟四調

浣溪沙三調

長相思一調

目

念奴嬌一調

踏莎行一調

鷓鴣天二調

臨江仙一調

醉蓬萊一調

蝶戀花一調

醉蓬萊一調

南歌子一調

鷓鴣天五調

菩薩蠻二調

滿庭芳一調

南歌子一調

江神子一調

一叢花一調

雨中花慢一調

虞美人二調

臨江仙一調

醉落魄一調

探春令一調

聲聲慢二調

朝中措一調

感皇恩一調

南歌子一調

桃源憶故人一調

探春令一調

錄

宋六十一名家詞

菩薩蠻一調
清平樂二調
小重山一調
探春令十二調

醜奴兒一調
更漏子一調
蝶戀花一調

浣溪沙一調
訴衷情一調
鷓鴣天二調

卷二 春景

寶鼎現一調
念奴嬌二調
漁家傲一調
謁金門一調
畫堂春二調
菩薩蠻一調
瑞鶴仙一調
清平樂一調

青玉案一調
阮郎歸一調
念奴嬌一調
眼兒媚一調
卜算子一調
點絳脣一調
臨江仙一調
朝中措一調

燭影搖紅一調
虞美人一調
玉樓春一調
菩薩蠻一調
念奴嬌二調
鷓鴣天二調
一叢花一調
柳梢青一調

卷四 夏景

花心動一調
滿庭芳二調

鼓笛慢一調
好事近一調

念奴嬌一調
虞美人一調

醉蓬萊二調

醉落魄一調

蝶戀花一調

新荷葉一調

減字木蘭花一調

雨中花令一調

西江月一調

浣溪沙二調

西江月一調

浣溪沙二調

卷五 秋景

念奴嬌二調

滿庭芳一調

洞仙歌一調

洞仙歌一調

瑞鶴仙一調

蕪山溪一調

賀新郎一調

卜算子一調

鷓鴣天一調

臨江仙一調

卜算子一調

畫堂春一調

卜算子一調

鷓鴣天一調

浣溪沙一調

青玉案二調

聲聲慢一調

水調歌頭一調

虞美人一調

夏雲峯一調

臨江仙二調

水調歌頭一調

踏莎行一調

阮郎歸一調

江神子一調

朝中措一調

臨江仙一調

浣溪沙一調

清平樂二調

菩薩蠻一調

蝶戀花一調

謁金門一調

瑞鶴仙一調

蕪山溪一調

醉蓬萊一調

感皇恩一調

鷓鴣天一調

踏莎行一調

目錄

宋六十名家詞

臨江仙一調

菩薩蠻一調

好事近一調

採桑子一調

似娘兒一調

清平樂二調

醉花陰一調

卷之八 冬景

滿庭芳一調

一翦梅一調

永遇樂一調

念奴嬌一調

祝英台近一調

西江月一調

減字木蘭花一調

鷓鴣天一調

醉落魄一調

卜算子一調

思越人一調

朝中措二調

蝶戀花一調

一翦梅一調

菩薩蠻二調

御街行一調

臨江仙一調

玉蝴蝶一調

似娘兒一調

點絳脣三調

眼兒媚一調

好事近一調

驀山溪一調

好事近一調

點絳脣一調

小重山一調

洞仙歌一調

夜行船一調

南歌子一調

浣溪沙一調

有有令一調

南歌子一調

瀟湘夜雨一調

柳梢青一調

柳梢青一調

別怨一調

霜天曉角一調

浣溪沙三調

點絳脣一調
玉樓春一調
阮郎歸一調
憶秦娥一調

卷十七 總詞

水龍吟一調
念奴嬌一調
蕙山溪一調
蕩山溪一調
臨江仙一調
御街行一調
瑞鷓鴣二調
採桑子一調
眼兒媚三調

卷八 總詞

水龍吟一調

鷓鴣天一調
鵲橋仙一調
霜天曉角二調
如夢令一調

望江南一調
菩薩蠻三調
菩薩蠻一調

水調歌頭一調
水調歌頭一調
念奴嬌一調
青玉案一調
漁家傲一調
一叢花一調
行香子一調
蝶戀花三調
臨江仙三調

水龍吟一調
水龍吟一調
瑞鶴仙一調
虞美人二調
江神子一調
天仙子一調
夜行船一調
鷓鴣天四調
惜奴嬌一調

水調歌頭一調

水龍吟一調

目

錄

五

宋六十名家詞

訴衷情一調

好事近一調

青杏兒一調

漢宮春一調

玉團兒一調

鷓鴣天二調

眼兒媚一調

減字木蘭花一調

品令一調

臨江仙一調

如夢令一調

滿江紅一調

眼兒媚一調

更漏子一調

雨中花慢一調

南歌子一調

浣溪沙一調

如夢令一調

夜行船一調

柳梢青一調

夜行船一調

卜算子一調

賀新郎一調

簇水一調

浣溪沙二調

柳梢青一調

臨江仙一調

浪淘沙一調

浣溪沙一調

眼兒媚一調

浣溪沙三調

浪淘沙一調

眼兒媚一調

卷九 總詞·好事近以下俱賀生辰

南鄉子二調

點絳脣二調

如夢令二調

柳梢青一調

念奴嬌一調

謁金門二調

菩薩蠻二調

菩薩蠻一調

好事近一調

好事近二調

一翦梅一調

畫堂春一調

長相思一調

朝中措三調

柳長春一調

武陵春一調
鵲橋仙一調

卷上 補遺

柳梢青一調
杏花天一調
眼兒媚一調
浪淘沙一調
菩薩蠻一調
思越人一調

臨江仙一調

賀新郎一調
臨江仙一調
菩薩蠻一調
謁金門一調
清平樂一調
武陵春一調

喜遷鶯一調

東坡引一調
鞦韆一調
鷓鴣天一調
侍香金童一調
好事近一調

惜香樂府目錄終

目錄

惜香樂府卷一

宋 趙長卿

春景

水龍吟(醜臘)

韶華迤邐三春暮。飛盡繁紅無數。多情爲與牡丹長約。年年爲主。曉露凝香。柔條千縷。輕盈清素。最堪憐。玉質冰肌。婀娜江梅。漫休爭妬。翠蔓扶疎。隱映似碧紗籠罩。越溪遊女。從前愛惜。嬌姿終日。愁風怕雨。夜月一簾。小樓魂斷。有思量處。恐因循易嫁。東風爛熳。暗隨春去。

念奴嬌

小春時候。見早梅吐玉。裁瓊妝白。點點枝頭。光照眼。惱損柔腸。情客暗裏芳心。出羣標致。經歲成疎隔。如今風韻。何人依舊。冰雪冷豔。瀟瀟天然。香姿肯易。許遊蜂狂蝶。夜半黃昏。擔帶了多少清風。明月宋玉雖悲。元超雖恨。見了千愁歇。東君還許。有情取次攀折。

滿庭芳

爆竹聲飛。屠蘇香細。華堂歌舞催春。百年消息。經半已凌人。念我功名冷落。又重是一歲還新。驚心事。安仁華鬢。年少已逡巡。明知生似寄。何須苦苦。役慕蹄輪。最難忘。通經好學沈淪。況是讀書萬卷。辜負他。此志難伸。從今去。燈窗勉進。雲路豈無因。

花心動（客中見寄暖香書院）

風輕寒輕。暗香飄撲。面無限清楚。乍淡乍濃。應想前村。定是早梅初吐。馬兒行過坡兒下。危橋外。竹梢疎處。半斜露。花花蕊蕊。燦然滿樹。一餉看花凝竚。因念我西園玉英真素。最是繫心。婉婉精神。伴得水雲仙侶。斷腸沒奈人千里。無計向釵頭頻覷。淚如雨。那堪又還日暮。

踏莎行（春暮）

柳暗披風。柔柔宿雨。一番綠徧江頭樹。鶯花已過苦無多。看看又是春歸去。病酒情懷。光陰如許。閒愁悄沒安排處。新來著意與兜籠。身心苦役伊知否。

南歌子（早春）

春色烘衣暖。宮梅破鼻香。盡驅和氣入蘭堂。又是輕雲微雨下巫陽。酒帶歡情重。醺醺氣味長。晚來拂拭略梳妝。笑指一鉤新月上迴廊。

蝶戀花（春深）

宿雨新晴天色好。穠李夭桃。一麪都開了。燕子歸來深院悄。柳綿鋪徑無人掃。咫尺鶯花還又老。綠入閒階。只有青青草。參揣前期誰可表。此情不語知多少。

鷓鴣天（茶蘼）

鏤玉裁瓊莫比香。娉婷枝上殢春光。風流別有千般韻。割捨昏沈入醉鄉。蜂共蝶。儘乾忙。檀

心知未肯尋常。從來詩苦人消瘦。乞與幽囚富錦囊。

又（春暮）

蜂蜜釀成花已飛。海棠次第雨胭脂。園林檢點春歸也。只有縈風柳帶垂。情默默。恨依依。可人天氣日長時。東風恰好尋芳去。何事驅馳作別離。

江神子（梅）

年年長見傲寒林。壓羣英。有餘清。曾被芳心。紅日惱詩情。玉質暗香無恨意。偏婉婉。儘輕盈。今年瀟灑照岐亭。更芳馨。也崢嶸。無奈多情。終是惜飄零。誰與東君收拾取。怕風雨。挫瑤瓊。

南歌子（荆溪寄南徐故人）

春思濃如酒。離心亂似綿。一川芳草綠生煙。客裏因循重過豔陽天。屈指歸期近。愁眉淚灑然。無端還被此情牽。爲問桃源還有再逢緣。

臨江仙（賞花）

憶昔去年花下飲。團欒爭看醪醑。酒濃花豔兩相宜。醉中嘗記得。裙帶寫新詩。還是春光驚已暮。此身猶在天涯。斷腸無奈苦相思。憂心徒耿耿。分付與他誰。

一叢花（杏花）

柳鶯啼曉夢初驚。香霧入簾清。胭脂淡注宮妝雅。似文君猶帶春醒。芳心婉婉。媚容綽約。桃李

總消聲。相如春思正縈縈。無奈惜花情。曲闌小檻幽深處。與殷勤。遮護娉婷。桃黃魏紫。十分顏色。終不似。輕盈。

青玉案（春暮）

天涯目斷江南路。見芳草。迷風絮。綠暗花梢春幾許。小桃寂寞。海棠零亂。飛盡胭脂雨。子規聲裏山城暮。月挂西南夢回處。滿抱離愁推不去。雙眉百皺。寸腸千縷。苦事憑鱗羽。

醉蓬萊（賞郡圃芍藥）

是三春已暮。浪蕊彫殘。牡丹零落。獨殿清和。有佳名芍藥。淺淺芳叢。繡幢鼎鼎。更豔香綽約。渾似揚州。畫樓捲起。翠簾紅幕。倚檻輕盈萬嬌千媚。故整霞裙。笑花寂寞。太守風流。擁笙歌圍著。坐上詩人。二千里外。念此身飄泊。客眼看花。歸心對酒。番成蕭索。

雨中花慢（春雨）

宿靄凝陰。天氣未晴。峭寒勒住羣葩。倚闌無語。羞辜負年華。柳媚梢頭翠眼。桃蒸原上紅霞。可堪那。盡日狂風蕩蕩。細雨斜斜。東君底事。無賴薄倖。著意殘害鶯花。惟是我惜春情重。說奈咨嗟。故與殷勤索酒。更將油幕高遮。對花歡笑。從教風雨。著醉酬他。

驀山溪（早春）

曉來雨霽。弱柳搖新翠。麗日媚東風。正不暖不寒天氣。幽禽弄舌。花上訴春光。高一餉。低一餉。

清曉圓還碎。那知時勢。春亦元無意。草木自敷榮。似人生功名富貴。我咱諳分。隨有亦隨無。不妬富。不憎貧。歌酒閒遊戲。

蝶戀花

芍藥開殘春已盡。紅淺香乾。蝶子迷花陣。陣是清和人正困。行雲散後空留恨。小字金書頻與問。意曲心誠。未必他能信。千結柔腸愁寸寸。細釵幾日重相近。

虞美人（清婉亭賞酴醾）

江梅雖是孤芳早。爭似酴醾好。凡紅飛盡草萋迷。婀娜枝頭纔見細腰肢。玉容消得仙源惜。滿架香堆白。檀心應共酒相宜。割捨花前猛飲倒金卮。

又

冰塘淺綠生芳草。枝上青梅小。柳眉愁黛爲誰開。似向東君喜見故人來。碧桃銷恨猶堪愛。妃子今何在。風光小院酒尊同。向晚一鉤新月落花風。

江神子

小溪清淺照孤芳。蕊珠娘。暗傳香。春染粉容。清麗傅宮妝。金縷翠蟬曾記得。花密密。過彫牆。而今冷落水雲鄉。念平康。轉情傷。夢斷巫雲。空恨楚襄王。冰雪肌膚消瘦損。愁滿地。對斜陽。

醉蓬萊

是平分春色。夢草池塘。暖風簾幕。昨夜三台。燦天邊芝角。自是君家慶流澤遠。降生申崧岳。厚德溫良。高才粹雅。淵源學博。何事丹墀。尙淹闊步。未許中原少勤方略。且對笙歌醉黃金錯。落蕊洞珠宮。媚人桃李。趁青春綽約。綠意紅情。成陰結子。五雲樓閣。

臨江仙(暮春)

春事猶餘十日。吳蠶早已三眠。多情忍對落花前。酴醾飄暖雪。荷葉媚晴天。香淡無心浸酒。綠浮可意邀船。時光堪恨也堪憐。單衣三月暮。歌扇一番圓。

青玉案(社日客居)

去年社日東風裏。向三徑開桃李。脆管危絃隨意起。綠陰紅影。暖香繁蕊。伴我醺醺醉。今年社日空垂淚。客舍看花甚情意。江上危樓愁獨倚。欲將心事。巧憑來燕。說與人憔悴。

南歌子(春暮送別)

枝上紅飛盡。梢頭綠已勻。遊絲柳絮媚青春。向晚暖風簾幕。練光新。春已匆匆去。那堪話別情。劉郎幾日便登程。告你覓些歡笑。送行人。

醉落魄(春深)

麥畦勻綠。枝頭屑屑飛梅玉。傷心何事人南北。斷盡回腸。忍聽陽關曲。倚窗青蔭亭亭竹。好風敲動聲相續。夜闌怕見銀臺燭。會得離情。他也淚簌簌。

點絳脣(春思)

密雨隨風。昨來一夜簷聲溜。奈何傷倦。官路梅花瘦。賦得多情。怕到春時候。如今一病非因酒。試問君知否。

又(柳)

春到垂楊。嫩黃染就金絲軟。麗晴新暖。湧翠千山遠。爲甚年年。眉向東風展。閒消遣。欲歸猶懶。漁笛天將晚。

又(春半)

輕暖輕寒。賞花天氣春將半。柳搖金綫。求友鶯相喚。玉腕蛾眉。意眼頻頻盼。歌喉軟。玉卮受勸。一醉應相拚。

又(春雨)

夜雨如傾。滿溪添漲桃花水。落紅鋪地。枝上堆濃翠。去年如今。常伴醪醖醉。今年裏。離家千里。獨搵東風淚。

又(春暮)

啼鳥喃喃。恨春歸去春誰管。日和風暖。綠暗閒庭院。還憶當年。綺席新相見。人已遠。水流雲散。空結多情怨。

鷓鴣天(詠)茶蘼

弱質纖姿儷素妝。水沈山麝鬱幽香。直疑姑射來天上。要惱人閒傅粉郎。簡釀酒。枕爲囊。更餘風味勝糖霜。肯如紅紫空姚冶。漫惹遊蜂戲蝶忙。

又

玉容應不羨梅妝。檀心特地賽爐香。半藏密葉牆頭女。勾引酡顏馬上郎。尊乏酒。且傾囊。蟹螯糟熟似黏霜。一年光景渾如夢。可惜人生忙處忙。

又

洗盡鉛華不著妝。一般真色自生香。飄飄何處淩波女。故故相迎馬上郎。尋譜謔。發詩囊。絕勝梅萼嫁冰霜。故山寒食依然在。勾引東坡旅興忙。

又

鏤玉裁瓊學靚妝。不須沈水自然香。好隨梅蕊妝宮額。肯似桃花誤阮郎。差傅粉。賤香囊。何勞傲雪與淩霜。新來勾引無情眼。拚爲東風一餉忙。

又

綽約肌膚巧樣妝。風流元自有清香。未應傅粉疑平叔。却笑荷花似六郎。浮蟻甕。入詩囊。學人消瘦怯風霜。午窗一枕莊周夢。甘作花心粉蝶忙。

探春令(元夕)

去年元夜正錢塘。看天街燈火。鬧蛾兒轉處。熙熙語。笑百萬紅妝女。今年肯把輕辜負。列筵煌千炬。趁閒身未老。良辰美景。款醉新歌舞。

小重山(殘春)

清晚窗前杜宇啼。遊仙驚夢醉。斷魂迷。起來窗下看盆池。傷春去。消瘦不勝衣。柳陌記年時。行雲音信杳。與心違。空教攢恨入雙眉。人已遠。紅葉莫題詩。

又(殘春)

綠樹陰陰春已休。羣花飄盡也。不勝愁。遊絲飛絮兩悠悠。迷芳草。日暖雨初收。深院小遲留。好香燒一炷。細煙浮。更聽羯鼓打梁州。惱人處。宿酒尙扶頭。

菩薩蠻

梅花有意舒香粉。舒香已得先春信。香與露華清。露濃愁殺人。酒多愁愈重。此意誰能共。淚

濕染衣斑。夜霜金縷寒。

梅花枝上東風軟。朝來吹散真香遠。雅淡有餘清。客心和淚傾。美人臨別夜。月晃燈初地。玉

枕小屏山。眉尖曾細看。

宋六十家名詞

惜香樂府卷一終



惜香樂府卷二

春景

水龍吟（梅詞）

煙姿玉骨塵埃外。看自有神仙格。花中越樣風流。曾是名標清客。月夜香魂。雪天孤豔。可堪憐惜。向枝間且作東風第一。和羹事期它日。聞道春歸未識。問伊家卻知消息。當時惱殺林逋。空繞團欒千百。橫管輕吹處。餘香散阿誰偏得。壽陽宮應有佳人待與。點新妝額。

又

葦綃開得仙花。就中最有佳人似。香肌勝雪。千般揉縛。禁他風雨。縞夜精神。繁春標致。忍教孤負。悵潘郎去後。河陽滿縣。知他是誰爲主。多謝文章吏部。遇啣杯。不曾輕許。應知這底。無言情緒。難爲分付。吹徧春風。耀殘明月。總傷心處。待閒亭夜永。遊人散後。作飛仙去。

又（鶯詞）

天教占得如簧。巧聲乍轉。千嬌媚。金衣襯著風流。模樣於中。可是紅杏香中。綠楊陰處。多應饒你。向黃昏。苦苦嬌啼。怨別。那堪更。東風起。別有詩腸。鼓吹未關。他等閒俗耳。雙柑斗酒。當時曾是。高人留意。南國春歸。上陽花落。止添憔悴。念啼聲欲碎。何人解作留春計。

又(雨詞)

淡煙輕靄濛濛。望中乍歇凝晴晝。纔驚一霎催花。還又隨風過了。清帶梨梢。暈含桃臉。添春多少。向海棠點點。香紅染徧。分明是胭脂透。無奈芳心滴碎。阻遊人踏青攜手。簷頭線斷。空中絲亂。纔晴卻又。簾幕閒垂處。輕風送一番寒峭。正留君不住。瀟瀟更下黃昏後。

聲聲慢(草詞)

濃芳滿地。秀色連天。和烟帶雨萋萋。幾許芳心。還解報得春暉。當時謝郎夢裏。似殷勤傳與新詩。卻爲甚。動長門怨感。南浦傷離。追想天涯行客。應解擁車輪。步步相隨。惆悵如絲。正是欲斷腸時。憑高望中不見。路悠悠。南北東西。春去也。怨王孫。猶自未歸。

又(柳詞)

金垂烟重。雪颺風輕。東風慣得多嬌。秀色依依。偏應綠水朱樓。腰肢先來太瘦。更眉尖惹得閒愁。牽情處。是張郎年少。一種風流。別後長隄目斷。空記得當時。馬上牆頭。細雨輕烟。何處夕繫扁舟。叮嚀再須折贈。勸狂風休挽長條。春未老。到成陰。終待共遊。

南歌子(暮春值雨)

黯靄陰雲覆。滂沱急雨飛。洗殘枝上亂紅稀。恰是褪花天氣。困人時。向曉春醒重。偃人起較遲。薄羅初見試輕衣。笑拭新妝。須要翦酴醾。

浣溪沙（春深）

寒食風霜最可人。梨花榆火一時新。心頭眼底總宜春。
薄暮歸吟芳草路。落紅深處鷓鴣聲。
東風疎雨喚愁生。

又（春暮）

柳老拋綿春已深。夾衣初試曉寒輕。別離無奈此時情。
先自愁懷容易感。不堪聞底子規聲。
西樓料得數回程。

又（早春）

不憤江海噴暗香。春前臘後正淒涼。霜風雪月忍思量。
斜倚幽林如有恨。玉鱗飛後轉堪傷。
時人那解惜孤芳。

朝中措（梅）

別來無事不思量。霜日最淒涼。凝想倚闌干處。攢眉應爲蕭郎。
梅花豈管人消瘦。只恁自芬
芳。寄語行人知否。梅花得似人香。

桃源憶故人（初春）

夜來一夜東風暖。春到桃腮柳眼。對景可堪腸斷。強把愁眉展。
花期惹起歸期。念前事從頭
付徧。凝想水遙山遠。空結相思怨。

長相思(春濃)

花飛飛。柳依依。簾捲東風日正遲。社前雙燕歸。
藥欄東。藥欄西。記得當時素手攜。彎彎月似眉。

感皇恩(柳)

景物一番新。熙熙時候。小院融和漸長晝。東君有意。爲憐纖腰消瘦。軟風吹破眉間皺。嫋嫋
枝頭輕黃微透。舞到春深轉清秀。錦囊多感。又更新來傷酒。斷腸無語凭闌久。

探春令(早春)

笙歌間錯。華筵啓。喜新春新歲。菜傳纖手。青絲輕細。和氣入東風裏。幡兒勝兒都姑婦。戴得
更忙戲。願新春已後。吉吉利利。百事都如意。

菩薩蠻(春深)

赤闌干外桃花雨。飛花已覺春歸去。柳色碧依依。濃陰春晝遲。
海棠紅未破。勻糝胭脂顆。風雨也相饒。應憐粉面嬌。

醜奴兒(春殘)

牡丹已過。酴醿謝。飛盡繁花。濃翠啼鴉。綠水橋邊賣酒家。年時攜手尋春去。滿引流霞。往事
堪嗟。猶喜潘郎鬢未華。

浣溪沙（寵姬小春）

簾捲輕風憐小春。荷枯菊悴正愁人。江梅喜見一枝新。料得主人偏愛惜，也應冰雪好精神。故園桃李莫生嗔。

清平樂（問訊梅花）

楚梅嬌小，好是霜天曉。宿酒惱人香暗繞。侵影碧波池沼。生成素淡芳容，不須抹黛勻紅。準擬成陰結子，莫教枉費春工。

又（早起聞鶯）

綺疏新曉，學語雛鶯巧。煙暖瑤階梧葉老。滿地東風芳草。少年不合風流，償他酒債花愁。望斷綠蕪春去，銷魂懶上層樓。

更漏子（暮春）

日彤彤，風蕩蕩。簾外柳花飛颺。紅有限，綠無窮。雨晴芳徑中。腸寸結，紫離別。還是去年時節。春暮也，子規啼。傷春三月時。

訴衷情（重臺梅）

檀心刻玉幾千里。開處對房櫺。黃昏淡月籠豔，香與酒爭濃。宜輕素，鄙輕紅。思無窮。化工著意，南南北北，一種東風。

小重山(楊花)

枝上楊花糝玉塵。晚風扶起處。雪輕盈。撲人點點細無聲。誰能惜。撩亂滿江城。忍淚未須傾。十年追往事。嘆流鶯。曉來雨過轉傷情。舖池綠。遺恨寄浮萍。

蝶戀花(春殘)

綠盡燒痕芳草徧。不暖不寒。切莫辜良宴。罨畫屏風開羽扇。薄羅衫子仙衣練。晚雨小池添水面。戲躍蘋鱗。又向波心見。持酒伊聽聲宛轉。尊前唱徹昭陽怨。

鷓鴣天(詠燕)

梁上雙雙海燕歸。故人應不寄新詩。柳梧陰裏高還下。簾幕中間去復回。追盛事。憶烏衣。王家巷陌日沈西。興亡無限驚心語。說向時人總不知。

又(春殘)

謾謾東風作雨寒。無言獨自凭闌干。綠肥紅瘦春歸去。恨逼愁侵酒怎寬。追往事。惜花殘。殘花往事總相關。風光臺上傷心處。此意人休作算閒。

探春令(尋春)

新元纔過。漸融和氣。先到簾幃。漫閒繞柳徑。花蹊裏。探看試。春來未。年時曾把春拋棄。與春光陪淚。待今春日。日花前沈醉。款細偎紅翠。

又(立春)

數聲回雁。幾番疎雨。東風回暖。甚今年立得春來晚。過人日。方相見。縷金幡勝教先辦。著工夫裁翦。到那時覩當須教滴惜。稱得梅妝面。

又(賞梅十首)

冰簷垂箸。雪花飛絮。時方嚴肅。向尋常搖曳。凡花野草。怎生敢誇紅綠。江梅孤潔無拘束。祇溫然如玉。自一般天賦。風流清秀。總不同羶俗。

又

而今風韻。舊時標致。總皆奇絕。再相逢還是春前臘後。粉面凝香雪。芳心自與羣花別。儘孤高清潔。那情懷最是與人好處。冷淡黃昏月。

又

彫牆風定。綺窗燭灺。沈吟獨坐。料雪霜深處。司花神女。暗裏焚百和。惱人一陣香初過。把清愁熏破。更那堪得冰姿玉貌。痛與惜則箇。

又

龜紗隔霧。繡簾鉤月。那時曾見。照影兒戲了千回百。轉素豔明於練。柔腸堆滿相思願。更重看幾徧。是天然不用施朱櫛翠。羞損桃花面。

又
疎籬橫出綠枝斜。露笑盈盈地。悄一似初覩東鄰女。有無限風流意。半開折得瓊瑰蕊。惹新香沾袂。放曲屏珠晃。膽瓶兒裏。伴我醺醺睡。

又
冰澌池面柳搖金線。春光無限。問梅花底事。收香藏蕊。到此方舒展。百花頭上俱休管。且驚開俗眼。看綠陰結子。成功調鼎。有甚遲和晚。

又
溪橋山路竹籬茆舍。淒涼風雨。被摧殘沮挫。精神依舊。無奈相思苦。東君故與收拾取。忍教他塵土。向綠窗繡戶。朱闌小檻。做箇名花主。

又
雨屏風瘦雪欺霜妬。時光牢落。怎奈向天與孤高出衆。一任旁人惡。凡花且莫相嘲謔。儘強伊寂寞。便饒他百計千方。做就醞藉。如何學。

又
樓頭月滿闌干風度。有人腸斷。爲多情役得。神魂撩亂。又被梅縈絆。對花沈醉應須拚。且尊前相伴。恨無端玉笛穿簾透幕。好夢還驚散。

又

清江平淡。暗香瀟灑。滿林風露。漸枝上也學楊花柳絮。輕逐春歸去。東君著意勤遮護。總留他不住。幸西園別有能言花貌。委曲關心悵。

惜香樂府卷二終

惜香樂府

惜香樂府卷三

春景

寶鼎現(上元)

囂塵盡掃。碧落輝騰。元宵三五。更漏永遲遲停鼓。天上人間當此遇。正年少、盡香車寶馬。次第追隨。士女看往來巷陌。連蕙簇起。星球無數。政簡物阜。清閒處。聽笙歌鼎沸。頻舉燈焰暖庭帷。高下紅影相交。知幾戶。恣歡笑道。今宵景色。勝卻前時幾度。細算來。皇都此夕。消得喧傳今古。綺席成行。爐噴裊沈檀輕縷。視遨遊綵仗。疑是神仙伴侶。欲飛去。恨難留住。漸到蓬瀛步。願永逢恁時恁節。且與風光爲主。

青玉案(殘春)

梅黃又見纖纖雨。客裏情懷兩眉聚。何處煙村啼杜宇。勸人歸去。早思家轉。聽得聲聲苦。利名縈絆何時住。惱亂愁腸成萬縷。滿眼興亡知幾許。不如尋個老松石畔。作個柴門戶。

燭影搖紅(深春)

梅雪飄香。杏花開豔。燃春晝。銅駝煙淡。曉風輕搖曳。青青柳。海燕歸來未久。向雕梁初成對偶。日長人困。綠水池塘。清明時候。簾幕低垂。麝煤煙噴黃金獸。天涯人去杳無憑。不念東陽瘦。

眉上新愁壓舊。要消遣除非帶酒。酒醒人靜。月滿南樓。相思還又。

念奴嬌（梅影）

銀蟾光滿。弄餘輝冷浸。江梅無力。緩引柔條浮素蕊。橫在閒窗虛壁。染紙揮毫。粉塗墨暈。不似今端的。天然造化。別是一般清瘦蹤跡。今夜翠葆堂深。夢回風定。因月才相識。先自離愁。那更被曉角殘更催逼。曙色將分。輕陰移盡。過眼難尋覓。江南圖上。畫工應爲描得。

又（落梅）

玉龍聲杳。正瑤臺曲舞。香山初徹。褪粉搯酥千萬顆。滿地平鋪銀雪。草褥香茵。苔錢買住。留待黃昏月。有人妝罷。對花凝竚。愁絕。休更恨落羞開。東君情分。自古多離別。好把芳心收拾取。與個和羹人說。擺脫風塵。消停酸苦。終有成時節。浮花浪蕊。到頭不是生活。

阮郎歸（咏春）

和風暖日小層樓。人間春事幽。杏花深處一聲鳩。花飛水自流。尋舊夢。續揚州。眉山相對愁。憶曾和淚送行舟。清江古渡頭。

虞美人（春寒）

東風捲盡辛夷雪。逆旅清明節。黃昏煙雨失前山。陟徧朱闌酒噤不禁寒。歸來誰護衣篝火。倒擁文鴛臥。可堪連夜子規啼。喚得春歸人卻未成歸。

漁家傲(梅)

蕙死蘭枯金菊槁。返魂香入江南早。竹外一枝斜更好。誰解道。古今惟有東坡老。
(坡梅詩云竹外一枝斜更好) 去歲花前人醉倒。酒醒花落無人掃。今歲花開人未到。愁滿抱。青山一帶連芳草。

念奴嬌(梅)

蘭枯菊槁。是返魂香入。江南春早。谷靜林幽人不見。夢與梨花顛倒。雪刻檀心。玉勻豐頰。妝趁嚴鐘曉。海仙么鳳。綠衣何處飛繞。竹外孤鼻一枝。古人解道。只有東坡老。莫倚廣平心似鐵。閒把珠璣揮掃。桃李輿臺。冰霜賓客。月地還淒悄。暗香消盡。和羹心事誰表。

玉樓春(春半)

江村百六春強半。拍拍池塘春水滿。風團柳絮舞如狂。雨壓橘花香不散。陰陰巷陌閒庭院。小立危闌羞燕燕。不知何事未還鄉。除卻青春誰作伴。

謁金門(暮春)

風又雨。滿地殘紅無數。花不能言鶯解語。曉來啼更苦。把酒東皋日暮。抵死留春春去。擬倩楊花尋去處。楊花無定據。

眼兒媚(春晚)

樓上黃昏杏花寒。斜月小闌干。一雙燕子，兩行歸雁，畫角聲殘。
綺窗人在東風裏，無語對春閒。也應似舊，盈盈秋水，淡淡春山。

菩薩蠻（殘春）

楊花飛盡鶯聲澀。杜鵑喚得春歸急。病酒起來遲。嬌慵懶畫眉。
寶奩金鴨冷。重喚燒香餅。著意煉龍涎。纖纖手遶煙。

畫堂春（長新亭小飲）

小亭煙柳水溶溶。野花白白紅紅。惱人池上晚來風。吹損春容。
又是清明天氣。記當年小院相逢。憑闌幽思幾千重。殘杏香中。

又（賞海棠）

夜來暖趁海棠時。臉邊勻透胭脂。亂紅嬌影困垂垂。睡損楊妃。
多少肉溫香潤。朱唇綠鬢相偎。晚風何苦過臺西。斷送春歸。

卜算子（春景）

春水滿江南。三月多芳草。幽鳥啣將遠恨來。一一都啼了。
不學鴛鴦老。回首臨平道。人道長眉似遠山。山不似長眉好。

念奴嬌（梅）

見梅驚笑。問經年何處。收香藏白。似語如愁卻問我。何苦紅塵久客。觀裏栽桃。仙家種杏。到處成疎隔。千林無伴。淡然獨傲霜雪。且與管領春迴。孤標爭肯。接雄蜂雌蝶。豈是無情知受了。多少淒涼風月。寄隴人遙。和羹心在。忍使芳塵歇。東風寂寞。可憐誰與攀折。

又(梅)

水邊籬落獨橫枝。冉冉風煙岑寂。踏雪尋芳村路永。竹屋西頭遙識。蕙草香銷。小桃紅未醉。眼驚春色。離愁何處。斷腸無限陳跡。憔悴素臉朱唇。天寒日暮。倚闌干無力。歲晚天涯驛使遠。難寄江南消息。自笑平生。憐清惜淡。故園曾親植。百花雖好。問還有恁標格。

菩薩蠻(梅)

肩輿曉踏江頭月。月華冷浸消殘雪。雪月照疎籬。梅花三兩枝。人憐花淡薄。花恨人牢落。不似那回時。醺醺醉玉肌。

點絳脣(梅)

開盡梅花雪。殘庭戶。春來早。歲華偏好。只恐催人老。惟有詩情猶被花枝惱。金尊倒。共成歡笑。終是清狂少。

鷓鴣天(梅)

手種梅花三四株。要看冰雪滿清臞。朝來幾朵茆檐下。竹外江頭恐不如。凝玉面。吐香鬚。莫

嫌孤瘦漸豐餘。化工不肯辜人意。做底懽娛報答渠。

又（送春）

只慣嬌癡不慣愁。離情渾不挂眉頭。可憐惱盡尊前客。卻趁東風上小舟。直個去。不懽留。落花流水一春休。自憐不及春江水。隨到滕王閣下流。

瑞鶴仙（暮春有感）

海棠花半落。正蕙圃風生。蘭亭香撲。青英暝池閣。任翻紅飛絮。遊絲穿幕。情懷易著。奈宿醒情緒正惡。嘆韶光漸改。年華荏苒。舊歡如昨。追念凭肩盟誓。枕臂私言。盡成離索。記得忘卻。當時事。那時約。怕燈前月下。得見則個。厭厭只待。覷著。問新來爲誰。縈牽又還瘦削。

臨江仙（暮春）

過盡征鴻來盡燕。故園消息茫然。一春憔悴有人憐。懷家寒食夜。中酒落花天。見說江頭春浪渺。殷勤欲送歸船。別來此處最縈牽。短篷南浦雨。疎柳斷橋煙。

一叢花（暮春送別）

階前春草亂愁芽。塵暗綠窗紗。釵盟鏡約知何限。最斷腸。湓浦琵琶。南渚送船。西城折柳。遺恨在天涯。夜來魂夢到儂家。一笑臉如霞。鶯啼燕恨西窗下。問何事。潘鬢先華。鐘動五更。魂歸千里。殘角怨梅花。

清平樂(春景)

霽光搖目。春入郊原綠。殘雪壓枝堆爛玉。時向林間蔌蔌。杖藜細履平沙。醉中一任欹斜。落日數聲啼鳥。香風滿路梅花。

朝中措(咏春)

亂山疊疊水泠泠。南北短長亭。客路如天杳杳。歸心特地寧寧。春光苒惹。花朝冷落。酒伴飄零。鬢影黃邊半白。燒痕黑處重青。

柳梢青(春詞)

桃杏舒紅。遲遲暖日。媚景芳濃。紫燕穿簾。香泥著地。未乳巢空。千山萬水重重。煙雨裏王維畫中。芳草斜陽。無人江渡。篋笠漁翁。

近豐城馬令字夢山。舊日與張公舍人從遊甚厚。偶一日暇。命道士請紫府仙。忽畫其灰。稱云。我乃張孝祥也。昔日死生之事。天數難逃耳。今不復云。予幸歸紫府真人之列。馬令遂具菓卓。酌酒具服。焚香而命飲。勞焉。凡三獻杯。而稱有不樂之意。馬遂具杯分東西之位。張乃堅不肯東坐。再三而馬遂居其東。飲未終。而又索呼妓爲佐尊。馬如命。令歌舞數曲。又命畫灰而云。予亦醉矣。別無所贈。謹成小詞。伸作別之意。予平生惟珍惜一端。視在本家書院洪字號籠內。宜取以贈馬君。再畫灰云。仙風路隔。後會

難期。遂去。後果於其家得硯。再禱而請。竟不復至。得其傳者樂邑詹凝叔堅欽。而奉行好事。君子幸無以爲妖惑牛鬼蛇神之怪。當重張公平昔魁名文章善政。在人耳目未泯。詳之無忽。

原本柳梢青每載近豐城云云。後載余平生云云。與本詞語意不甚相屬。姑仍舊附卷末。

惜香樂府卷二終

惜香樂府

惜香樂府卷四

夏景

花心動（荷花）

綠水平湖浸芙蓉爛錦。豔勝傾國。半斂半開。斜立斜欹。好似困嬌無力。水仙應赴瑤池宴。醉歸去。美人扶策。駐香駕。擁波心。媚容倩妝顏色。曾見茗川澄碧。勻粉面。溪頭舊時相識。翠被繡裯。彩扇香篝。度歲杳無消息。露痕滴盡風前淚。追往恨。悠悠蹤跡。動怨憶。多情自家賦得。

鼓笛慢（甲申五月仙源試新水雨過絲生荷香襲人因感而賦此詞時病眼）

暑風吹雨仙源過。深院靜。涼於水。蓮花郎面翠幢紅粉。烘人香細。別院新番。曲成初按。詞清聲脆。奈難堪。羞澀。朦鬆病眼。無心聽。笙簧美。還記當年此際。嘆飄零萍蹤千里。楚雲寂寞。吳歌淒切。成何情意。因念而今水鄉瀟灑。雨亭高致。對花前。可是十分蒙斗肯辜歡醉。

念奴嬌（碧含笑）

晚妝纔罷。見櫳絲勻玉。一團嬌秀。趁得年光長。是向金谷無花時候。不比鶯鶯不關燕燕。不似章臺柳。清涼無汗。雪肌瀟灑難偶。好是斜月黃昏。瑤階鈿砌。百媚初含酒。惱殺多情香噴噴。雙靨盈盈回首。傾國傾城。千金莫惜。蘭蕙應難友。沈郎拚了。爲花一味銷瘦。

滿庭芳(荷花)

竹飈斜梢。荷傾餘瀝。晚風初到南池。雨收池上。高柳亂蟬嘶。冉冉蓮香滿院。夕陽映紅浸庭闈。涼生到。碧瓜破玉。白酒酌玻璃。思量浮世事。枯榮辱寵。歡喜憂悲。算勞心勞力。得甚便宜。粗有田園笑傲。揀些個朋友追隨。好時景。莫教錯過。撞着醉如泥。

又(對景)

紅藕洲塘。黃葵庭院。渚風時動清颺。素紈輕飈。涼色爽征衣。一一光陰日月。關情處前事難期。空凝想。臨鸞有恨。誰與畫新眉。刀頭心寸折。江南厚約。惟是儂知。念默歌停舞。冷落屏幃。何日朱籠鸚鵡。迎門報金勒東歸。羅絃管合歡聲裏。爛醉玉東西。

好事近(雨過對景)

山路亂蟬吟。聽隱茂林修竹。恰值快風收雨。遞荷香芬馥。破除愁慮酒宜多。把酒再三囑。遙想溪亭瀟灑。稱晚涼新浴。

虞美人(雙蓮)

二喬姊妹新妝了。照水盈盈笑。多情相約五湖遊。似向羣花叢裏。聘風流。丁香枝上千千結。怨惹相思切。爭如特地嫁熏風。吐盡芳心。點點絳脣紅。

醉蓬萊(新荔枝)

正火山槐夏。黛葉細枝。荔子新摘。千里馳驅。薦仙源佳席。浪比龍睛。未輸崖蜜。燦爛然紅摘滿。貯彫盤。纖纖素手。丹苞新擘。梨栗蠶疎。帶酸橘柚。凡品多般。總羞標格。何似濃香。洗煩襟。仙液爲愛真妃。再三珍重。價傾城傾國。玉骨冰肌。風流醞藉。直宜消得。

又(端午)

見浴蘭纔罷。拂掠新妝。巧梳雲髻。初試生衣。恰三裁貼體。艾虎宜男。朱符辟惡。好儲祥納吉。金鳳釵頭。應時戴了。千般乞戲。那更殷勤。再三祝願。鬥巧合歡。彩絲纏臂。刻玉香蒲。泛金觥迎醉。午日熏風。楚詞高詠。度遏雲聲脆。赤口白舌。從今消滅。諸餘可意。

賀新郎(初夏)

篆縷銷金鼎。翠沈沈。庭陰轉午。晝長人靜。芳草王孫知何處。只覩楊花糝徑。正玉枕。曹騰初醒。門外殘紅春去也。悶無聊。宿酒厭厭病。雲鬢鞞未懽整。江南舊事休重省。但今朝。尋消問息。塞鴻難倩。月滿西樓。凭闌處。暗數歸期未定。又只恐。瓶沈金井。嘶騎不來。銀燭暗。枉教人立盡。梧桐影。誰伴我。照鸞鏡。

踏莎行(夜涼)

樹影將圓。林梢不動。汗珠挹透紗衣重。荷風忽送雨飛來。晚涼習習生幽夢。珠箔高鉤。瑤琴閒弄。移尊邀取嬋娟共。今宵拚着醉眠呵。夜香聞早添金鳳。

醉落魄(重午)

淡妝濃抹。西湖人面兩奇絕。菖蒲角黍家家節。水戲魚龍。十里畫廉揭。凌波無限生塵襪。冰肌瑩徹香羅雪。遊船且莫催歸楫。遮莫黃昏。天外有新月。

卜算子(亭上納涼)

新月挂林梢。暗水鳴枯沼。時見疎星落畫簷。幾點流螢小。歸意了無多。故作連環繞。欲寄新詩問採菱。水闊煙波渺。

阮郎歸(送別有感因詠鶯作)

東城沙軟馬蹄輕。清和雨乍晴。柳陰曲徑泣流鶯。淒涼不忍聽。休苦怨。莫悲鳴。何須雨淚傾。但將巧語寫心誠。東君肯薄情。

蝶戀花(初夏)

亂疊青錢荷葉小。濃綠陰陰。學語雛鶯巧。小樹飛花芳徑草。堆紅襯碧於中好。梅子弄黃枝上早。春已歸時。戲蝶遊蜂少。細把新詞纔和了。雞聲已喚紗窗曉。

鷓鴣天(夜釣月橋賞荷花)

新晴水暖藕花紅。烘人暑意晚來濃。共攜纖手橋東路。楊柳青青一徑風。深翠裏。豔香中。雙鸞初下蕊珠宮。月籠粉面三界露。涼透蕭蕭一夢中。

江神子（夜涼對景）

綵雲飛盡楚天空。碧溶溶。一簾風。吹起荷花，香霧噴人濃。明月淒涼多少恨，恨難許，我情鍾。想思魂夢幾時窮。洞房中。憶從容。須信別來，應也斂眉峯。好景良宵添悵望，無計與，一尊同。

新荷葉（詠荷）

冷徹蓬壺翠幢鼎鼎生香。十頃琉璃。望中無限清涼。遮風掩日高低襯，密護紅妝。陰陰湖裏羨他雙浴鴛鴦。猛憶西湖當年一夢難忘。折得曾將蓋雨歸。思如狂。水雲千里不堪更回首思量。而今把酒爲伊沈醉何妨。

臨江仙（初夏）

簾幕清風灑灑。園林綠陰垂垂。揀花開徧麥秋時。雨深芳草渡。蝴蝶正慵飛。憔悴三春心事，風流一弄金衣。韶光老盡起深思。日長庭院裏。徒倚聽催歸。

朝中措（首夏）

荷錢浮翠點前溪。梅雨日長時。恰是清和天氣，雕鞍又作分攜。別來幾日，愁心折，針線小蠻衣。羞對綠陰庭院，啣泥燕子飛。

減字木蘭花（詠柳）

柳絲搖翠。翠幄籠陰無限意。不絆行舟。只向江邊絆客愁。月明風細。分付一江流去水。嬌眼

傷春。誰是章臺欲折人。

卜算子（夏日送吳主簿）

執手送行人。水滿荷花浦。舊恨新愁不忍論。淚壓瀟瀟雨。行計已匆匆。無計留伊住。一點相思萬里心。誰怕關山阻。

臨江仙（賞興）

柳上斜陽紅萬縷。烘人滿院荷香。晚涼初浴略梳妝。冠兒輕替枕。衫子染鴛黃。蓄意新詞輕緩唱。殷勤滿捧瑤觴。醉鄉日月得能長。仙源正閒散。伴我老高唐。

雨中花令（初夏遠思）

綠鎖窗紗梧葉底。麥秋時曉寒慵起。宿酒厭厭。殘香冉冉。渾似那時天氣。別日不堪頻屈指。回頭早一年不啻。搔首無言。闌干十二。倚了又還重倚。

畫堂春（輦下遊西湖有感）

湖光乘雨碧連天。繞隄映草芊芊。舞風楊柳欲嘶綿。依依起翠煙。還是春風客路。對花空負嬋娟。暮寒樓閣碧雲間。羅袖成斑。

浣溪沙（夜涼小飲）

露挹新荷撲鼻香。惱人更漏響浪浪。柳梳斜月上紗窗。小醉耳邊私語好。五雲樓閣羨劉郎。

酒闌燭暗斷回腸。

西江月（邀蔡堅老忠孝堂觀書）

水滿平塘過雨。洗妝紅褪芙蓉。綠荷美影蔭龜魚。無限閒中景趣。瀟灑高堂邃館。那堪左右圖書。凌雲賦得似相如。多少風流態度。

卜算子（四明別周德遠）

閒路踏花來。閒逐清和去。來去雖然總是閒。多少傷心處。紅碧好池塘。朱綠深庭戶。隨分山歌社舞中。且樂陶陶趣。

清平樂（忠孝堂雨過荷花爛然晴晚可人因呈李宜山同舍）

水鄉清楚襟袖銷袞暑。綽約藕花初過雨。出浴楊妃無語。葡萄滿酌玻璃。已拚一醉酬伊。浪捲夕陽紅碎。池光飛上廉幃。

又（初夏舞宴）

清和時候底事休交瘦。滿酌流霞看舞袖。步步錦裯紅皺。六么舞到虛催。幾多深意徘徊。拼了明朝中酒。爲伊更飲瓊杯。

浣溪沙（初夏）

霧透龜紗月映闌。麥秋天氣怯衣單。揀花風軟曉來寒。懶起麝煤重換火。暖香濃處斂眉山。

眼波橫浸綠雲鬢。

又(初夏有感)

薄霧輕陰釀曉寒。起來宿酒尙醺顏。柳鶯何事苦關關。新恨舊愁俱喚起。當年紫袖看弓彎。淚和梅雨兩潸潸。

鷓鴣天(初夏試生衣而婉卿持素扇索詞因作此書于扇上)

牙領番騰一線紅。花兒新樣喜相逢。薄紗衫子輕籠玉。削玉身材瘦怯風。人易老。恨難窮。翠屏羅幌兩心同。既無閒事縈懷抱。莫把雙蛾皺碧峯。

菩薩蠻(初夏)

方池新漲蒲萄綠。曉來雨過花如浴。測測杏園風。梢頭一麴紅。危樓愁獨倚。一寸心千里。宿酒尙微醺。懶裝堆髻雲。

西江月(夏日有感)

穩唱巧翻新曲。靈犀密意潛通。荷花香染晚來風。相對恍然如夢。有恨眉尖皺碧。多情酒暈生紅。此愁不是等閒濃。應爲仙源傾動。

浣溪沙(初夏)

睡起風簾一派垂。失巢燕子傍人飛。日長深院委春泥。綠筍出林翻錦箨。紅葵着雨褪胭脂。

微風度竹入輕衣。

蝶戀花（和任路分荷花）

憶昔臨平山下過。無數荷花。照水無纖腕。短艇直疑天上坐。醉眠花裏香無那。雨浥紅妝嬌
娜娜。脈脈含情。欲向風前破。莫道晚來風景可。青房著子千千顆。

浣溪沙（爲王參議壽）

密葉陰陰翠幄深。梅黃弄雨正頻頻。榴花照眼一枝新。緱嶺有人今毓粹。飛鳧不日籙嚴宸。
一尊敬壽太夫人。

又（呈趙狀元）

雨過西湖綠漲平。環湖密柳暗藏鶯。麥秋天氣似清明。對策有人新切直。逢春不日盡施行。
扁舟未用速歸程。

青玉案（壓波鴈客）

結堂雄占雲煙表。萬象爭呈巧。老木參天溪西繞。亂山橫秀。一湖澄照。天付陰晴好。夜空喚
客清尊倒。明月飛來上林杪。涼滿九霄風露浩。酒慵起舞。一聲清嘯。平壓波聲小。

又

客如遼鶴歸華表。閱盡人間巧。天乞一堂山對繞。微波不動。岸巾時照。照見星星好。舞風荷

蓋從欹倒。碧樹生涼自天杪。誰識元龍胸次浩。騎鯨欲去。引杯獨嘯。醉眼青天小。

謁金門（一雨掃煩暑自漉王友醉餘因次韻）

今夜雨。掃盡一番袞暑。宛似瀟瀟鳴遠浦。短篷何日去。自漉牀頭玉醕。清興有誰知否。反笑功名能幾許。槐宮非浪語。

惜香齋樂府卷五

秋景

念奴嬌（客豫章秋雨懷歸）

江城向曉。被西風揉碎。一天絲雨。亂織離愁千萬縷。多少關心情緒。泥織鳴時。木犀開後。秋色還如許。那堪飄泊。異鄉千里孤旅。應想簾幕閒垂。西樓東院。齊把歸期數。記得臨歧收淚眼。執手叮嚀言語。白酒紅萸。黃花綠橘。莫等閒辜負。朱籠歸騎。甚時先報鸚鵡。

又（秋日牡丹）

花王又意念。三秋寂寞。淒涼天氣。木落煙深山霧冷。不比尋常風味。勒駕閑來。柳蒲憔悴無限。驚心事。仙容香豔。儼然春盛標致。雅態出格天姿。風流醞藉。羞殺巖前桂。寄語芙蓉臨水際。莫騁芳顏妖麗。一朵凭闌。千花退避。惱得騷人醉。等閒風雨。更休僂僂容易。

聲聲慢（府判生辰）

金風玉露。綠橘黃橙。商秋爽氣飄逸。南斗騰光。應是間生賢出。照人紫芝眉宇。更仙風誰能儔匹。細屈指。到小春時候。恰則三日。莫論早年富貴也。休問文章。有如椽筆。堯舜逢君。啓沃定知多術。而今且張錦幄。麝煤泛暖。香鬱鬱。華堂裏。聽瑤琴輕弄。水仙新律。

瑞鶴仙(張宰生辰)

西風蘋末起。動院落清秋。新涼如水。纖歌遏雲際。正美人翻曲。陽春輕麗。蘭衣玉佩。擁南斗光中一醉。有邦人萬口。同聲贊嘆。我公愷悌。百里年豐。穀稔事簡。刑清頌聲盈耳。鵬程九萬。摩空展垂天翼。定丹書飛下。彤墀歸去。祕略家傳小試。看封留亘古。功名未容退避。

滿庭芳(七夕)

雨洗長空。風清雲路。又還準備佳期。夜涼如水。一似去秋時。渺渺銀河浪靜。星橋外香靄馥馥。霞輶舉。鸞驂鵠馭。穩穩過飛梯。經年成間阻。相逢語。應喜應悲。怕玉繩低處。依舊睽離。和我愁腸萬縷。嫦娥怨底事來遲。廣寒殿春風桂魄。首與慰相思。

水調歌頭(中秋)

今夕知何夕。秋色正平分。嫦娥此際底事。越樣好精神。已是天高氣肅。那更清風灑灑。萬里沒纖雲。把酒臨風飲。酒面起紅鱗。歌一曲。舞一曲。捧金尊。從他妄想老兔。憔悴正紛紛。我爲桂花拚醉。明月扶頭不起。顛倒白綸巾。天若知人意。夜雨莫傾盆。

驀山溪(憶古人詩云滿城風雨近重陽因成此詞)

滿城風雨。又是重陽近。黃菊媚清秋。倚東籬商量開盡。紅萸白酒。景物一年年。人漸遠。夢還稀。贏得無窮恨。釵分鏡破。一一開方寸。強醉欲消除。醉魂醒淒涼越悶。鴛鴦宿債。償了惡因緣。

當時事。祇今愁。斑盡安仁鬢。

洞仙歌（木犀）

菱荷已老。菊與芙蓉未。一夜秋容上巖桂。間蘩蕪嫩黃。染就瓊瑰。開未足。已早香傳十里。從前分付處。明月清風。不用斜暉照佳麗。嘆浮花徒解。咤淺白深紅。爭似我瀟灑。堆金積翠。看天闊。秋高露華清。見標致。風流更無塵意。

虞美人（中秋無月）

西風明月臨臺榭。準擬中秋夜。一年等待到而今。爲甚今宵陡頓卻無情。姮娥應怨孤眠苦。取次爲雲雨。素蟾特地暗中圓。未放清光容易到仙源。

醉蓬萊（七月命赴漕試闈臺主人餞于法回寺侍兒才卿乞詞因此賦之題于壁）

正金風無露。玉宇生涼。楚郊無暑。催起行人。恰槐黃時序。萬里晴霄。幾人爭覩。快鵬搏一舉。明月圓時。素秋中夜。凌雲新賦。那更淵源。詞鋒輕銳。筆陣縱橫。學通今古。譽望飛騰。是麟宗文虎。魁薦歸來。華堂香裏。與管弦爲主。待看明年。彤墀射策。鰲頭獨步。

洞仙歌（殘秋）

黃花滿地。庭院重陽後。天氣淒清透襟袖。動離情最苦。旅館蕭條。那堪更風翦。凋零飛柳。臨岐曾執手。祝付叮嚀。知會別來念人否。爲多情。生怕分離。祇知道。準擬別來消瘦。甚苦苦促裝。

赴歸期。要趁他橘綠橙黃時候。

夏雲峯（初秋有作）

露華清。天氣爽。新秋已覺涼生。朱戶小窗。坐來低按秦箏。幾多妖豔。都總是白雪餘聲。那更玉肌膚。韻勝體段輕盈。照人雙眼偏明。况周郎自來多病多情。把酒爲伊再三著意。須聽銷魂無語。一任側耳與心傾。是我不卿卿。更有誰可卿卿。

感皇恩（送林縣尉）

碧水浸芙蓉。秋風楚岸。三歲光陰轉頭換。且留都騎。未許匆匆分散。更持杯酒殷勤勸。休作等閒別離人看。且對笙歌醉須拚。如君才調。掌得玉堂詞翰。定應不久勞州縣。

瑞鶴仙（殘秋有感）

敗荷擎沼面。紅葉舞林梢。光陰何速。碧天靜如水。金風透簾幕。露清蟬伏。追思往事。念當年悲傷宋玉。漸危樓向晚。魂銷處。倚徧闌干曲。凝目。一霎微雨。塞鴻聲斷。酒病相續。無情賞處。金井梧。東籬菊。漸蘭橈歸去。銀蟾滿夜。水村煙渡。怎宿負伊家萬愁千恨。甚時是足。

臨江仙（送宜春令）

萬里西風吹去旆。滿城無奈離情。甘棠也似戴公深。曉來風露裏。葉葉做秋聲。十載兩番遺愛在。須知愁滿宜春。楚天低處是歸程。夕陽疎雨外。莫遣亂蟬鳴。

又（秋日有感）

楓葉白蘋秋未老。晚風吹泛輕艎。青山瀝瀝水茫茫。情隨流水遠。恨逐暮山長。一點相思千點淚。眼前無限情傷。佳人猶自捧離觴。陽關休唱徹。唱徹斷人腸。

鷓鴣天（深秋悲感）

亭樹蕭蕭生暮涼。安排清夢到胡牀。楚山楚水秋江外。江北江南客恨長。蘋渚冷。橘汀黃。斷魂殘夢更斜陽。欲將此日悲秋淚。灑向江天哭楚狂。

驀山溪（秋日賀張公生辰）

木犀開了。還是生辰到。一笑對西風。喜人與花容俱好。熏筵開處。香霧撲簾幃。笙簧奏。星河曉。拚取金壘倒。當年仙子。容易拋蓬島。月窟與花期。要同向人間不老。拈枝弄蕊。此樂幾時窮。一歲裏。一番新。莫與蟠桃道。

水調歌頭（重陽）

江水浸雲影。鴻雁欲南飛。攜壺結客何處。空翠渺煙霏。塵世難逢一笑。况有紫萸黃菊。須插滿頭歸。風景今朝是。身世昔人非。酬佳節。須酩酊。莫相違。人生如寄何用。辛苦怨斜暉。無盡今來古往。幾許春花秋月。那更有危機。問取牛山客。何事獨沾衣。

踏莎行（木犀）

弄影闌干。吹香巖谷。風亭糝作黃金屋。未須收拾入熏爐。窗前細把離騷讀。奴僕葵花兒曹。黃菊。一秋風味淒涼足。旁邊只少箇嫦娥。分明勝在蟾宮宿。

臨江仙(初秋)

獵獵風蒲初暑過。蕭然庭戶秋清。野航渡口帶煙橫。晚山千萬疊。別鶴兩三聲。秋水芙蓉聊蕩漿。一尊同破愁城。蓼花灘上白鷗明。暮雲連極浦。急雨暗長汀。

醉落魄(秋夜感懷)

傷離恨別。愁腸又似丁香結。不應斗頓音書絕。煙水連天。何處認紅葉。殘更數盡銀缸滅。邊城畫角聲嗚咽。羅衾淚滴相思血。花影移來。搖碎半窗月。

好事近(秋殘)

初過菊花天。餞送月宮仙客。丹桂拒霜濃淡。映眉間黃色。紅裙歌夜飲離觴。努力赴勍敵。惟願捷書來到。道一聲都得。

菩薩蠻(七夕)

綺樓小小穿針女。秋光點點蛛絲雨。今夕是何宵。龍車烏鵲橋。經年謀一笑。豈解令人巧。不用問如何。人間巧更多。

卜算子(秋深)

涼夜竹堂空。小睡匆匆醒。庭院無人月上階。滿地闌干影。何處最知秋。風在梧桐井。夜半驀
鸞弄玉笙。露溼衣裳冷。

點絳脣

蓼岸西風小。舟江上漁歌唱。倚闌凝想。暮暮雲垂帳。好事因循。寂寞閒惆悵。如何向。又來心
上空向高亭望。

好事近（秋晚）

浙浙蓼花風。怪道曉來淒惻。翻見密雲拋雨。動一山秋色。從前多感爲傷時。無處頓然寂。箇
事已寒前約。祇晚陰凝碧。

思越人（向刻品令非·秋日感懷）

情難托。離愁重。悄愁沒處安著。那堪更一葉知秋。天色兒漸冷落。馬上征衫頻搵淚。一半斑
斑汗卻。別來爲憶叮嚀話。恐贏得瘦如削。

小重山（秋雨）

一夜西風響翠條。碧紗窗外雨長涼。潮來綠漲水平橋。添清景。疎雨韻入芭蕉。坐久篆煙
銷。多情人去後。信音遙。卽今消瘦沈郎腰。悲秋切。虛度可人宵。

採桑子（巖桂）

去年巖桂花香裏，著意非常。月在東廂，酒與繁華一色黃。今年杯酒流連處，銀燭交光。往事難忘，待把真誠問阿郎。

朝中措（曾端行予與之往還一日作樓于南山仙源醉賞酒中作詞書于壁坐前數妓乞詞而歌以勸大白

因有所感再和前韻·秋景

柳林霏霏暮煙斜，秋水淺平沙。樓外碧天無際，紫山斷處橫霞。星稀漸覺東簷隱，月涼到窗紗。多少傷懷往事，隔溪燈火人家。

又

征帆一縷轉彎斜，驚鷺起汀沙。點點隨風逆上，滿江飛破殘霞。樓前光景，樓心紅粉，蟬翼輕紗。卻憶錢塘江上，曲闌橫檻他家。

洞仙歌（東園朱去年三兄弟同處十年俱取鄉薦故余與之爲莫逆交園有巖桂數畝至秋日花開月滿攜

壺來賞如到廣寒宮殿因賦此

廣寒宮殿不在人間世，分付天香與巖桂。向西風搖曳處，數十里知聞。金翠裏，別有出羣標致。東園盛事，五畝濃陰，必以詩書取榮貴。况一門三秀才，未足欽崇。那更是異性同居兄弟。更細把繁英祝姮娥，看禹浪飛騰，定應來歲。

似娘兒（或刻青杏兒·殘秋）

橘綠與橙黃。近小春已過重陽。晚來一霎霏微雨。單衣漸覺。西風冷也。無限情傷。孤館最淒涼。天色兒苦恁恹惶。離愁一枕燈殘後。睡來不是。行行坐坐。月在迴廊。

蝶戀花(深秋)

一夢十年勞憶記。社燕賓鴻。來去何容易。宿酒半醒便午睡。芭蕉葉映紗窗翠。襯粉泥書雙合字。鸞鳳鴛鴦。總是雙雙意。已作吹簫長久計。鴛衾恐有中宵淚。

夜行船(送胡彥直歸槐溪)

淚眼江頭看錦樹。別離又還秋暮。細水浮浮。輕風冉冉。穩送扁舟去。歸去江山應得助。新詩定須多賦。有雁南來。槐溪千萬。寄我驚人句。

清平樂(秋暮)

鴻來燕去。又是秋光暮。冉冉流年嗟暗度。這心事還無據。寒窗露冷風清。旅魂幽夢頻驚。何日利名俱賽。爲予笑下愁城。

又

秋容眼界隨寓。渾堪愛。遠岫連天橫淡靄。望斷孤鴻飛外。夕陽紅樹林凋。重重錦障橫陳。一段江南景色。倩誰爲下丹青。

一翦梅(秋雨感悲)

霽靄迷空曉未收。羈館殘燈。永夜悲秋。梧桐葉上三更雨。別是人間一段愁。睡又不成夢又休。多愁多病。當甚風流。真情一點苦。縈人。纔下眉尖。恰上心頭。

南歌子（道中直重九）

此日知何日。他鄉憶故鄉。亂山深處過重陽。走馬吹花。無復少年狂。黃菊擎枝重。紅茱溼露香。扁舟隨雁過瀟湘。遙想萊庭。應恨不同觴。

醉花陰（建康重九）

老去悲秋人轉瘦。更異鄉重九。人意自淒涼。祇有茱萸。歲歲香依舊。登高無奈空搔首。落照歸鴉後。六代舊江山。滿眼興亡。一洗黃花酒。

菩薩蠻（秋雨船中）

西風轉拖蒹葭浦。客愁生怕秋闌雨。衾冷夢魂驚。聲聲滴到明。不眠欹枕聽。故故添新恨。新恨有誰知。天寒雁正稀。

又（秋老江行）

炊煙一點孤村迥。嬌雲斂盡天容淨。雁字忽橫秋。秋江瀉客愁。銀鈎空寄恨。恨滿憑誰問。袖手立西風。舟行秋色中。

浣溪沙（早秋）

雨滴梧桐點點愁。冷催秋色上簾鉤。蛩聲何事早知秋。
一夜涼風驚去燕。滿川晴漲漾輕鷗。
懷人千里思悠悠。

惜香樂府卷五終

惜香樂府

惜香樂府卷六

夕景

滿庭芳（十月念六日大雪作此呈社人）

晚色沈沈。雨聲寂寞。夜寒初凍。雲頭曉來階砌。一麴冷光浮。目斷江天靄靄。低迷映綠竹修修。多才客。高吟柳絮。還更上層樓。烹茶新試水。人間清楚。物外遨遊。勝似他銷金暖帳。情柔細。看流風迴舞。終日價淺酌輕謳。醺醺地。美人翻曲。消盡古今愁。

御街行（夜雨）

晚來無奈傷心處。見紅葉隨風舞。解鞍還向亂山深。黃昏後不成情緒。先來離恨。打疊不下。天氣還淒楚。風兒住後雲來去。裝撰些兒雨。無眠托首對孤燈。好語向誰分付。從來煩惱。嚇得膽碎。此度難擔負。

有有令（歲殘）

前山減翠。疎竹度輕風。日移金影碎。還又年華暮。看看是新春至。那更堪有個人人。似花似玉。溫柔伶俐。準擬恩情。乞戲拈弄。上則人難比。我也埋根。豎柱。你也爭些氣。大家一捺頭地。美中更美。廝守定共伊百歲。

一翦梅（或刻攤破醜奴兒·梅詞）

樹頭紅葉飛都盡。景物淒涼。秀出羣芳。又見江梅淺淡妝。也囉。真個是可人香。蘭魂蕙魄應羞死。獨占風光。夢斷高堂。月送疎枝過女牆。也囉。真個是可人香。

臨江仙（日暮舟中月明寒甚憶暖春圍爐）

日欲低時江景好。暮山紫翠重重。釣筒收盡碧潭空。一船霜夜月。兩岸荻花風。遙憶暖春新向火。黃昏下了簾櫳。水村漁浦艤孤篷。單衾愁夢斷。無夢轉愁濃。

南歌子（夜坐）

霜結凝寒夜。星輝識曉晴。蘭膏重剔且教明。爲照梢頭香縷一絲輕。坐久看看困。新詞綴未成。梅花熏得酒初醒。更向耳邊低道月三更。

永遇樂（霜詞）

宵露珠零。濺冰花薄。凝瑞偏。早月練輕翻。風刀碎翦。青女呈纖巧。微丹楓纈。低摧蕉尾。不覺半池蓮倒。最好是。千林橘柚。轉黃一村封了。佳人指冷。暗驚羅幕。一夜斜飛多少。怕倚銀屏。愁看玉砌。金菊鮮鮮。曉傷嗟。傅粉佳期還未。何處冷沾衣透。爭知人臨鸞試罷。與梅共瘦。

玉蝴蝶（雪詞）

片片空中翦水。巧妝春色。照耀江湖。漸覺花毬轉柳。莢陣飛榆。散銀杯時時逐鳥。翻縞帶一一

隨車徧簾隅。寒生冰筋。光剖明珠。應須淺斟低唱。氈垂紅帳。獸爇金爐。更向高樓縱觀。吟醉謝娘扶。靜時聞竹聲巖谷。漫不見禽影。江湖儘躊躇。歌闌寶玉。賦就相如。

瀟湘夜雨（燈詞）

斜點銀缸。高擎蓮炬。夜寒不奈微風。重重簾幕。掩堂中。香漸遠。長煙裊。穉光不定。寒影搖紅。偏奇處。當庭月暗。吐焰如虹。紅裳呈豔。麗娥一見。無奈狂蹤。試煩他纖手。捲上紗籠。開正好。銀花照夜。堆不盡。金粟凝空。叮嚀語。頻將好事。來報主人公。

念奴嬌（夜寒有感）

據爐肅坐。聽瓶笙別有天然宮徵。紙帳屏山。渾不俗。寫出江南煙水。檠短燈青。灰閒香軟。所欠惟梅矣。風飛無定。數聲時顫窗紙。試問夜已何其。呼童起看。月上東牆未。天外忽聞征雁過。還把音書來寄。短笠埋煙。輕蓑鳴雨。已辦征船計。放教歸去。故鄉江上魚美。

似娘兒（向刻攤破醜奴兒誤。冬日有感）

又是兩分攜。憔悴損。看怎醫治。煙村一帶寒紅繞。悲風紅葉。殘陽暮草。還似年時。愁緒暗猶夷。漫屈指。數徧歸期。短檠燈燼無人問。此時只有。窗前素月。剛伴相思。

柳梢青（過何郎石見早梅）

雲暗天低。楓林凋翠。寒雁聲悲。茆店兒前。竹籬巴後。初見橫枝。盈盈粉面香肌。記月榭當年。

見伊有恨難傳。無腸可斷。立馬多時。

祝英臺近（武陵寄暖紅諸院）

記臨歧。銷黯處。離恨慘。歌舞恰是江梅。開徧小春暮。斷腸一曲金衣。兩行玉筍。酒闌後欲行難去。惡情緒。因念錦幄香奩。別來負情素。冷落深閨。知解怨人否。料應寶瑟慵彈。露華懶傅。對鸞鏡終朝凝竚。

點絳脣（夜飲青雲樓聞更漏近如在脚底因思向事追念故作）

瓦溼鴛鴦。夜深霜重。江風冷。月華明映。清浸梅梢粉。漏斷寒濃。惹起當年恨。君休問。雁飛欲盡。沒個南來信。

又

當日相逢。枕衾清夜。紗窗冷。翠梅低映。汗溼香腮粉。美滿風情。結下無窮恨。憑誰問。此心難盡。說與他爭信。

又（對景有感）

雪霽山橫。翠濤擁起。千重恨。砌成愁悶。那更梅花褪。鳳管雲笙。無不縈方寸。叮嚀問。淚痕羞搵。界破香腮粉。

柳梢青（東園醉作梅詞）

千林落葉聲聲悽慘。江臯雁飛。難似玉肌。總驚花貌。壓倒芳菲。香心吐盡因誰。料調鼎工夫。易期休唱陽關。莫歌白雪。雨淚沾衣。

西江月（雪江見紅梅對酒）

背日猶餘殘雪。向陽初綻紅梅。臘寒那事更相宜。醉了還醒又醉。堪笑多愁早老。管他閒是閒非。對花酌酒兩忘機。唱個哩騰囉哩。

眼兒媚（霜夜對月）

一鉤新月照西樓。清夜思悠悠。那堪更被。征鴻嘹唳。絆惹離愁。倚闌不語情如醉。都總寄眉頭。從前只爲。惜他伶俐。舉措風流。

別怨（霜寒）

嬌馬頻嘶。曉霜濃。寒色侵衣。鳳帷私語處。翻成離怨。不勝悲。更與叮嚀祝後期。素約諧心事。重來了。比看相思。如何見得。明年春事濃時。穩乘金駝。來爛醉玉東西。

減字木蘭花（冬日飲別趙德遠）

小春天氣未唱陽關心已醉。紅蓼秋容。後會何時得再逢。歸朝好事。仰看皇州揚雨露。百里恩波。擬欲留公無奈何。

好事近（錢趙知丞席上作）

去路馬蹄輕。正是小春時節。愛日暖烘江樹。綴梅梢新雪。范滂攬轡正澄清。知我公明潔。分此仁風愷悌。濟隣邦歡悅。

霜大曉角(霜夜小酌)

閣兒幽靜處。圍爐面小窗。好是鬪頭兒坐。梅烟炷返魂香。對火怯夜冷。猛飲消漏長。飲罷且收拾睡。斜月照滿簾霜。

鷓鴣天(臘夜)

寶篆龍煤燒欲殘。細聽銅漏已更闌。紗窗斜月移梅影。特地籠燈仔細看。幽夢斷。舊盟寒。那時屈曲小屏山。風光得似而今不。肯把花枝作等閒。

驀山溪(和曹元寵賦梅韻)

玉妃整佩絳節參差御。一笑喚春回。正江南天寒歲暮。孤標獨立。占斷世間香。雲屋冷。雪籬深。長記西湖路。人間塵土。不是留花處。羌管一聲催。碎瓊瑤紛紛似雨。枝頭著子。聊與世調羹。功就後。盍歸休。還記來時不。

浣溪沙(賦梅)

雪壓前村曲徑迷。萬山寒立玉參差。孤舟獨釣一蓑歸。別塢時聽風折竹。斷橋閒看水流澌。一枝凍蕊出疎籬。

又(初冬)

風捲霜林葉葉飛。雁橫寒影一行低。淡烟衰草不勝詩。白酒已筍浮蟻熟。黃鷄未老藁頭肥。問儂不醉待何時。

又(臘梅)

憶爲梅花醉不醒。斷橋流水去無聲。鷺翹沙嘴亦多情。疎影臥波波不動。暗香浮月月微明。高樓羌管未須橫。

點絳脣(月夜)

離緒千重。角聲偏著。驕人枕。那堪酒醒。勾引愁難整。門鎖黃昏。月浸梅花冷。人初靜。斗垂天迥。雁落清江影。

鷓鴣天(霜夜)

門外寒江泊小船。月明留客小窗前。夜香燒盡更聲遠。斗帳低垂暖意生。醺著酒。灸些燈。伴他針線懶成眠。情知今夜鴛鴦夢。不似孤篷宿雁邊。

望江南(霜天有感)

山又水。雲岫插峯巒。斷雁飛時霜月冷。亂鴉啼處日啣山。疑在畫圖間。金烏轉。遊子損朱顏。別淚盈襟雙袖溼。春心不放兩眉閒。此去幾時還。

玉樓春(臘月)

尋真誤入桃源洞。草草幽歡聊與共。牢籠風月此時情。做造溪山今夜夢。柳條未放金絲弄。梅萼已經雪霜凍。新來愁恨重如山。不信馬兒駝得動。

鵲橋仙(寒梅)

溪清水淺。霜明月淡。玉破梅梢未徧。寒枝纖瘦。乃如無。但空裏飛花數片。乘風欲去。淩波難駐。惟見紅愁粉怨。夜深青女溼霓裳。暗香在。廣寒宮殿。

菩薩蠻(初冬旅思)

楓林颯颯凋寒葉。汀蘋敗蓼遙相接。景物已非秋。淒涼動客愁。還家貧亦好。肯厭杯中草。香飯滑流匙。三登快樂時。

又(霜天旅思)

霜風颯颯溪山碧。寒波一望傷行色。落日淡荒村。人家半掩門。孤舟移野渡。古木棲鴉聚。著雨晚風酸。貂裘不奈寒。

又(初冬)

敗荷倒盡芙蓉老。寒光黯淡迷衰草。行客易銷魂。笛飛何處村。雲寒天借碧。樹瘦煙籠直。若個是鄉關。夕陽西去山。

阮郎歸（客中見梅）

年年爲客徧天涯。夢遲歸路賒。無端星月浸窗紗。一枝寒影斜。腸未斷。鬢先華。新來瘦轉加。角聲吹徹小梅花。夜長人憶家。

霜天曉角（詠梅）

香來不歇。誰把南枝折。的礫疎花初破。都因是夜來雪。清絕十分絕。孤標難細說。獨立野塘。清淺誰作半空夜月。

又（和梅）

雪花飛歇。好向前村折。行至斷橋斜處。寒蕊瘦不禁雪。韻絕香更絕。歸來人共說。最愛夜堂深迴。疎影占半窗月。

菩薩蠻（初冬旅中）

客帆卸盡風初定。夜空霜落吳江冷。幸自不思歸。無端烏夜啼。雞鳴殘月落。到枕秋聲惡。有酒不須斟。酒深愁轉深。

憶秦娥（初冬）

寒蕭索。征鴻過盡離懷惡。離懷惡。江空天迴。夜寒楓落。有人應誤刀頭約。情深翻恨郎情薄。郎情薄。夢回長是。半牀閒卻。

宋六十名家詞

如夢令(漢上晚步)

何處一聲鳴鶻。驚起滿川寒鷺。一著畫難成。雪霽亂山無數。且住且住。數徧溪南煙樹。

惜香樂府卷七

總詞

水龍吟（仙源居士有武林之行，因與一二友攜酒賞月，飲于縣橋之中，乃卽事爲之詞。）

危樓橫枕清江上。兩岸碧山如畫。夕煙暮暮，晚燈點點，樓臺新夜。明月當天，白沙流水，冷光連野。浸闌干萬頃，琉璃軟皺，打漁艇，相高下。何處一聲羌管，是誰家倚樓人也。多情對景，無言有恨，欲歌還罷。把酒臨筵，阿誰知我，此懷難寫。忍思量後夜，芳容不似，暗塵隨馬。

水調頭歌（元日客寧都）

離愁晚如織，托酒與消磨。奈何酒薄愁重，越醉越愁多。忍對碧天好夜，皓月流光無際，光影轉庭柯。有恨空垂淚，無語但悲歌。因凝想，從別後，促雙娥。春來底事，孤負紫袖與江鞞，速整雕鞍歸去。著意淺斟低唱，細看小婆娑。萬蕊千花裏，一任玉顏酡。

水龍吟（江樓席上歌姬盼盼翠鬟侑尊，酒行彈琵琶曲，舞梁州，醉語贈之。）

酒潮勻頰，雙眸溜，美映遠山橫秀。風流俊雅，嬌癡體態，眼前稀有。連步彎彎，移歸拍裏，凌波難偶。對仙源醉眼，玉纖籠巧，撥新聲，魚紋皺。我自多情多病，對人前只推傷酒。瞞他不得，詩情懶倦，沈腰銷瘦。多謝東君，殷勤知我，曲翻紅袖。拚來朝又是扶頭不起，江樓知不。

念奴嬌（小飲江亭有作）

夕陽低盡。望楚天空闊。稀星簾幕。暮靄橫江。煙萬縷。照水參差樓閣。兩兩三三。樓前歸鷺。飛過
闌干角。霜風何事。繞檐吹動。寂寞。消散我已忘機。而今百念。灰了心頭火。對酒當歌。渾冷淡。
一任他。憑嗔惡。松竹園林。柳梧庭院。自有人間樂。閒雲休問。去來本是無著。

水調歌頭（遣懷）

貪癡無了日。人事沒休期。白駒過隙。百歲能得幾多時。自古腰金結綬。著意經營辛苦。回首不
勝悲。名未能安穩。身已致傾危。空剗剗。休巧詐。莫心欺。須知天定。只見高塚與新碑。我已從
頭識破。贏得貪歌臨酒。歡笑且隨宜。較甚榮和辱。爭甚是和非。

水龍吟（自遣）

噉曾著意。斟酌量過。天下事無窮盡。貪榮貪富。朝思夕計。空勞方寸。躡足封王。功名蓋世。誰如韓
信。更堆金積玉。石崇豪侈。當時望傾西晉。長樂宮中一嘆。又何須纍懸印。吹樓效死。輕車東
市。頭膏血刃。尤物虛名。於身何補。一齊休問。遇當歌臨酒。舒眉展眼。且隨緣分。

驀山溪（午坐壺天冰雪風傳琵琶有感而作）

壺天冰雪。消盡虛堂暑。多謝故人口。風送花香傳小樹。香風初過。一曲斷腸聲。如怨訴。訴閒愁。
落落琵琶語。江邊馬上。彈指成千古。淚眼與啼妝。嘆風流只今何處。芳心役損。觸事起悲酸。

招玉素。撥檀槽。整理金衣鏤。

念奴嬌（席上卽事）

精神俊雅。更那堪。天與風流標格。羅綺叢中。偏豔冶。偷處教人憐惜。日翦秋波。指纖春筍。新樣冠兒直。高唐雲雨。甚人有分消得。乞戲笑裏含羞。回眸低盼。此意誰能識。密約幽歡。空悵望。何日能諧端的。玳席歌餘。蘭堂香散。此際愁如織。人歸空對。晚陰庭樹橫碧。

瑞鶴仙（歸寧都因成寄暖香諸院）

無言屈指也。算年年底事。長爲旅也。恹惶受盡也。把良辰美景。總成虛也。自嗟嘆也。這情懷。如何訴也。漫愁明怕暗。單栖獨宿。怎生禁也。閒也有時臨鏡。漸覺形容日銷減也。光陰換也。空辜負少年也。念仙源深處。暖香小院。贏得羣花怨也。是虧他見了。多教罵幾句也。

驀山溪（遣懷）

無非無是。好個閒居士。衣食不求人。又識得。三文兩字。不貪不僞。一味樂天真。三徑裏。四時花。隨分堪遊戲。學些沓拖也。似沒意志。詩酒度流年。熟諳得。無爭三昧。風波歧路。成敗霎時間。你富貴。你榮華。我自關門睡。

青玉案（德遠歸越因作此錢行）

東門楊柳空盈路。繫得征鞍能駐不。暗綠枝頭新過雨。柔絲千尺。乳鶯百轉。似怨行人去。行

人去後知何處。去向天邊。筵鴛鴦。瑤管瓊臺多雅趣。花磚穩上。玉階闊步。肯念人塵土。

虞美人（江都對景）

雨聲破曉催行槳。拍拍溪流長。綠楊繞岸水痕斜。恰似畫橋西畔那人家。人家樓閣臨江渚。應是停歌舞。珠簾整日不閒鉤。目斷征帆猶未識歸舟。

又（送別）

燈前忍見啼紅面。別酒頻斟勸。愁娥斂翠不勝情。報道看看天色待平明。殷勤重把陽關唱。休要教人望。出門猶自尙叮嚀。斷養頻催恰好趁涼行。

臨江仙（楊柳）

十里春風楊柳路。年年帶雨披雲。柔條萬縷不勝情。還將無意眼。識徧有心人。餓損宮腰終不似。效顰總是難成。只愁秋色入高林。殘蟬和落葉。此際不堪論。

漁家傲（旅中遠思）

客裏情懷誰可表。淒涼舉目知多少。強飲強歌還強笑。心悄悄。從頭徹底思量了。當日相逢非草草。果然恩愛成煩惱。穩整征鞍歸去好。重厮守。相期待與同偕老。

江神子（述情）

當時得意兩心齊。綺窗西。共于飛。拂掠宮妝。長與畫新眉。一自別來煙水闊。愁易積。夢還稀。

相逢卻似舊家時。恨依依。語低低。少少關情。冷暖有誰知。只此定應諧素願。但指日。約鸞棲。

御街行（河山故人別後改圖因作此）

香熏斗帳相逢乍。正宮漏沈沈夜。月飛梅影上簾櫳。標致風流嬌雅。眼波橫浸。照人百媚。無限叮嚀話。玉鞍門上嘶歸馬。躋行色難留也。別來花豔不禁春。浪向東風輕嫁。空餘小院。博山修竹。依舊窗兒下。

一叢花（和張子野）

當歌臨酒恨難窮。酒不似愁濃。風帆正起歸與岸。東西芳草漫茸茸。楚夢乍回。吳音初聽。誰念我孤蹤。藏春小院暖融融。眼色與心通。烏雲有意重梳掠。便安排金屋房櫳。雲雨厚因。鴛鴦宿債。作個好家風。

天仙子（寓意）

眼色媚人嬌欲度。行盡巫陽雲又雨。花時還復見芳姿。情幾許。愁何許。莫向耳邊傳好語。往事悠悠曾記否。忍聽黃鸝啼錦樹。啼聲驚碎百花心。分付與誰爲主。落蕊飛紅知甚處。往

瑞鷓鴣（遣情）

寶斂常見曉妝時。面藥香融。傅口脂。擾擾親曾撩綠鬢。纖纖巧與畫新眉。濃歡已散西風遠。憶淚無多爲你垂。各自從今好消遣。莫將紅葉浪題詩。

又(寓意)

結絲千緒不勝愁。莫怪安仁鬢早秋。檀口未歌先搵淚。柳眉將斂半凝羞。杯傾激盪送行酒。岸艤飄颻欲去舟。待得名登天府後。歸來茱菊映釵頭。

行香子(馬上有感)

驕馬花驄。柳陌經從。小春天十里和風。箇人家住。曲巷牆東。好軒窗。好體面。好儀容。燭地歌慵。斜月朦朧。夜新寒斗帳香濃。夢回畫角。雲雨匆匆。恨相逢。恨分散。恨情鍾。

夜行船(詠美人)

龜甲爐煙輕裊。簾櫳靜。乳鶯啼曉。拂掠新妝。時宜頭面。繡草冠兒小。衫子揉藍初著了。身材稱就中恰好。手撚雙紈。菱花重照。帶朵宜男草。

採桑子(寓意)

疏簾乍捲孜孜看。冰玉精神。體白停勻。端的于人不薄情。更無背約和焦燥。各表真誠。纔得相觀。切莫分張向別人。

蝶戀花(登樓晚望聞歌聲清婉而作)

閒上西樓供遠望。一曲新聲。巧媚誰家唱。獨倚危闌聽半餉。長江快瀉澄無浪。清淚恰同春水漲。拭盡重流。觸事如何向。不覺黃昏燈已上。舊愁還是新愁樣。

又

天淨姮娥初整駕。桂魄蟾輝。來趁清和夜。費盡丹青無計畫。纖纖側向疎桐挂。人在扶疎桐影下。耳畔輕輕。細說家常話。年少難留應不借。未歌先咽歌還罷。

又（寧都半歲歸家。欲別去而意終不決也。）

葉底蜂衙催日晚。向晚勻妝。巧畫宮眉淺。翠幕無風香自遠。金船酌酒須教滿。未說別離魂已斷。雨幌雲屏。只恐良宵短。心事不隨飛絮亂。宦情肯把恩情換。

鷓鴣天（晨起忽見大鏡。觀物思人有感而作）

睡覺扶頭聽曉鐘。隔簾花霧濕香紅。翠搖鈿砌梧桐影。暖透羅襦芍藥風。閒對影。記曾逢。晝眉臨鏡霎時同。相思已有無窮恨。忍見孤鸞宿鏡中。

又（月夜諸院飲酒行令）

寶篆煙消香已殘。嬋娟月色浸闌干。歌喉不作尋常唱。酒令從他各自還。傳杯手。莫教閒。醉紅潮臉媚酡顏。相攜共學鸞鸞侶。卻笑盧郎舊約寒。

又（暇日泛舟。遊客有嘆居士髮白者。未竟忽見臨江倚樓人。因思向來有感作此。）

綠水澄江待勝遊。浪平風軟稱輕舟。尊前我易傷前事。柳外人誰獨倚樓。空感慨。惜風流。風流贏得漫多愁。愁多著甚銷磨得。莫怪安仁鬢早秋。

又（偶有麟翼之便，書以寄文卿）

一曲清歌金縷衣，巧佼心事有誰知。自從別後難相見，空解題紅寄好詩。憶攜手，過階墀。月籠花影半明時。玉釵頭上輕輕顫，搖落釵頭荳蔻枝。

眼兒媚（東院適人乞詞，醉中書于裙帶三首）

人隨社節去匆匆，此恨幾時窮。陽臺寂寞，巫山淒慘，雲雨成空。芭蕉密處窗兒下，冷落舊香中。黃昏靜也，蛩聲滿院，明月清風。

又

槐陰密處轉黃鸝，午日正長時。一番過雨，綠河池面，冷浸琉璃。紅塵不到華堂裏，纖楚對蛾眉。笑偎人道，新詞覓個，美底腔兒。

又

當年策馬過錢塘，曲徑小平康。繁紅灑白，嬌鶯咤燕，爭喚何郎。而今又客東風裏，渾不似尋常。只愁別後，月房雲洞，啼損紅妝。

臨江仙（笙妓夢雲對居士忽有翦髮齊眉修道之語）

蕊嫩花房無限好，東風一樣春工。百年歡笑酒尊同。笙吹雛鳳語，裙染石榴紅。且向五雲深處住，錦衾繡幌從容。如何即是出樊籠。蓬萊人少到，雲雨事難窮。

又（予買一妾，稍慧，教之寫東坡字。半年，又工唱東坡詞，命名文卿。元約三年，文卿不忍捨主，厥母不容與議，堅

索之去。今失于一農夫，常常寄聲，或片紙數字，問訊仙源，有感遂和其韻）

破盤盈盈巧笑，舉杯灑灑迎逢。慧心端有謝娘風。燭花香霧，嬌困面微紅。別恨綵箋雖寄，清歌淺酌難同。夢回楚館雨雲空。相思春暮，愁滿綠蕪中。

又（夜坐更深，燭盡月明，飲興未闌，再酌命諸姬唱一詞）

夜久笙簫吹徹，更深星斗還稀。醉拈裙帶寫新詩。鎖窗風露，燭地月明時。水調悠悠聲美，幽情彼此心知。古香煙斷綵雲歸。滿傾蕉葉，齊唱傳花枝。

惜奴嬌（賦水仙花）

洛浦嬌魂，怨得到人間。少把風流分付花貌。六出精神，臘寒射香，試到清秀。與江梅爭相先後。薺蔔蠶疎，怎似妖嬈體調。比山樊也應錯道。最是殷勤，捧出金盞銀臺，拚了仙源與奇葩醉倒。

惜香樂府卷十七終

惜香齋樂府卷八

總詞

水龍吟

無情風掠芭蕉響。還是重門已閉。銀缸獨對。相思方切。教人怎睡。解嘆從前事。解嘆了。依前繁氣。想他家那裏。知人憔悴。想應是睡也未。且恁和衣強寢。奈無寐。依前重起。起來思想當初。與你忒煞容易。及至而今也。半頭天眼。不存不濟。最消魂苦。是黃昏前後。冷清清地。

水調歌頭（賞月）

把酒相勞苦。月色耀天章。冰輪碾破寒碧。飛入酒尊涼。擊節詞人妙句。吸此清輝萬丈。肺腑亦生光。攬袂欲仙舉。逸興共天長。日邊客。幕中俊。坐間狂。浩歌清嘯。恍然雲海渺茫茫。喚醒謫仙蘇二。何事常愁客少。更恐被雲妨。月與人長好。廣大醉爲鄉。

水龍吟（雲詞）

先來天與精神。更因麗景添殊態。拖輕冉冉。纔凝一段。還分五綵。畢竟非煙。有時爲雨。惹情無奈。道無心。怎被歌聲遏斷。遲遲向。青天外。宜伴先生醉臥。得饒到。和山須買。也曾惱殺襄王。誰道依前不會。欲乘歸去。翻悵恨。帝鄉何在。念佳期未展。天長暮合。儘空相對。

訴衷情

花前月下會鴛鴦。分散兩情傷。臨行祝付真意，臂間皓齒留香。還更毒，又何妨。儘成瘡。瘡兒可後，痕兒見在，見後思量。

滿江紅

懊惱平生，奈天賦恩情太薄。二三歲看伊受盡，眼尖眉角。記得當初低耳畔，是誰先有于飛約。惟到今，剗地誤盟言，還先惡。天眼見，人難度。天易感，人難托。人心險，天又怎生捉摸。莫問旁人非與是，手兒但把心兒托。便不成，斷守許多時，乾休卻。

賀新郎

負你千行淚。大都來一寸心兒。萬般縈繫，似恁愁煩，那裏泊。故自三年二歲，爲你後甘心憔悴。終待說山盟海誓，這恩情到此非容易。拚做個久長計。緊要事，須評議。怕人人驀地知時，怎生處置。毒害心腸，祇知是怕你生煩到底。便莫待將人輕棄。不是我多疑你，被旁人賺後失圈。圖經一事，長一智。

好事近

喜氣擁門闌。光動綺羅香陌。行到紫薇花下，悟身非凡客。不須朱粉汗天真。嫌怕太紅白。留取黛眉淺處，畫章臺春色。

眼兒媚

連滄危觀暮江前。幾醉使君筵。少年俊氣，曾將吟筆，買斷江天。重來細把朋游數，回首一辛酸。蘭成已老，文園多病，負此江山。

簇水

長憶當初是他見我。心先有一鉤。纔下便引得魚兒開口。好事重門深院，寂寞黃昏後。斷覩著一面兒酒。試攔就，便把我得人意處。閨子裏施纖手。雲情雨意，似十二巫山舊。更向枕前言約。許我長相守。歡人也猶自眉頭皺。

青杏兒（舊刻攤破醜奴兒非）

最苦是離愁。行坐裏只在心頭。待要作個巫山夢。孤衾展轉無眠到曉。和夢都休。夢裏也無由。誰敢望真個綢繆。暫時不見渾閒事。只愁柳絮楊花自來擺蕩難留。

更漏子

燭消紅。窗送白。冷落一衾寒色。鴉喚起。馬馳行。月來衣上明。酒香唇。妝印臂。憶共個人人睡。魂蝶亂。夢鸞孤。知他睡也無。

浣溪沙

一味風流一味香。十分濃艷十分妝。自然嬌態自然芳。樓上好風樓下水。雪前闌檻竹前窗。

也宜單著也宜雙

又

惻惻笙竿萬籟風。陽關疊徧酒尊空。相逢草草別匆匆。滿眼淚珠和雨灑。一襟愁緒抵秋濃。相思今夜五雲東。

灌宮春

講柳談花我從來口快。歡說他家。眼前見了無限。楚女吳姬。千停萬穩。較量來終不如他。便做得宮儀院體。歌談不帶煙花。從前萬事堪誇。愛拈牋弄管。錦字欹斜。新來與人牖著。不許胡巴。噫懣漫惹。料福緣淺似地些。誰爲傳詩遞曲。殷勤題上窗紗。

雨中花漫

幌子分香羅巾拭淚。別來時未覓悽惶。上得船兒。來了剗地淒涼。可惜花前月裏。卻成水遠山長。做成恩愛。如今贏得。萬里千鄉。情知這場寂寞。不干你事。傷我窮忙。不道是久長活路。終要稱量。我則匆匆歸去。知你且種種隨娘。下梢睡徹。有時共你風光。

柳梢青

小窗閒適。雲髻鞦韆。香肩肌。佞膝。玉局無塵。明瓊欲碎。春纖同擲。不爭百萬呼盧。賭今夜鴛帷。痛惜好忍馬兒。若還輸了。當甚則劇。

玉團兒

鉛華淡貯新妝束。好風韻天然異俗。彼此知名。雖然初見。情分先熟。爐煙淡淡雲屏曲。睡半醒。生香透肉。賴得相逢。若還虛度。生世不足。

南歌子

梅萼和霜曉。梨花帶雪春。玉肌瓊豔本無塵。肯把鉛華容易汙天真。湯餅嘗初罷。羅巾拭轉新。幾回貪耍失黃昏。月裏歸來無處覓精神。

臨江仙

人在夢雲樓上別。殘燈影裏遲留。依稀綠慘更紅羞。露痕雙臉濕。山樣兩眉愁。幾幅片帆天際去。雲濤煙浪悠悠。今宵獨立古江頭。水腥魚菜市。風碎荻花舟。

鷓鴣天

只有梅花似玉容。雪窗月戶幾尊同。見來怨眼明秋水。欲去愁。淡遠峯。山萬疊。水千重。一雙蝴蝶夢能通。都將淚作黃梅雨。盡把情爲柳絮風。

又

小院深明別有天。花能笑語柳能眠。雪肌得酒于中暖。蓮步淩波分外妍。釵燕重。髻荷偏。兩山斜疊翠連娟。朝雲無限矜春態。雨暮情知更可憐。

浣溪沙

畫角聲沈捲暮霞。寒生促索錦屏遮。沈檀半爇髻堆鴉。蝴蝶夢回餘燭影，子規啼處隔窗紗。夜深明月浸梨花。

浪淘沙

簾捲露花容。幾度相逢。他知我意欲相通。偏奈天教多阻間，積恨何窮。雲雨杳無蹤。愁怕東風。時聞語笑恣歡濃。惟有俺，叫真分淺，往事成空。

眼兒媚（始與官岐往來，中道相棄，遂以小字刺于眉間，故作此詞）

雲間藏一點飛鴉。休把翠鈿遮。二年三歲，千擱百就，今日天涯。奴今有似風前絮，飛入那人家。你還下得，除非睡起，不照菱花。

如夢令

竹外半窺嬌面，真個出塵體段。沒處可偷憐。空恁眼穿腸斷。休戀休戀，只是與伊分淺。

浣溪沙

閒理絲簧聽好音。西樓翦燭夜深深。半嗔半喜此時心。暖語溫存無恙語，韻開香靨笑吟吟。別來煩惱到如今。

減字木蘭花

陽關唱徹。斷盡離腸聲。哽咽。酒已三巡。今夜王孫是路人。此情難說。莫負等閒風與月。欲問歸期。來戴釵頭艾虎兒。

又

半窗斜月。茆店蕭條燈已滅。牀下蛩聲。聲動淒涼不忍聽。終宵無寐。覆去翻來真箇是。屈指歸期。應是梅花爛熳時。

夜行船（送胡彥直歸郡。醉中作。）

短掉輕舟排辦了。歌聲斷。晚霞殘照。紅蓼坡頭。綠楊隄外。離恨知多少。別後莫教音信杳。光陰自來堪笑。畫角譙門。槐溪歸路。正是楚天曉。

眼兒媚

玉樓初見念奴嬌。無處不妖嬈。眼傳密意。尊前燭外。怎不魂消。西風明月相逢夜。枕簟正涼宵。帶人記得。叮嚀殘漏。且慢明朝。

品令

黃昏時候。誚不語。心如醉。無眠凝想。別來繡閣。多應憔悴。上了燈兒。知是睡哩坐哩。暮思歸計。又還是重屈指。從今已後。睽離千萬。且休容易。這底恓惶。你看是誰不是。

柳梢青

甜言軟語長記那時蕭娘叮囑清筵危絃前歡難繼鱗鴻無據
紛紛眼底浮花拈弄動幾多思慮千結丁香且須珍重休胡分付

浣溪沙

金獸噴香瑞靄氛夜涼如冰酒醺醺照人嬌眼媚生春
我自愁多魂已斷不禁楚雨帶巫雲
人情又是一番新

又

坐看銷金暖帳中羔兒酒美獸煤紅淺斟低唱好家風
愛客東君多解事晚妝新與畫眉峯
便須催喚出房櫳

又

堆枕冠兒翡翠釵蒙金領子滿綰于中沈淨好情懷
新浴晚涼梳洗罷半嬌微笑下堂來
蓮花因甚未曾開

臨江仙

天外濃雲雲外雨雨聲初上檐牙紅葉應褪洗妝花晚涼如有意
霽霽到山家為喚山童多索酒金鍾細酌流霞
暈生玉頰酒潮斜閒中無寵辱醉裏是生涯

夜行船(送張希舜歸南城)

綠蓋紅幢籠碧冰。魚跳處，浪痕勻碎。惜別殷勤，留連無計。歌聲與淚和柔脆。一葉扁舟煙浪裏。曲灘頭，此情無際。窈窕眉山，暮霞好處，雨雲想翠峯十二。

浪淘沙

窈窕繡幃深。窈窕娉婷。梅花初試晚妝新。那更嬌癡年紀小，冰雪精雲。舉措忒輕盈。歌徹新聲。柔腸魂斷不堪聽。但恐巫山留不住，飛作行雲。

如夢令

居士年來懶散。凡惜只從寬簡。身外更無求。祇要夏涼冬暖。美滿美滿。得過何須積攢。

卜算子

十載仰高明。一見心相許。紅日孤舟西水門。風飽征帆腹。後夜起相思。明月清江曲。若見秋風寒雁來。能寄音書否。

眼兒媚

先來客路足傷悲。那更話離別。玉驄也解。知人欲去。驥首頻嘶。馬蹄動是二千里。後會莫相違。切須更把丁香珍重。待我重期。

惜香樂府卷八終

惜香樂府卷九

總詞

南鄉子

楚楚窄衣裳。腰身占却多少風光。共說春來春去事。淒涼。懶對菱花暈曉妝。閒立近紅芳。遊蜂戲蝶。誤採真香。何事不歸巫峽去。思量。故來塵世斷人腸。

又

月轉冰晶盤。樓上初聞一鼓殘。又是去年天氣好。闌干。風動梅梢玉鬥寒。無奈壯情闌。對酒如何欲強歡。誰道破愁須仗酒。君看。酒到愁多破亦難。

謁金門（和德遠）

燈乍滅。忽見一天明月。恰舞霓裳歌未歇。露寒回絳闕。羽服明暉玉雪。笑語輕參環玦。香澤惱人情不徹。夜長窗自白。

又（和宗人）

傷離索。猶記並肩池閣。多病起來閒倚薄。一秋天氣惡。玉臂都寬金約。歌舞新來忘却。回首故人天一角。半江楓又落。

一翦梅

紅藕香殘碧樹秋。羞解羅襦。偷上蘭舟。雲中誰寄錦書來。雁字回時。月滿西樓。花自飄零水自流。一種相思。兩處閒愁。酒醒夢斷數殘更。舊恨前歡。總上心頭。

點絳脣

雲鬢宮鬟淡黃衫子輕香透。晚涼時候。睡起新妝就。冰枕生寒。玉浸纖纖手。沈吟久。眉山歛秀。愛道奴家瘦。

又（舊刻此首後有浣溪沙二首是毛東堂作今俱刪去）

煙洗風梳。司花先放江梅吐。竹村沙路。脈脈搖寒雨。醉魄吟魂。無著清香處。愁如縷。繫春不住。又折冰枝去。

菩薩蠻

江城風火連三月。不堪對酒江亭別。休作斷腸聲。老來無淚傾。風高帆影疾。目送舟痕碧。錦字幾時來。熏風無雁回。

又

春山已蹙眉峯綠。春心駘蕩難拘束。惆悵爲春傷。惜花心更狂。對花深有意。且向花前醉。花作有情香。與人相久長。

畫堂春

當時巧笑記相逢。玉梅枝上玲瓏。酒杯流處已愁濃。寒雁橫空。去程無計更從容。到歸來好事匆匆。一時分付不言中。此恨難窮。

如夢令（寄蔡堅老）

居士年來病酒。肉食百不宜口。蒲合與波菘。更著同蒿葱韭。親手親手。分送臥龍詩友。

又

別恨眉尖無數。後夜王孫何處。歌館與妝樓。日斷行雲凝竚。凝竚凝竚。憶淚千行紅雨。

菩薩蠻

隔江一帶春山好。平林新綠春光老。休去倚闌干。飛紅一忍看。東流何處去。便是歸舟路。芳草外斜陽。春人更斷腸。

長相思

歛愁眉。恨依依。腸斷關情怨別離。雲中過雁悲。瘦因病。病因誰。屈指無言付後期。行時人怎知。

柳梢青

瀟灑仙源。天桃穠李。曾對華筵。歌媚驚塵。舞彎低月。滿勸金船。鑑湖煙水連天。政歸棹紅妝。

門妍花霧香中人。詢居士。切莫多傳。

賀生辰

好事近（賀德遠）

不羨八千椿。不羨三偷桃客。也不羨他龜鶴。一總為凡物。羨君恰似老人星。長明無休息。好與中興賢主。立維城助績。

朝中措（上錢知羣符主管朱知錄三首）

南樓風物一番新。春暮界斯民。豈但仁人愷弟。更兼政事如神。人生最貴。榮登五馬。千里蒙恩。祇恐促歸廊廟。去思有脚陽春。

又

文章學業繼家聲。名譽壓羣英。早歲掀騰。膺仕如公。富貴難并。定膺丹詔。朱輪迅召。陶冶蒼生。自是鹽梅姿質。佇看大手調羹。

又

先生德行冠南豐。錦繡作心胸。暫屈徒勞州縣。文章後進宗工。督郵綱紀。才高幕府。雅望尤崇。此去定膺光寵。且須滿醉西東。

念奴嬌（上張南豐生日）

桂華蟾魄到中秋。祇有人間一六。浩渺清風因喚起。千里吹飛鴻鵠。碧落翻花瑤空隱瑞聲節。琅玕筑。投懷玉燕。此時嘉夢重育。始信名在丹臺。曠方八百子。已三千熟。鱗脯靈瓜那更有。瓊學神仙醺醖。秋水春山柳腰花面。一醉霓裳曲。長生清淨。自然何用辟穀。

好事近

江上一江樓。樓上遠山橫翠。還更腰金騎鶴。引竹西歌吹。壽君春酒遣雙壺。滿引見深意。肯向龜荷香裏。喚儂來同醉。

又

劍水靄歡聲。喜慶間生人傑。一段葱葱佳氣。扇熏風時節。今朝銀艾佐琴堂。爭把壽香爇。去鳳凰池上。見龜巢連葉。

柳長春(上董倅)

梅喜先春。雁驚未臘。千門瑞氣浮周匝。正當月應上。弦時長庚夢與良辰合。螺水恩濃。盱江德洽。壽杯勸處燃紅蠟。明年此際。祝遐齡。賀賓一一趨東閣。

武陵春(上馬宰)

又是新逢三五夜。瑞氣靄氤氳。萬點燈和月色新。桃李倍添春。花縣主人情思好。行樂逐良辰。滿引千鍾酒。又醇歌韻動梁塵。

臨江仙(上祝丞)

天祐炎圖生國瑞。藍田暫屈英僚。始知文宿降璇霄。中元前五日。七夕後三朝。江敷風流臨此政。少年瀟灑奇標。行看峻擢相熙朝。功名前稷契。壽算等松喬。

喜遷鶯(上魏安撫)

商飆輕透。動簾幕飛梧。亂飄庭甃。瑞氣氤氳。沈檀初爇。煙噴寶臺金獸。黃花美酒。天教占得先他時候。誕元老。慶有聲。此夕降生華胄。歡笑宜稱壽。絃管鼎沸。宮商方頻奏。滿捧瑤卮。華堂歌舞拍轉。金釵斜溜。朱顏綠鬢。殷勤深願。鎮長如舊。嘆濱海道難留。指日榮遷飛驟。

鵲橋仙(上張宣機)

雲峯初斂。秋容如洗。庭院金風初扇。蔥蔥佳氣。靄侯門。信天上麒麟乍見。祝君此去。飛黃騰踏。日侍凝旒。邃晃。和羹調味早歸來。坐看取蓬萊清淺。

惜香樂府卷十

拾遺

柳梢青

晴雪樓臺試燈簾幕。適是元宵。羅綺嬌春。帝城風景。今夜應饒。爭知我繫如匏。便佳月良天。任教早閉柴門。從他簫鼓。細打輕敲。

賀新郎

世諦人多錯。阿誰將虛名微利。放教輕著。萬事莫非前定了。選甚微如飲酌。算徒詫龍韜豹略。縱使龍頭安尺木。更從教豹變生三角。渾是夢。恍如昨。吾廬自笑常虛廓。對殘編磨穿枯硯。生涯微薄。負郭田園能有幾。隨分安貧守約。要不改簞瓢顏樂。西掖北扉終須到。且嘲風咏月。常相謔。更要甚。萬金藥。

東坡引（舊刻此首後有滿庭芳一首是山谷作今刪去）

茅齋無客至。冰硯凍寒泚。南枝喜入新詩裏。惱人頻嚼蕊。惱人頻嚼蕊。因思去臘。江頭醉倚。動客興。傷春意。經年自嘆人如寄。光陰如撚指。光陰如撚指。

杏花天

乍涼淅淅風生幕。人獨在朱闌翠閣。吹簫信杳爐香薄。眉上新愁又覺。從前事擬將拚却。夢不斷花梢柳萼。一杯睡起誰同酌。斜日陰陰轉角。

臨江仙

遠岫螺頭濕翠。流霞頰尾疎明。斷虹斜界雨新晴。煙村燈火晚。江浦畫難成。我向其間泛葉。終朝露渚風汀。老來心事最關情。不堪三弄笛。吹作斷腸聲。

鞦韆毬(和康伯可韻)

流水奏鳴琴。風月淨天無星斗。翠嵐堆裏蒼巖深處。滿林霜膩。暗香凍了。那禁頻嗅。馬上再三回首。因記省去年時候。十分全似。那人風韻。柔腰弄影。冰腮退。做成清瘦。

眼兒媚

南枝消息杳然間。寂寞倚雕闌。紫腰豔豔。青腰裊裊。風月俱閒。佳人環珮玉珊珊。作惡探花還。玉纖撚粟。櫻唇呵粉。愁點眉彎。

菩薩蠻

日高猶戀珊瑚枕。羞紅不忿花如錦。雙燕運芹泥。燕歸人未歸。縱饒梳洗罷。朱戶何曾跨。寂寞小房籠。回文和淚封。

鷓鴣天

落魄東吳二十春。風流詩句得清新。今年却恨花星照。再見溫卿與遠真。(京口妓魁趙柔陳玉)分
楚佩染巫雲。赤繩結得短花茵。若非京口初相識。安得毘陵作故人。

浪淘沙

綠樹轉鳴禽。已是春深。楊花庭院日陰陰。簾外飛來雙語燕。不寄歸音。舊事懶追尋。空惹芳
心。天涯消息遠沈沈。記得年時中酒後。直至而今。

謁金門

春睡足。簾捲翠屏山曲。芳草沿階橫地軸。垂楊相映綠。暗憶舊歡難續。又是禁煙傳燭。陌上
踏青新結束。鞦韆誰共促。

侍香金童

一種春光占斷。東君惜。算穠李昭華爭並得。粉膩酥融。嬌欲滴。端的尊前舊會相識。向夜闌
酒醒霜濃寒又力。但只與冰姿添夜色。繡幕銀屏人寂寂。只許劉郎。暗傳消息。

菩薩蠻

新晴庭戶春陰薄。東風不度重簾幕。第幾小蘭房。雛鶯初弄黃。悄寒春未透。不解尋花柳。只
恐漸春深。愁生求友心。

清平樂

紫簫聲斷。窗底春愁亂。試著春衫羞自看。窄似年時一半。一春長病厭厭。新來愁病重添。香冷倦熏金鴨。日高不捲珠簾。

好事近

齒頰帶餘香。警欬總成珠玉。翦碎袖羅花片。點金觥春綠。玉魚花露自清涼。涓涓在郎腹。猶勝望梅消渴。對文君眉蹙。

思越人（向刻品令誤）

好事客宮商內。吟得風清月白。主人幸有豪家意。後堂煞有春色。花壓金翹俏相映。酒滿玉纖無力。你若待我些兒酒。儘喫得得得。

武陵春

落了丹楓殘了菊。秋色苦無多。誰喚西風泣淚羅。吹恨入星河。碧枝頭上金粟鬧。曾挿翠雲窩。重揉檀英憶兩娥。無奈冷香何。

惜香樂府跋

長卿自號仙源居士。蓋南豐宗室也。不栖志紛華。獨安心風雅。每遇花間鶯外。輒觴詠自娛。鄉貢進士劉澤集其樂府。以春景夏景秋景冬景及總詞賀生辰補遺類編。釐爲十卷。雖未敢與南唐二主相伯仲。方之徽宗。則迥出雲霄矣。湖南毛晉識。

西樵語業一卷

楊炎正

西樵語業

目錄

水調歌頭七調

賀新郎二調

鵲橋仙二調

玉人歌一調

浣溪沙二調

減字木蘭花一調

相見歡一調

滿江紅四調

念奴嬌二調

蝶戀花三調

點絳脣二調

桃源憶故人一調

生查子一調

訴衷情一調

瑞鶴仙一調

洞仙歌二調

千秋歲一調

秦樓月一調

踏莎行一調

柳梢青一調

西樵語業目錄終

西樵語業

西樵語業

廬陵 楊炎正 濟翁

水頭歌調（登多景樓）

寒眼亂空闊。客意不勝秋。強呼斗酒發興。特上最高樓。舒卷江山圖畫。應答龍魚悲嘯。不暇顧詩愁。風露巧欺客。分冷入衣裘。忽醒然。成感慨。望神州。可憐報國無路。空白一分頭。都把平生意氣。只做如今憔悴。歲晚若爲謀。此意仗江月。分付與沙鷗。

又（呈辛隆興）

杖履覓春色。行徧大江西。訪花問柳都自無語。欲成蹊。不道七州三壘。今歲五風十雨。全是太平時。征轡晚乘月。漁釣夜垂絲。詩書帥。坐圍玉麈。揮犀輿。方不淺領袖。風月過花期。只恐梅梢青子。已露調羹消息。金鼎待公歸。回首滕王閣。空對落霞飛。

又（送張使君）

父老一杯酒。爭勸使君留。可憐桃李千樹。無語送歸舟。聽得拈笙玉指。都把萬家遺愛。吹作許離愁。倚醉袖紅溼。生怕夕陽流。問君侯。今幾日到東州。還家時候。次第梅已暗。香浮。只恐道間驛使。先寄調羹消息。歸去總無由。鼎鉉功名了。徐赴赤松遊。

又（呈趙總領）

買得一航月。醉臥出長安。平隄千里過盡。楊柳綠陰間。依約曉鶯啼處。認得南徐風物。客夢恍驚殘。重到舊遊所。如把畫圖看。英雄事。千古意。一凭闌。惜今老矣無復。健筆寫江山。天上人間。知己賴有使星郎。宿照映此塵寰。準擬五湖去。爲乞釣漁竿。

又

把酒對斜日。無語問西風。胭脂何事都做。顏色染芙蓉。放眼暮江千頃。中有離愁萬斛。無處落征鴻。天在闌干角。人倚醉醒中。千萬里。江南北。溯西東。吾生如寄。尙想三徑菊花叢。誰是中州豪傑。借我五湖舟楫。去作釣魚翁。故國且回首。此意莫匆匆。

又

一笛起城角。吹破小梅愁。東風猶未誰遣。春信到吾州。聞得東來千騎。鼓舞兒童竹馬。和氣與空浮。桃李未陰處。準擬種千頭。今太守。宋人物。晉風流。政成談笑不妨。高興在南樓。只恐蓬萊仙伯。合侍玉皇香案。難作寇恂留。約住紫泥認。憑軾且優游。

又

踏碎九街月。乘醉出京華。半生湖海誰念。今日老還家。獨把瓦盆盛酒。自與漁樵分席。說尹政聲佳。竹馬望塵去。倦客亦隨車。聽熏風。清曉角。韻梅花。人家十萬說盡。炎熱與咨嗟。只恐棠

陰未滿。已有楓宸趣召。歸路不容遮。回首江邊柳。空著舊棲鴉。

滿江紅

春入臺門。又見染柳絲新綠。對此景一年爲壽。一番添福。莫怪鳳池頒詔晚。要教淮水恩波足。聽邊民千歲頌聲中。重重祝。堂萱茂。庭芝馥。歌倚扇。杯持玉。共勸君一醉。滿斟醽醁。今夜東風吹酒醒。明朝萬里騎黃鵠。向九霞光裏望宸輝。看除目。

又

筆染相思。暗題盡朱門白壁。動離思春生遠岸。煙銷殘日。楊柳結成羅帶恨。海棠染就胭脂色。想深情幽怨繡屏間。雙鷓鴣。春水綠。春山碧。花有恨。酒無力。對一匳愁思。九分孤寂。寸寸錦腸渾欲斷。盈盈玉淚應偷滴。倩東風吹雁過江南。傳消息。

又（壽稼軒）

壽酒如澗。拚一醉勸君休惜。君不記濟河津畔。當年今夕。萬丈文章光焰裏。一星飛墮從南極。便御風乘輿入京華。班卿棘。君不是長庚白。又不是嚴陵客。只應是明主。夢中良弼。好把袖間經濟手。如今去補天西北。等瑤池待宴。夜歸時。騎箕翼。

又

典盡春衣。也應是京華倦客。都不記麴塵香霧。西湖南陌。兒女別時和淚拜。牽衣曾問歸時節。

到歸來稚子已成陰。空頭白。功名事。雲霄隔。英雄伴。東南拆。對雞豚社酒。依然鄉國。三徑不成陶令隱。一區未有揚雄宅。問漁樵學作老生涯。從今日。

瑞鶴仙（元夕爲王使君賦）

風光開舊眼。正梅雪初消。柳絲新染。樓臺競裝點。照金荷十里。珠簾齊捲。湘絃楚管。動香風。旌旗影轉。望雲間一點。台星飛下。洞天清晚。爭看袖紅圍坐。舞翠回春。笑歌生暖。歡聲正遠。嬉遊意。末容懶。恐絲綸趣召。清都仙伯。歸去朝天夜半。倩那人。挽回。取黿頭醉扶玉腕。

賀新郎

十日狂風雨。掃園林紅香萬點。送春歸去。獨有茶蘼開未到。留得一分春住。早楊柳趁晴飛絮。可奈暖埃欺晝永。試薄羅衫子。輕如霧。驚舊恨。到眉宇。東風臺榭。知何處。問燕鶯如今。尚有春光幾許。可殺一年遊賞倦。放得無情露醕。爲喚取扇歌裙舞。乞得風光還兩眼。待爲君滿金杯舉。扶醉玉。伴揮塵。

又（寄辛潭州）

夢裏驂鸞馭。望蓬萊不遠。翩然被風吹去。吹到楚樓煙月上。不記人間何處。但疑是蓬壺別所。縹緲霓裳天女隊。奉一仙滿把流霞舉。如喚我。醉中舞。醉醒夢覺。知何許。問瀟湘今日。誰與主盟尊俎。無限青春難老意。擬倩管絃寄與。待新築沙隄穩步。萬里雲霄都歷徧。卻依前流水。

桃源路。留此筆。爲君賦。

念奴嬌

漢天雲靜。望一星飛過。湘南湘北。當是郴山猿鶴夢。喚起日邊消息。羽扇綸巾。浩然乘興。此意無人識。扁舟千里。但聞清夜橫笛。記得天上人間。去年今日。曾作稱觴客。明月風煙依舊似。只覺蓬萊懸隔。更恐明朝。詔黃飛下。趣駕冲霄翼。袞衣劍履。望公長在南極。

又

杏花楊柳對東風。染盡一年春色。彈壓煙光三萬頃。誰識清都仙伯。夜泛銀潢。手移星緯。飛墮從天闕。御風乘興。偶然身到鄉國。二年人樂昇平。舞臺歌榭。處處紅牙拍。壽酒千觴斟不盡。一醉何妨今夕。更約明年。鳳凰池上去。作稱觴客。梅花折得。贈君調鼎消息。

洞仙歌

芙蓉開了。春未江梅透。小小東風弄晴晝。把萬家和氣。吹入笙歌。爐熏裏都與慈闈做壽。黃堂今日貴。自著萊衣。捧勸金船十分酒。願從今江海上。日日韶華。桃李徑總爲人間種就。但看取天邊老人星。有一點台星。共光南斗。

又(壽稼軒)

帶湖佳處。髣髴真蓬島。曾對金尊伴芳草。見桃花流水。別是春風。笙歌裏誰信東君會老。功

名都莫問。總是神仙。買斷風光鎮長好。但如今經國手。袖裏偷閑。天不管。怎得關河事了。待貌取精神上。凌煙卻旋買扁舟。歸來聞早。

橋鵲仙

思歸時節。乍寒天氣。總是離人愁緒。夜來無奈被西風。更吹做一簾秋雨。征衫拂淚。闌干倚醉。羞對黃花無語。寄書除是雁來時。又只恐書成雁去。

又(壽稼軒)

築成臺榭。種成花柳。更又教成歌舞。不知誰爲帶湖仙。收拾盡壺天風露。閑中得味。酒中得趣。只恐天還也妬。青山縱買萬千重。遮不斷詔書來路。

蝶戀花別范南伯

離恨做成春夜雨。添得春江。剗地東流去。弱柳繫船都不住。爲君愁絕聽鳴鶻。君到南徐芳草渡。想得尋春。依舊當年路。後夜獨憐回首處。亂山遮隔無重數。

又(稼軒坐間作首句用邱六書中語)

點檢笙歌多釀酒。不放東風。獨自迷楊柳。院院翠陰停永晝。曲闌隨處堪垂手。昨日解醒今夕又。消得情懷。長被春倂懣。門外馬嘶人去後。亂紅不管花消瘦。

又

萬點飛花愁似雨。峭殺輕寒。不會留春住。滿地亂紅風掃聚。只教燕子啣將去。獨倚闌干閑自覷。深院無人。行到無情處。簾外絲絲楊柳舞。又還裝點人情緒。

千秋歲（代人爲壽）

五雲縹緲。朝退金門曉。歸未穩。傳宣到。龍樓陪夕宴。鳳沼吟春草。人間世。誰知自有蓬萊島。一杯宜勸了。換得天顏笑。人不老。春長好。從今千百歲。總是中書考。瑤池會。金盤剩薦安期棗。

玉人歌

風西起。又老盡籬花。寒輕香細。漫題紅葉句。衰意誰會長。天不恨江南遠。苦恨無書寄。最相思。盤橘千枚。膾鱸十尾。鴻雁阻歸計。算愁滿離腸。十分豈止。倦倚闌干。顧影在天際。凌煙圖畫。青山約。總是浮生事。判從今買取。朝醒夕醉。

點絳脣

邂逅開尊。眼中有個人。纖軟袖羅輕轉。玉腕回春暖。韻處無多。只惱人腸斷。詞將半。近前相勸。撲撲清香滿。

又（送別洪才之）

水載離懷。暮帆吹月寒。欺酒楚梅春透。忍放持杯手。莫唱陽關。免溼盈盈袖。君行後。那人消瘦。不惱詩腸否。

秦樓月

東風寂。垂楊舞困春無力。春無力。落紅不管。杏花狼籍。斷腸芳草萋萋碧。新來怪底相思極。相思極。冷煙池館。又將寒食。

浣溪沙

楊柳籠煙裊嫩黃。桃花蘸水染紅香。薄羅衫子日初長。飲盡東風三百盞。醉來愁斷幾回腸。教人獨自遣風光。

又

三徑閑情傲落霞。五湖高興不浮家。自斟北斗浸丹砂。閑把胸中千澗壑。撰成醉處一生涯。雪樓風月篆崗花。

桃源憶故人

尊前未語眉先皺。只把橫波斜溜。此意問春知否。碟困蜂兒瘦。 臆膜呷了些來酒。越會把人。倜傥有箇約伊時候。夢裏來相就。

踏莎行

宿鷺棲身。飛鴻點淚。不堪更是重陽到。一襟無處著淒涼。倚闌看盡斜陽倒。 瘦減難豐。悲傷易老。淡觴消得黃花笑。畫眉人去玉篔存。濃愁如黛憑誰掃。

減字木蘭花

月明如晝。占斷小樓。供把酒。入眼人人。如月精神更有情。大家休睡。留到天明。和月醉。生怕醒來。月到波心。憶酒媒。

生查子

金蓮照夜紅。玉腕扶春碧。曲妙遏雲行。人好欺花色。歡生酒面濃。笑染爐香溼。飲盡十玻璃。月墮東方白。

柳梢青

生紫衫兒。影金領子。著得偏宜。步穩金蓮。香熏紈扇。舞轉花枝。捧杯更著。臙脂唱一箇新行。耍詞。玉骨冰肌。好天良夜。怎不憐伊。

相見歡

江湖萬里。征鴻再相逢。多少風煙。都在笑談中。歌裙醉。羅巾淚。別愁濃。瘦減腰圍。不礙帶金重。

訴衷情

露珠點點欲團霜。分冷與紗窗。錦書不到。腸斷煙水隔茫茫。征燕盡。塞鴻翔。睇風檣。闌干曲處。又是一番。倚盡斜陽。

宋六十名家詞

西樵語業錄



西樵語業跋

楊濟翁廬陵人也。西樵乃清梅府城西山名。相去數百里。或曰曾流寓於此。因以名集。今亦無傳。但其語業一卷。俊逸可喜。不作妖豔情態。雖非詞家能品。其品之間閒。可想見云。湖南毛晉識。





中國文學珍本叢書

第一輯 第二十九種

中華民國廿五年六月初版

宋六十一名家詞丙集

普及本實價四角
特印本實價五角五分

撰著者

毛子晉

校點者

施蟄存

主編者

施蟄存

發行

貝葉山房

總經售

張靜廬

上海雜誌公司


上海總店：四馬路三二二四號

廣州支店：永漢北路一三三九號

南京支店：太平路一二四八號

開封支店：中山北街二八四號

雲南支店：土主廟街四七號







國立中央圖書館



0799974



5

籍